

小叙

余與君宣交蓋自髫年也每  
飛書相問聲情筆舌舉體皆  
俊心異賞之謂必將才人故  
未知其業能顯也已余讀書城南

君宣衡宇相望與古白及余三人相為揣摩言覃思沈々乃更服其精苦然猶未知其二詩古文也又五年同上公車出雜稿一秩相示使我歌之舞之心折

魂搖不能自禁蓋明興作者大起以至今日大都襜々研々一種爭炎鬪名云想浸淫於神魄而滌洄於豪吻以故骨不僂而機不夭莽材罔學復叙為決裂

蹕蕩之文自含膽識其膚者剝  
割眉山影其眇笑倚門殢客喜  
為逸品轉相飄飄幾不省機趣  
為何等矣君宣諸稿如凝似縱  
欲朴旋靈不摩先造而古玉古

鼎決無凡色不落今趣而為雲  
為雨綽露纖姿至於詩篇空想  
幽懷聊思澹響名葩滋露歌態  
迎風每使魅泣於冥髮癡在室  
詩情至此可仙可鬼亦逝六傳

矣而君宣故以無意出之不知  
竟以此傳且僅以此傳也悲夫  
君宣手稿錯落甚異如衫履嶽  
嶠雄姿彌耀而今茲刻集冠之  
冕之裼之襲之容儀矜儼乃稍

裕、研、矣或非君宣旨也則  
後死者之任矣夫

戊午中秋友弟文震孟纂

自娛集目錄

卷之一

古樂府

擬古遺遠 六首

友人作歸鴻別鶴操屬予作高山流水

采蓮曲

道旁柳

江南春

映水曲

焦小玉

行路難

輕離別

明朝別

悲愁行

五言古律

怨女 四章

邨墓

路失公鳴

代贈友人破戒浪宿

遐望

秋慰

夢懶

拾花

贈郭山人

江望

憶宓章紀夢

贈雷秀泉

古意

隔舟婦語音絕麗

有述

江月

三星橋

飲馬

寒途

良鄉有蘇廷用者以一見偕步塔下坐

語山頭此山出火石

丙辰元日

旅店夜啼兒

寄李伯玉

憶爾行爲馥儂

送別 代小壽

張念餘五十兼祝誕子

畫

有女行贈來君

謝志

寄潘景升 二首

勵志行有贈

賭命行

贈阿鳳

途中懷慈甫仲囚

夢作天邊遊寤懷原博子晉愚公

贈潘景升 二首

古意

遠書至

悲幼玉

春盡

送北游客

古意

手藉代贈

柬 二首

題蘭別古白 二首

舟中述

兩來船

題尋隱圖

壽孫貞媛查氏

七言古詩

雨中登虎丘

中秋懷子宓

劉受初立夏日山中一宿而去

齊王孫水竹居 夢偈東從實師

復渡金山與慈航臨江對月

同汝章原博文綬坐平遠堂

爲岫雲舅招魂

郭璞墓望江雲膚寸而散如海鷗鳥

歲朝

送楊將軍

晏如居士歌

雪中與古白游馬鞍山

卷之二

五言律詩

虎丘五賢臺坐月

訪小四

述夢

感孟珠

二首

錢功父

懷慈甫

同慈甫過竹亭是時將別彼此愴然

有懷

別錢九淵

贈楊綬

歸度金山

過栖霞

壽劉山客

郊外遇故人

與譚文長晚坐昭關

集劉子真齋遇徐姬



棣棠

小翻醉

席上

風蘭

日午過陸姬猶擁被未起也

友餞

戊申除夕

江行

與文彩

寄金際之

舟中夜別

秋怨

夜坐

答顧三

贈倪仰山 二首

緜園

齊饑

新城雪道曉行

王子顒別後

伐樹

家園樂

柰峰同飲釣鼇亭兼志茆山之別

歸途風雨

壽徐日方

促朱亭玉

李二華小照

海棠

感焦家玉蘭

北客春晚

別印六 二首

五芳去

楊柳枝贈朱太玉

秋葉夜棹別慈少

悼范七

詠月

慈航雲谷言念六載矣丙午復渡江相

對

山間

與倪馴之集缶歌館

癸卯雨花臺遠眺懷幼子

燕子磯

客燕

清明日西山道中

渡江望方山一帶

飲木末亭紫薇下

新識俞羽侯

與徐子

燕子磯夜坐

有悼二首

子秋入禪

寄友人

梨花

懷歸

春歸夜

贈某師

感別

南歸客

卷之三

七言律詩

莫愁湖飲別

滕陽道上

過孟嘗君養士碑

新城雪道曉行 曉征

瓊花臺夜飲 壽八十翁

途寄蕊玉 靈巖女

三賢堂 憶玉如

東維揚徐茗玉 二首

題弘濟寺 黃雨石南山祠

虎丘夜歸 曲水草堂贈侯雙

送陳玉海 懷遠

江風感 喜碧來

子秋習禪

昔年曾攜孟珠登燕子磯坐石臺俯江

流醉夢嘯歌者數日今復登此臺而

欲泣卽下舟去

有贈 薄暮新月

子秋 憶秋華喜

節兒新被瓜以襟帶索題戲書此

除夜泊淮陰朱侯適亦同舫相對驚快

朱出梅花酒縱飲三日乃別 二首

梅側有樓外祖所居處

答攝山淨持子從實時讀書天開巖

卷之四

五言排律

庚子過惠山憇漪瀾亭懷仙樓及謁諸

賢祠

楊二郎善琴善歌不美而多態卽若若

弟也

書扇頭贈玄仲家佛舍

登天池蓮華峰絕頂

和張餘子絡絲嬾詩

燕子磯南石門山之聚風處也從秣陵

歸盤桓山下數日徐公子挾玉華至

苦秋熱飲于石門華病腰兼有別離

之愁神頗不怡謀所以怡之者鼓興

狂飲命歌者歌大江東去詞主人洞

簫倚和華爲解顏曰今日惡得無詩

爲予檢韻得歸字成十六言

同子顥渡江而北

城南聯句

丁未除夕

園南室

傅子晉祖載寫哀

鳳從許關移居胥渡

再贈日方

舟中別

送何仲先鄉試

別王吟

贈原博胤子

別夜賦燕姬弄

七言排律

追念伯起先生

五言絕句

貧婦曲

九首

幼于艸堂歌

七首

予有把酒憶明月九章原博有六章採  
其一章續後成十章

幼于生殯

十首

甘蔗郎

十首

禪房

之客

蛛網

馬湘蘭畫蘭

金山曉起

山茶積雪題扇

題畫

新春日

書燕子磯石壁

山望

畫

閨懷

與原博舟中別

風月閒

歲朝

畫蘭

畫

携幼奴

樓雨

手藉

弱秋小影

春晚

悶待

招遠

別贈

代張壽  
四首

攜李別諸友後寄謝

馬行夢驚

懷舊

古意

緘寄

雲

交運

盆馬行

懷友

卷之六

七言絕句

桃葉渡

燈市喜素奴不赴

覽髮因感

有訪不遇時歲底

追懷魏蓉

復過淮堤新柳邊有感

登山喜雨姬月下至

感玄仲諸契

二首

余峰丈同渡春江分手作茆山游

二首

懷別

岫雲沈舅誌

二首

燕姬墮馬

四首

登太山

八首

爲幼玉作嫁衣并書此送之

七首

原博畱綬館予月下獨歸晨遣訊之

五首

紀夢

彈琴

九郎過訪

夢杜若

題小翻圖

月下虎丘見喜月二馮

潯陽送客圖

書觀音閣石壁

二首

樓頭嬾

代

憶別

閨懷

別小四

春盡

記別

送別

餞友

鳳生

空閨春晚圖

夢愛兒片語卽去

家樓

挽何冰玉 二首

贈倪冰泉

感雙 二首

南齋夜讀

閨怨

訪幼卿瘞處

醉步

歌婢留別

雲夢弔古 五首

閨怨

長干竹居菴有手栽四竹歸時囑陳復  
所善護之別後時以爲念因夢晤陳

君丞訊此竹陳曰無恙

薛虞卿得下嫂置大樹園

畫蘭

喜見黃必顯

秋閨詞代楊素娟遠寄

自述 二首

爲綵五作悲秋詞贈舊歡

茗蕊對奕適有客索詩者

客中歲暮

湖上追想

又子鴻歸禪

懷蕊玉 二首



有訪

贈友

懷諸姬

悼 三首

春去日送行

春閨

晏坐

夢恨

夜別因贈在坐之交歡者 三首

幼子來

飯後假寐夢四兒

霧後歸園

春晴

臨別 二首

平康曲

秋別

舊隱

春暮 二首

郊外別

過去姬與遊處

訪高士

山懷西望

題畫 二首

感

閨恨

維揚遇華哥

山夜

夢醒

寄

醉歌

海棠

仙仙楊柳牕

哭顧二

蘭

寄茗玉

秋夜集

畫煙雨

看雲客至

蘆雁

憶舊遊

渡錢塘

喜玉如強起

別王學博

遣病

劉隱士

送子秋仲喜

答張一

答徐日方兼寄元聲兄弟

汪成龍

江上

鄉夢

多病

訪山客

齋中

湖上懷皆可諸丈

述感

青韶臨水

有感

二首

雨夜

秋夜臨水默坐

遠懷

江南意

春雨懷寄

落花

三首

秋淚

待夢

感春

懷

惜少年

閩怨

雨鐘

答友人秋山圖

寄謝

坐想

悼徐玄仲

春病 二首

傷艾賓伯 三首

夢別 二首

春去 二首

多別

閨况

秋去矣而感秋之疾固在毋冤秋也以

寄子葵

春思 二首 懷翩翩

紀別

夢原博

野集

秋病 二首

惜花 二首

悼原博

原博玄仲

幼卿朱鳳玉華

閨夢

不遇

秋閣 二首

又送王學博歸滇南

有悼 十三首

友人死有冤以買姬致疾者

夢期茯苓 二首

懷素玉

國家圖書館 NATIONAL CENTRAL LIBRARY, TAIWAN, R.O.C.

夜別

送別歸

祝生病

痛祝生四首未首為生招魂

別梁丹甫

作雲期曲懷人因寄

湖上喜值

友人作病顏詩代為贈答各二章

邀夢

樓望

野步

鴛鴦枕

促至二首

春意

雨樓

自悵

期飲

風緩

雁

送春

江船

餞

別怨

閨望二首

春苦

夢述

順流別

懷魏元

憐秋

題楊柳參差揜畫樓

畫二首

懷歸二首

夜權

娥眉疎

西湖感

閨怨

秋倦

郊送

霞望

秋病 二首

嚴灘

錢塘

遠行

新相識

蛩

雪

古意

失意

秋恨

贈別

行

名歎

秋興

寄意

春興

春閨

感慰 二首

賦別

驟寒

夜集有贈

瓶梅影

集楊女郎

悼

戲贈

送人

悵

秋懷

東寄

春懷

羨閒

別

卷之七

序

陳古白南園日牋序

何侯兵錄序  
蘇子忠詩序

談節甫文序  
浦麗江乞壽詩題序

歸母沈孺人壽序

壽顧雲門序  
壽張老伯母序

壽郭老序  
壽伍孀子母序

壽談母序

卷之八

引

會課引  
代朱按院  
張仲防稿引

太淳文引  
子灝文引

自引  
太淳戲擬十義引

王瑞卿官詞引  
林若撫梅詠引

吳康侯文引

張伯雄選許子遜稿引

刻時稅自引

宛似歌引

打棗竿小引

題跋

題日方越吟

題畫卷後

雜著附

齋中木魚銘後爲陳古白敲碎復作碎

木魚銘

四首

研銘

丙午前除夕詩多不能全憶每錄二語

數歷年之況

卷之九

祭文

祭張幼千先生文

祭黃麗江

代歸郎子

祭何鳳老

奠宋翁

祭傅子晉

代

祭楊培之

祭歸爾昌

祭申晦之

祭薛雲舉

祭陸冲宇

遙祭宓子章

祭若愚羽士

祭陳貞母

祭陳貞母代

祭王宜人代

祭陳嫂

有以子祭父者代爲之文

爲張皆可祖奠 奠沈元文

祭胡一 祭半齒

祭桃影

挽

挽江進之

誄

誄雙梧 傷小董浣

哭顧二火死

應奎死感泣不已而有是文

哭宋伯醇

傳

先大夫別傳

記

翦四宜堂竹樹記

讚



張元長像讚

劉周巖行樂小像讚

章右之先生像讚

張氏族譜讚

侯雙小照讚

疏

募脩觀橋疏

講楞嚴募疏

立禪募造疏

卷之十

尺牘

與郭履台

與吳

與陸觀卿

與方孩未

與孫蘇門

與尹慧生

與徐日方

與宋汝章

二通

復崔連嶽

與馬心劬

與陳玉海

與同年某

與徐大冶

與某丈

與鄭

與李君仁

與張余峰

與姚孟長

與尹慧生

與周玉繩

與京中同年

與張元美

與謝赤几

與何仲先

與張皆可

與張元美

與王東里

與秦

與陳載甫

與張倚公

與陳載甫

復周

與陳韋翁

與管席之

與劉元聲

與陳古白

三通

與陳夢維

與張赤涵

與王太玉

與文起孟長

與君亮

與太淳

與某年丈

聚臺叔

家書

二通

詩餘

爲顧文英作古鏡詞

友人有十二詞爲古來薄命人洗恨者

獨缺馬嵬一事予爲補之調惜餘春

慢

賀新郎贈倪馴之再娶

贈韓香

閨怨 二首

四君醉我惜無一共醉人牽我襟袂竟

踏雨夜歸旦日謝之

鵲橋仙咏月

情夢 二首

十二紅

孟珠十二調

步步嬌

山坡羊

鬪寶蟾

玉芙蓉

香羅帶

醉扶歸

江兒水

玉交枝

四朝元 四首

江行紀春 闌十八

傅靈修五調

二郎神

集賢賓

猶兒陰

金衣公子

琢木鸚

小翻十九調

山坡裏羊

步步嬌

月雲高

江兒水

三段子

皂羅袍

節節高

玉交枝

玉胞肚

嘉慶子

僥僥令

香柳娘

好姐姐

減字憶多嬌

小二四調

二犯江兒水

侯小雙十調

懶畫眉

陳家映桃十三曲

香遍滿二調  
梧桐樹二調

浣溪沙二調

劉潑帽二調

秋夜月二調

東歐令二調

金蓮子一調

襄人四曲

燕女有搗琵琶者喜為是歌乞新聲數

調余時大醉應絃疾書成十八韻

黃鶯兒



國家圖書館 NATIONAL CENTRAL LIBRARY TAIWAN R.O.C

自娛集卷之一

長洲俞琬繪君宣著

古樂府

擬古遺遠

人在衡湘兮臨睨鞅鞅芬菲以佩兮替予蕙纒

其二

神魂斐斐兮入我翠幃子還墨墨兮有淚如綢

其三

長風颺颺兮邈矣飛鳥明月親我兮何時還珠



其四

悲鳥垂聲兮。睠睠問還。淒雲落影兮。唯我知寒。  
其五

側耳南枝兮。齊女無聲。欲鳴以咽兮。商風淒清。  
其六

想像朱樓兮。有子淒其。清風在裳兮。無言以思。  
友人作歸鴻別鶴操。屬予作高山流水。

青山百疊白雲深。白雲千頃青山陰。我有遐懷  
誰知心。月射方諸水如綢。碧水洄洑月在流。我  
有遐懷誰知憂。

采蓮曲

小姨學采蓮。兩腕白於雪。花色如繡。袞瓣瓣紅  
于血。西鄰小姑亦採蓮。隔面徒聞語笑喧。從來  
不相識。相呼好竝船。停橈花下勤把手。他年何  
處投箕帚。苦樂參差不可言。此日花開得來否。  
難割藕絲腸。怕逢冶遊郎。歸去風吹小簟涼。時  
聞花外香。

道旁柳

吁嗟道旁柳。歲古貌亦奇。彼樹樓頭者。好鳥輕  
風吹。獨此揚路塵。常對塵中人。軒冕盡相識。無  
一爲吾親。鄒魯歲荒瘠。皮作饑人食。采薪莫采  
實。實貯飽家骨。樓頭少嬾心。道旁游子吟。草木  
豈無意。蕭條背與襟。

江南春

陌頭誰少年。贈子玄霜散。曷報芙蓉漿。白日照  
心晚。滄江日夜去。情盃不可滿。鏡裏入輕風。雙  
鬟向花緩。

映水曲

忽聞啞啞呼阿汝。停杯欲應姑。勿語徬徨四顧  
不知處。推簾坐對江之渚。撥開荇藻青霞舉。欲  
偃欲仰。姍然舞臺面。始識樓頭女。

焦小玉

噴路桃花香馥郁。天妹問信飛丹鵲。欲投箏語  
出纖柔。半額開愁理清曲。拾翠采明人滿堂。萎  
蕤秀髮披雙玉。有心欲許無一言。微風卸却春

衣束

有心句改曲罷  
拋箏態若狂

行路難

慘風獵獵高天沙尾無翠紫山無霞主奴相顧  
不識面狐狸當津磨爪牙解鞍買楫颶濤沸行  
人動魄江魚戲巨鼇三月苦波恬揚鬚鼓角千  
鱗碎苦日猶悲點額還今朝額血叩天關鼇囓  
金彪九關使一錘揮去成壘山寄語天涯歸及  
早橐空命在莫煩惱剪將蕙朶熏成絮不奉征  
衣蓄羅襖妻縫襖女具餐閉門貴草牀安犬迎  
花笑鳥聲歡壁有素琴風自彈與君胡坐松風  
下快酒聽彈行路難

輕離別

我恃通靈夢嘗輕離別愁朝分橫浦袂暮整合  
歡稠今年蹙盞風塵擾心旆情昏夢謬悠到此  
方知重離別處處傷心別事稠別事稠多夷猶  
菡萏香吹裁扇月梧桐風怯擣衣秋昔日擣衣  
秋夢飛淮水頭雲嶺愈長飛愈利誰知夢遇亦  
前由今日情深飛翅弱寸心千塞莫通郵夢來  
江上尋舟渡每值江空無渡舟吁嗟無渡舟步



轉數回頭轉到身何在當年同坐樓樓滿山雲  
人去遠雲自依山水在流流去若逢招渡夢借  
乘一瓣入南洲

明朝別

醉子雙金罍一罍幾番換明日山前山相思旦  
復旦壁響秋蛩驕爐紅淺泉爛同調有幾人堪  
此聚還散尖風偷隙來移燈几屏半猶共榻眠  
時宵興向空喚

悲愁行

人人羨我無悲愁悲愁到我卽斷頭一生盡是  
悲愁事事有悲愁心自休心休百事開眉端家  
人亦在戲中看棘絲纏作今生業轉合團圞夙  
世冤世路本參差營求欲胡爲禍福皆非願尋  
常素所期有酒信吾口有琴信吾手對飲是何  
人聽者知音否座上常滿忘形難醉客無魚莫  
作餐曲成難得聽者歎歎叶平聲娛客無絃不可彈  
尋常事內多難測況不尋常寧可必莫測還他  
難何必還吾適萬事皆存何必心此心卽是神

仙術鴛鴦繡處好我亦知他好無意繡鴛鴦任  
爾金鍼巧法法都假我猜破終須線斷鴛鴦了  
我勸君空林灑烟月碧水沉秋旻揜窻與世隔  
對影唯吾親我勸君假處勞心心莫真君不見  
一窩隙土撐白骨當年世上有心人

五言古詩

怨女四章

有序

友家有以怨女死者女生於下人殊色  
而有文諶及良年而無燕婉求者置門  
前敗堵間予數過友人不知其家有此  
女也垂死之日予適跳往而於隔牆聞  
悲啼聲始詳其故悼悵無已因勸主人  
善瘞之乃日亦聽其父母歸之烏有耳  
嗟夫徽黼粉縕寧一此女然自遺人間

無限憐涕至錦襪一翫百緡此女遭何  
不幸哉

二九顏如花輕柔動簾箔曲眉結煩冤芳情委  
索莫妾命如秋蟲生世何窮薄不識春榮枝微  
軀墮寒籜

其二

谿側揚芳蕤停車爭採撫言鳥能解呼雕楹弄  
朝夕儂賤不如草儂賤不如鳥良年棄道旁艱  
苦如食蓼決死誰嗟呼芳魂逐空窅

其三

人苦爲情死情死安足傷有情竟誰歸收以還  
大荒生前一縹髮今日餘膏薈骨亦干黃金隙  
土無摧藏

其四

世無鴟夷子恨作西家兒千金買醜人稗穉棄  
環姿父母空哀號哀號欲胡爲死者縱可作世  
緣儂已知

卹墓

來過無名邨。纍纍數十阜。古來同一盡。唯汝求  
速朽。骨肉生參商。秦越同丘首。當是夙來緣。相  
盟作死友。枯草夜蕭蕭。磷聚魂相守。月碧風沙  
飄。遶逼兔狐走。子孫貧或絕。皮骨新或久。間得  
一陌錢。願汝通無有。我含萬古淚。爲汝滴荒畝。

路失公鳴

與友長安去。相失塵路岐。前山一片霞。同見不  
相攜。秦雲赴湘月。輕風頃刻期。不謂歌離筵。乃  
在連袂時。況將井梧淚。欲縮江鴛襦。遙見折楊  
柳。乃是牛背兒。不知贈離別。鞭牛要柳枝。問見  
迷行馬。搖頭回不知。

代贈友人破戒浪宿

妾住柳塘西。學舞紫雲曲。三年不試舞。狼籍青  
貂蓐。曠望有遐心。參差暗香綠。春綃馬上郎。投  
鞭意何屬。玄霜渴未解。題縑爛荃淥。君醉瓠子  
卮。妾乘蓮華燭。當筵未陳意。溫風悴琴玉。才名  
久騰價。何事尚蹉跎。虧我一宵緣。留君千里足。  
君今擬上貴。安望鷓絲續。但願勵名士。莫賤紅

塵辱眉劍咄已奇。龍性矯難伏。胡乃清霄姿。降  
心睠鸚鵡。

遐望

邈若嶺頭雲。幻出仙人髻。解髻風參參。雲化山  
光碎。行役勞我形。幽意忻相對。予有舊乘鶴。見  
我三聲唳。海外風何長。春草三千世。契宿有空  
山。躊躇理往事。

秋慰

舉轡杜陵堤。烟雨籠秋暉。雨般葉盡泣。烟蕩山  
皆飛。烟寂飛還止。泣窮花欲歸。辭歸向東嫁。西  
風翦嫁衣。所憐辭去時。雁催春事稀。雖無春富  
貴。却勝春枝危。

夢嬾

妾病雙腕弱。況當春夢薄。采花爲郎贈。十步幾  
回落。持花力不勝。垂垂豈堪虐。郎何牽我袂。偃  
輒不能拒。話郎指花盟。隨蝶風吹去。

拾花

誰箇惜花殘。儂拾殘花去。花亦感多情。傷心淚

爲語心粉溼瑩瑩。猶帶宵來雨。今日惜花人。他  
年落花侶。紛紛秋雨時。花淚彈何許。

贈郭山人

有客惠然顧。如帶空山來。客去山不去。風泉滿  
壑開。我後訪此客。別有奇山色。忽忽仙花飛。清  
芬徹肌骨。我問客見否。客曰空無有。一片白雲  
來。恰落松間酒。

江望

烟低白門柳。片水遙相望。與

後願添千

里長。虛負溪頭雨。雨彫殘霞外。蒙昔贈蘭皋佩。今  
來污劍霜。去風欲寄語。夢冷江花光。

憶宓章紀夢

一自君辭去。蹤影無尋處。君誠江上萍。我則庭  
中樹。萍飄樹常在。雁足君何愛。使我陰幽心。霧  
縠風綃帶。南越西秦馬。繫遍垂楊下。天涯旅壁  
間。夢筆半題寫。魂斷竟莫尋。況思來好音。我本  
舊游客。桃花何避溪。

贈雷秀泉

自集 卷一  
我生勞攘攘。斬有幽奇夢。予非信夢人。不信輒  
神動。以夢合素心。迷根頗不重心。夢兩相吹清  
風。引厓洞七情八識中。吸吸金泉控。忽笑知慧  
人。乃爲夢。愚弄屏去不復思。恐作心兵。闕此後  
夢復來。總眎癡田種。是吾意中影。消息影中送  
并影。且滅沒圓混無鍼縫。子非通玄士。語語何  
淪痛。指點前世因。吞吐寓幽諷。如我夢神側。爾  
神亦與共。夢中竝無爾。時爾何妙用。予殆非迷  
者。聊且託迷衆。月影落寒淵。淵寒影亦凍。淵底

春風生輝躍。長鯨縱寄語。雙碧梧。養葉遲。威鳳  
素無烟火情。久厭陳虿甕。感子一日談。翼我長  
天鞿。夢授三分鉛。子授七分汞。願訂海外期。疎  
風演清誦。

古意

不與子同行。願與子同夢。隨子夢所之。定有飛  
花送。花雖一瓣香。幻結春情重。但妾夢來時。君  
將幻作誰。莫因妾是花。遂做妾花枝。花老枝相  
棄。棄成樹下泥。明春枝上發。別是一新姿。

隔舟嬾語音絕麗

音麗比笙簧。世誰王子晉。或以方鳳鳴。鳳鳴未經聽。如彼隔船音。笙鳳評難定。夢熟乍驚醒。玉漱風泉映。所恨醒稍遲。寥寥語將竟。急急起竦然。聞止餘半語。矚恍惚。追其偈子絃。沉音靜。又恨吐音時。老婢聲雜應。知音世果希。音亦自宜恡。險無隔舟者。爲此夢來境。

有迷

白雲在山下山巔。復雲行奚特。山之巔層層逼。青溟山下豈雲色。見者目自盲。君子藏至辱。所以盲世睛。極望水天混。行窮界自明。馳驅仰目眎。宵光亦星精。酸風落枯楊。安知春內生。萬錢珍盤最誤人。志士莫戀縷。縷情非是知心味。總屬嗟來腥。何味可爲殮。吾將兩味陳。不是西山千古蕨。唯應鮑子一盂羹。

江月

江月千萬舟。一人懷一求。唯彼閨中人。對月共此愁。月照愁夢魂。箇箇離樓頭。夢行不知路。隨



意吹悠悠

三星橋

爲過三星橋欲叩三星戶飛槎幾百年片石行人誤花洞風揚沙欲度沙昏樹醉夢接羅倒思憩前邨住白鳥棧雲來如笑復如訴知我心忡忡迷失生來路一響洞簫微入肺金莖露拭眼忽光明半巘亦開霧頻年野馬逐一夕聞香悟回首桃花天故鄉開處處

飲馬

溪水流路旁厄爲飲馬槽何物馬上人意得秋風高俯瞰溪水急照見頭臚焦霜雪去芳顏血退雄情銷春草舞游蝶覺我心意勞洞壑歸白雲帶我心飄飄

寒途

客屢心逾淡高功一飯炊何苦好膚髮枯白西風泥風起山俱夢霜濃樹列皮況此孱病質能無粟堆肌雞聲望墟碎日午饑殞悲驢耳竦然立垂鳴訴瘡痍呵氣接嵐霧鬚根落冰鞋遙憶

綺樓人此時何所思

良鄉有蘇廷用者以一見偕步塏下坐語

山頭此山出火石

鄉以孟良名塏存孟良跡何處不堆塵獨此環  
秀石煖步易輕絛枯楊澹春液所羨隱君子藏  
名畏人識琪花豈不芬人世無香色石火胡熒  
熒月明蕩空白

丙辰元日

是日檢蓬矢四五初交始壯滿衰將來海闊風  
方起呼酒欲忘年所恨髮朝理髮與山霜狎霜  
依髮棲止除夜請吉夢乃夢落一齒若云犬馬  
齒十年又一紀可笑功名士日日勤屈指日久  
爵日高一指屈一喜眎日等視讎惟恐不如駛  
旣乏長繩繫反促羲和尾我竊有心期所期不  
如此

旅店夜啼兒

此子胡夜啼憂腸是何觸今日且毋憂他年真  
可哭豈帶蓋棺淚爲訴前生辱或以悲世人夜

夜悲不足寒熱風雨時三百六十宿參差傀儡  
相絡繹貪癡慾徧贈無言聲宜無收淚目彌勒  
笑嬰兒啼啼破萬古愁笑冷千秋局

寄李伯玉

羨君紫烟客執靶隨虎車貶眼攄素襟相得逾  
雖渠三載如雙蒂共植桃梅菹一朝灑然去含  
情拾紅葉撫背無話言期我於方諸此期容若  
必眇眇徒愁予我懷在遐方片月開虛徐把酒  
玉人依稀接霞裾匹馬從天來投我咫尺書  
相要千古心隻語傾琪琚兩人如晤言懽忻復  
歔歔君有度世訣胡以挈淪胥難脫棘中綿終  
棄道旁樗爲言千里人顛頷望龍嘘心期幸無  
負吾亦賈殘餘

憶爾行爲馥儂

有序

我輩豈不及情者迺別況直可謂寡情  
豈吾心哉惜別者勢不可畱依依握手  
低回眷戀不如速別譬垂死者勢不復  
活奄奄一喘反覆呻吟不如速死釜魚

熱迫而旋則反若喜哀狷啼極而暗則  
反若笑可憐之情有不可白於爾者作  
憶爾行以自見

憶爾碧牕下深秋服輕裳援手覆爾背爲言益  
新涼垂頭不能笑欲言復徬徨左右眇然盼寒  
衣撫紅芳珍重此宵意有盟何所將悲風動寒  
壑社燕空雕梁飛鳥戀相識人豈忘故鄉我心  
逐天外撫劍徒勞傷勞傷竟何益生死復難量  
超搖遠凝睇青山自蒼茫

送別

代小壽

送子上舟去淒風透眼骨不敢近舟邊遙傷衰  
楊立舟近一瞬過稍遠餘半鏢歸來燈已盡草  
堤月痕白可惜月痕新枯顏照無色

張念餘五十兼祝誕子

九華發靈雨瑞色盈焚楹主人托夷遠傲骨兼  
瓌姿摩空困秋風鵠隱藏芳蕤養生有至術何  
必捐縑絺玉匙守神庭何必舖松脂半世遇黃  
老初艾生馨兒奕奕飛神光照社何離奇犀錢

分四坐寧獨沾瑠飴

畫

雙雙白鷺鷥取世無邊景護月曉烟清夜宿深  
盧靜睡起聽棹歌萍開啄花影莫羨冲霄姿風  
光各管領

有女行贈來君

有引

日與姬約而姬日病姬愈而予南行予  
歸而姬嫁矣

采藥來芝田有女被霞裳清神發素襟羅襪生  
紅芳顧影月欲墜臨睨飛暗香恍惚不可卽此  
意空傍徨

謝志

愛子都且文未爲人所識周旋善行酒清樽映  
顏色湛湛雙目睛復能檢緝帙子猶二六餘勿  
用多羞澀

寄潘景升

鷓鴣畏秋色切切鳴如諶盲風吹鬢毛霏花入  
羅衣星落逐人去山渺情何依寧如意而子翻

入青雲飛

其二

雞林誤良夜月出埋清光歸鳥夢俱遠楊柳情  
共長有客南方來刀頭帶鉛霜挽馬問消息片  
言斷肝腸

勵志行有贈

彩劍故人贈切玉錐斷沙馬飛壯人意青尾搖  
山霞于役周星紀音絕如無家欲發千秋志莫  
顧三春花丈夫非風霜何以顏髮蒼人生最足  
鄰年壯容菁芳

賭命行

人望施恩至我期施怨來報德于黃金我貧無  
貨財止有捐軀報此軀非我骸狹路逢讎士士  
避我如豺我有一壺酒挽之飲一罌我非媿子  
心勸子無疑猜士飲心肺熱誓感承不衰昔日  
捐我軀無以報涓埃今日涓埃酒令人言永懷  
自古廉藺交每從怨毒諧

贈阿鳳

西津有佳人，嬾笑常斷齒。不勝金爵釵，垂垂得  
風起。回身颺六銖，輕雲散千里。攀條立高岡，黃  
鸝躡纖指。生愛清秋色，月光常在綺。促酒趁風  
露，深坐忘肌理。激楚言上蒼，飈塵素所恥。儂無  
桃李緣，涉澤尋芳芷。聽歌黃雀行，流涕不能已。  
誰作捐羅人，翩翩縱飛止。

途中懷慈甫仲因

兩神通夢寐，勿悲各一天。爲我躬秣馬，感子手  
加絲。千里常珮結，一樽臥芋眠。相向匪藐盼，共  
此明星前。

夢作天邊遊，寤懷原博子晉愚公

常夢飛上天，今日果飛上。青帝牽我裾，摘花兩  
相向。諸仙皆舊識，一晤情懷暢。灑酒散輕烟，淋  
漓起層浪。龍潭與虎嵯，幽險列雲幌。來往雙飛  
鸞，稍異畫中狀。吾有今生交，素許有仙相。我今  
天馬行，瞬息周八望。胡無一友遇，知落輪迴障。  
或是地行仙，暗風走虛曠。

贈潘景升

有引

自壬癸二年日與景升集張園一別三  
易寒暑丙午春于虎丘秉燭相對時幼  
于之薜幃徒罔侯雙之蕙帳已空千里  
能晤言廬井迴隔世矣

羨子長筆才琅然灑清製晤對千古心片言展  
幽翳世人苦有情相逢總霜帶唯子可與言臨  
風感危砌

其二

緬懷松石下揮涕摧心肝千里故無恙樽酒論  
悲懽披顏動清彩皓月來林端燠寒非所云垂  
頭思季蘭

古意

一從下粧樓十遍走長廊手摘同心草可憐明  
月光羅髻整且側短衣溫復涼爲撲雙蛺蝶驚  
去紫妃央遊子萬里遙玉關多夜霜臨風憶驅  
馬何時過瞿塘生死不可知含情刺征裳知君  
沙上雁知妾曲葯房小姨采蓮歸告儂冶遊郎  
蒙耳不敢聽推簾顧青棠



遠書至

一自君行後經過幾斷腸  
偶逢書一至手戰喜  
爲狂持緘開復合百遍走迴廊  
惟恐讀易盡徐  
徐不敢忙每讀半行許書長  
讀兩行指摹書畫  
好鼻嗅墨痕香借因思入夢  
臥來枕底藏

悲幼玉

別子彩雲飛悠然淡千里  
一去不可尋清覓夢  
不已頓足無人處回身暗風起  
好去莫怨嗟佳  
人自應爾

春盡

愁醒更愁夢送君兼送春  
春行君更疾君行春  
後塵藏春入懷袖春欣得所親  
君胡帶春去畱  
我悲蕭辰

送北游客

秋風迫行李馬前鬱山花慨慷意  
氣壯晴嵐鬪  
才華虺狐避道側寶劍揮明霞  
疎密兩岍樹杯  
前天一涯

古意

妾意鳩鷓鳥秋至聲何切君情嶺上雲目極虛  
中滅躍馬萬里去腥濺刀頭血莫誇一戰功功  
去鏤亦絕

手藉代贈

君心無點瑕願常如此白君身無遠疎願常如  
此密君情無解散願常如此織可憐一片絲剪  
斷不成匹

柬二

吾邑有仙吏雄奇出宛洛氣槩旣疎峻心襟復  
澄豁秋肅震狐鼠神才逼岑嶷揮塵掃煩務談  
笑走飛藿上館邑人士枋鷓附緱鶴衰腐衰芳  
醕愛日煦寒籜納響有明誠清風拂林薄寵命  
自今始名聲動天末

其二

撫劍獨慷慨停杯復投箸廳徑泥行邁鄣顏閔  
乖選才華愧仲宣倒屣辱禮數傾蓋千古情賤  
眼授心慄河陽羣葩發援手撫荷芋埏埴桃梅  
蒞宛轉翌秋步蕭艾起枯壑澹沲飲金露壯士

賈鈍礪實首酬知遇

題蘭別古白二首

蘭乎果欲去分我瓶一枝同根猶可分同心奈何離瓶水分江滴分時亦足悲相悲自相愛莫令無根危

其二

蘭將舍我去蘭香欲何吹吹去河之汾笑我江之離江離勿相笑心儔非爾知琅琅千里風渺渺何容辭

舟中述

雨散烟朗朗氣煖人醺醺岍樹住還走點鷗互復分蠅紛命脂遠蘭美停香焚明波舞簾繡高几飛山羣鳥聲古佳句魚旋奇草文日渴亟飲海意遠思乘雲彼美何人斯我懷對誰云

兩來船

來帆復呼風不知去緯苦及是去來船船子同門戶問彼何薄情彼云互鼠虎旣苦風與波寧復肺與臍君亦風波中試際江之滸聊復呼天

風波窮竟何補

題顧振溪尋隱圖

開畫何所見先見青山巔孤亭渺天畔疎雲澹  
秋妍漸見山之隈屋樹鬢相連野鳥餐柏實空  
邨鬱松烟山人喜帝都牧兒席牛眠青山非罕  
物難乎有山緣顧君軒冕客悠然習臞禪青髮  
酬知遇白鴉養元田畫此列清供聊以祛俗羶  
未卽入山水山水常在前予見此圖景宛如舊  
遊然與圖旣相識與君遂忘年披圖望君笑翩

翩吾欲仙

壽孫貞媛查氏

邈矣查令娃生長貧士家所天亦貧士惜乎才  
則奢才奢命何天父貧年復老毀容誓以終難  
苦同食蓼素帷二十年悲風泣寒蟬枕上積雙淚橐  
中無一錢凡彼未亡人倚子終厥身如君竟奚  
倚舉面聞無親依棲老貧父父愛亦莫助家無  
半畝宮寒暑不出戶貞媛世所有君則誰其醜  
天乎抑人乎酬君以多壽

七言古詩

雨中登虎丘

小艇噤吟酌飛羽  
兩人大醉相對舞  
一呵四面起濃雲  
灑出淋漓滿山雨  
我見珍寶踉蹌到人  
見刀鎗不敢冒  
衆人見我胡盧笑  
我亦適然笑人笑  
登山恍覩生公蹟  
茫然不認千人石  
青天白日皆無光  
萬壑千厓盡有色  
棲鳥咽聲不敢啼  
密陰松底彈圍碁  
和靖書臺得幽爽  
闔閭泉墓始慘淒  
樓頭殿角蒙烟冥  
珮環響杳唯鐘鈴

常恐雨歇衆人至忙遊去屐衣榮榮努目金剛  
變色浴水蛙僧忽雅逸林木盡見本來面山頭  
洗出天然骨醉起復醉醉還起坐聽淙淙政未  
已木葉芭蕉沸耳鳴嘈然執樂三千指

中秋懷子宓

有引

中秋前後十日大雨雨中帶笠登虎丘  
是夜新霽見月坐石行酒忽有所懷黯  
然者久之

八月初五月如醒懵懵數日猶不醒我來虎丘  
一大叫娟魄幾死得復生腫臃漸出東高隅山  
樹離離幽且清遊人數百如塵來折花遞送飛  
雕甍柏梁盡罷鴛鴦夢鳳釵龍佩何鬢鬢此夕  
不必王司馬歆冠據石多風情吾目不遠又月  
下澹蛾雪面皆瓊英聲律不閑且深夜笙歌俱  
出夫容城衆人歡呼我咄喏悠然惟覺秋蛩鳴  
千里與卿共此月此月不共吾與卿

劉受初立夏日山中一宿而去

五載相思萬重積月華遞夢千山寂夢午邀君

君果來果來恨是春歸日蚤起送春春不去臨  
去依依贈相識日日離愁薄命春一解離愁春  
去迫賣去春光買故人一刻千金買難得山中  
相對山無言此日看山更蒼碧爲君花下傾斗  
酒斗酒傾情五湖窄君不飲莫嗟惜千里樽前  
須努力何處豐茸奪秀亭咿嗚催去雲中笛銜  
風灑別勿言淚霑衣空翠林間溼

齊王孫水竹居

小結齋居題水竹秦淮闌渡成空谷楚楚風前

立少年蕭蕭檻外彈清竽碧葉翻書舞篆文粉  
枝滴暈滋牙軸往還翠鳥流圓紗素潔青童具  
野菼水依楊柳情自偏雨得芭蕉韻相屬笙簫  
畫艇颺雙鬟屏几冰綃挂六幅座多國士祛榻  
塵草擁王孫滿階綠照骨彊環酬短歌刻詩簾  
押催官燭浣花紅瓣濯霞裾焚麝輕烟飛霧縠  
墨彩紛披紫石潭情豪寄托青州麴上林色借  
何蕭蔘花萼香吹轉芬馥野人竝得嘗君羹故  
識無妨加帝腹

夢偈東從實師 有序

無酒昏神迺忽生夢無物攪睡迺忽還  
醒忽一醒來此身不識是公卿是乞丐  
忽一夢去此身不識作螻蛄作神仙從  
想結意從意結形然想固多夢夢或想  
外者因牛見馬因馬見蓋然夢不盡因  
因反無夢者言語怒笑便卽夢魄否顛  
倒飛揚便卽醒境否未知死只緣未知  
生則未知夢當是未知醒迺作夢偈

一夜夢爾爾夢我爾我夢中必不同儻有萬人  
夢爾我爾我對人必萬狀及至爾我相夢時或  
萬人中無一遇豈彼萬人無一魂爾我兩人有  
萬魄爾我萬人倒轉看無一有萬復如是

復渡金山與慈航臨江對月

六載相思指一彈千山夢隔江漫漫相對相驚  
復相笑鬚眉頭顱俱改觀少年雄心半忘去難  
忘富貴因所歡奇懷何事道寒燠世外姑勿談  
波瀾江天極目了無辨山色雲氣交相蟠白影



空中大如豆如鷗如鶯飛翾翾兩人深坐忘肌  
理朗然皓月來雲端倒懸萬丈文犀劒斲斷碧  
空秋水寒

同汝章原博文綬坐平遠堂

風扶兩腋臨高臺狂吟噴露銷芳埃分付雲霞  
更爛熳美人在懷尊酒開斜斜整整琅玕杪堆  
堆索索石稜小童子相呼萬壑傳數羣鳥影歸  
空窅我將揚杯滌太清夷然談謔開奇情四圍  
極目喜無礙猶恨遠山一帶橫溪光擁起能翻  
坐笑展桃笙張紫邏美人薄醉歌清商拂衣欲  
上明月墮

爲岫雲舅招魂

大塊一抔土人生藏其中生一土中夢夢一土  
中蟲鏽穴有餘地甌石謀心胸縱積太倉粟難  
期百歲春爭爲兒孫効牛馬兒孫視作馬牛功  
功出自人人知感牛馬功勞誰記忠君無子孫  
因客死死客非皆無後翁子孫帷蓋埋狗馬旣  
得帷蓋他何庸原是土蟲復歸土何須辨別土

西東生慙貧賤誓不返才固無能志自雄他人  
富貴夢中樂夢醒回思雙手空君但一宵無好  
夢雙手今於富貴同今既富貴可以歸歸計無  
難一片風心竟骸骨原非屬莫因遺骨羈魂踪  
郭璞墓望江雲膚寸而散如海鷗鳥

郭公墓口江波漩百折江波墓口嘯潮平石靜  
草漪靡寂寂清魂如可見揚樽慷慨情無限風  
輕五兩歸人倦晴雲一片起空山白鷗萬點飛  
江面

歲朝

歲朝人人俱試筆我亦搜索詩人脾張膽欲作  
風雲語胸中苦乏豪傑思我有幽懷寄囊楮此  
日又禁哀惋辭半日躊躇竟焚研大家共醉瓠  
子卮

送楊將軍

羨君羨君擁牙旗羨君羨君橫犀毗左旃一舉  
乘赤豹復虛右席兼文狸願君焚卻埋輪辭願  
君製得歡喜詩歡喜歡喜明王詔離愁離愁故

人思長揖送君醉上馬還憶當年干策時

晏如居士歌

長洲亦有陳仲子自號晏如居南里可笑肉眼  
不識人共指里中晏如爾晏如亦自謂平常我  
謂晏如非常士我輒揚揚見晏如頽然自覺形  
骸穢晏如室中虛無物一片明窻一張几寒熱  
風雨不出門鵲尾爐前讀子史讀至子長倉公  
傳拍手歎曰技至此尼父執御我安執我之所  
執今日始禮拜倉公爲導師倉公受之爲弟子

弟子不必不如師三月秕糠化精芑晏如本自  
貴介兒視已貴介如垢屣一生漠然無所好但  
好日高不梳洗與常在酒酌無多有時迂獨飲  
不已退然鎖口衣不勝慷慨逼人輒疊疊人問  
胡爲號晏如我識晏如號所以晏如固自平常  
人測彼胸懷無涯涘

雪中與古白游馬鞍山

船中一夜聞飄蕭起看舞雪何天韶一片雲烟  
若塵土千家瓦礫皆瓊瑤天有狂風吾有友風

起驚濤吾有酒翰動如飛筆有神滿天風雪皆  
隨走次滲次滲兮狂風益翻瀾幾欲傾舟膽不  
寒盡日不見崑山到推簾極目如泥丸泥丸如  
豆忽如拳拳忽如斗知崑山崑山固是小塊壘  
近看此山山亦偉山頭大小無數石有立有拜  
如奇鬼踏奇鬼登穹崇婁江盡在酒杯中酒杯  
自大婁江小吸盡婁江無醉容興盡下山忽已  
暮山色漸解琅玕樹水面晴雲似白鷗天風又

送人歸去



國家圖書館, NATIONAL CENTRAL LIBRARY, TAIWAN, R.O.C.

自娛集卷之二

長洲俞琬綸君宣著

五言律詩

虎丘五賢臺坐月

此夜停歌吹飛濤雜樹鳴  
酒淮供傲骨陌綺護  
芳名濡筆灑空翠解衣藏  
太清風流如往哲肯  
與共高情

訪小四

晴靄溪光發橋西一逕通  
問緣窺玉案尋夢入



珠宮花落臙脂雨琴翻蛺蝶風任他迷渡口無  
意覓歸鴻

述夢

汝是離魂女如逢夜渡孃好緣催夢合何物肯  
情降半臂凝紅玉全衾護粉香多情已多恨勞  
汝益愁腸

感孟珠二首

遍覓舊遊地淒涼無過茲病人多恨處死者正  
芳時難合鴛鴦夢無言鸚鵡悲歸來秋月好寒

影特相隨

栽得春花好其如春老何生前爭色笑人去獨  
悲歌對面重泉約含情一鏢過世緣君已謝畱  
我任風波

錢功夫

一片煙霞骨生無世上塵才名誠國士談謔有  
詩神梅色寒塘古松心子月真忘機隨是侶何  
必問吾親

懷慈甫

惜別谿橋下睽違復幾旬有愁春黯澹獨酌酒  
逡巡戶外交方語牀頭夢故人西山草已綠朋  
侶促頻頻

同慈甫過竹亭是時將別彼此愴然

山晚禪堂靜客來宿鳥啼月痕高樹杪梅影畫  
牕西語寂壚泉沸歌殘石徑淒良宵頻換燭別  
恨不須提

又改前六語山晚禪堂靜陰寒滿竹谿鑠煙  
林半沒報客鳥驚啼雨寂聽茶沸歌高入徑

淒

有懷

花事從春了愁懷與子分篆煙疑舞袖鳥影亂  
書文情遠呼歡伯詩成對此君醉來千里夢仰  
面送流雲

別錢九淵

交久驚言別情深畏問還匆忙行客意慘淡主  
人顏月落蒐俱黯雲漫淚亦潛班荆無限恨明  
日隔寒山

贈楊紱

草陌留春宴清尊對素娥亂英隨坐落笑語恰  
涼過剪水酌歌苧欵冠枕繡羅卻愁來夢杳奈  
若此鄉何

歸度金山

巨浪迎吾棹蘆梢掠水閒野鷗空影落行客慢  
歌還夢托澗溟外身疑霄漢間半舟香霧遠想  
已過金山

過栖霞

極目栖霞在層臺貼水平江波千頃合煙雨一  
舟橫野鳥懷沙度青山伴客行浩歌追往昔慵  
向石頭城

壽劉山客

與君共淪落行樂且隨春樹鳥能供語谿桃爲  
布茵面山于世隔對酒覺吾親只嫌多識字難  
許葛天民

郊外遇故人

別久叙情長鋪英衆草香鳩聲催雨急松影拂



衣涼晚食餐魚婢邛酤醉酒孃細聽僮輩語亦  
解說衷腸

與譚文長晚坐昭關

散髮坐昭關居人招渡閒勢吞鯨背浪雄夾虎  
頷山雲氣天門合蘆聲漢使還奇懷無可道聊  
與共疎頑

集劉子真齋遇徐姬

乍對不相識徐思似有情杯前交一面花底戀  
雙睛倥偬驚新態含胡問舊名影寒冬夜燭牕

雨復交橫

棣棠

花色猶如昨低枝漸出墻趁風忙度影殢雨欲  
畱香寂寂春誰買娟娟意可傷去人飄泊處比  
汝更淒涼

小翻醉

年少多癡態情來醉若耶歲蕤羅髻側和夢倚  
闌斜雨腋春風柳雙頤玉洞花翩翩雲際渺欲  
借掛星查

席上

僦坐明軒下楊枝拂面吹旣逢能飲客更得有  
情姬慧鳥偏銜蓋輕雲恰過溪遠山皆入坐滿  
目送新詩

風蘭

儷曲天成態春風引佩長寄空懸蝶夢倒水混  
魚忙葉葉宜飛雨枝枝向落陽門前渾不見入  
徑忽聞香

日午過陸姬姬猶擁被未起也

過問君何況新蠅繞戶飛素幘知曙晚霓蓐得  
寒微好事初離夢薰風幾促衣君知墻外否花  
柳正芳菲

友餞

良晤應難再相逢且破顏泉催花逝壑鳥喜客  
歸山好景閒中會遊思醉後還程途不可算把  
手入前灣

戊申除夕

過歲真如夢明朝復夢初徑無東郭履遽是漆

園廬客去餘殘釀貧來惜費書人人欣送臘我  
意獨躊躇

江行

一葉飛江去移時渡十洲雲根垂苜幕屐脚舞  
琳球捉風易搏鳥破濤疑狎鷗橫江來返照偏  
枕玉虹流

與文彩

遐心當始別製我芰荷衣寘夢飛翰遠江湖利  
檝肥月隨流水去秋伴客愁歸贏得多情妾能  
爲亂草晞

寄金際之

相約梅花後相思過海棠清風傳錦字細雨望  
牙檣伎閣香餘暖西山色正蒼知君尋友夢把  
酒問吳昌

舟中夜別

兩水分何急寒林一望斜沅湘沉夜月簾薄灑  
春花濁酒催人夢離情逐槩牙莫言千里隔相  
對已天涯

秋怨

秋到愁懷甚飛花達暮朝酒春羞暈頰歌韻怯  
風腰繡被和香卷疎燈背影挑牕前時破夢樹  
隙響刁調

夜坐

獨坐禪林爽蕭梢歎寡儔亂蛩賡夜讀孤雁數  
更籌月夢千山遞雲心一水浮欲求逃恨處不  
數醉鄉侯

答顧三

交情非落落蹤跡恨紛紛十日聯中聖三秋半  
夢君迴腸環似月往事疾於雲桃竹頻勞贈益  
笥錦繡文

贈倪仰山

相逢方恨晚知我若平生客久鬚眉古交疎肝  
膽傾君非能眼慧人自有心盲物色風塵裏誰  
懷千古情

吾品不自辨君能識我真膏肓多笑疾肺腑有  
清神落拓人能恕迂疎意自親相期襟槩遠呼

酒脫綸巾

緜園

史氏

冶游兼撫昔惻惻意何長  
鶴去示僊影劍埋留  
古光花風吹綺繡琴壁響  
篔簹不道煙塵裏清  
妍一故鄉

齊饑

急行惜疲馬停勒歎居人  
千里煙虛突平沙晚  
遍燐藏獲無白草歸雁泣  
寒闔可得天高處臨  
風一損神

新城雪道曉行

平野江光寂寒飛劍色雄  
月裳鴻帶遠雲絡馬  
行空墟落垂珠樹胡妝倚  
玉籠莫愁塵境苦今  
已在崆峒

王子顯別後

惜乎人意渺歸也雁分行  
夢魄吹還月秋情逐  
去雲遠書欣欲見病況苦  
相聞日日常如醉非  
關寄夕醺

伐樹

絕古千行柳何官植道旁若爲儲大用今得濟  
奇荒皮葉當南畝椽株送北邙若非經翦伐何  
以識甘棠

家園樂

家住河橋左春風柳萬條對雲心欲上開卷目  
辭勞妒夢吹檐馬懷仙看紙鷁郊游正有約牕  
雨寂芭蕉

余峰同飲釣鼇亭兼志茆山之別

亭在鼇何在千年釣不休濤光星餌動增影月

鉞浮膾出江妃手醅來海巾頭送君分一箸直  
飽到浮丘

歸途風雨

陰晴俱有故勿作偶然猜勇退雲霞起違初風  
雨來病途拚舊骨春事愧吾懷合日猶堪樹前  
行又釣臺

壽徐日方

日方去故里廢故園灑然作秣陵人疎  
植竹樹小溝池塘竹樹疎喜無白鷓池

塘小喜無驚波長日枕書通宵換跋青  
衣勸酒白練徵詞胸中殆不可測

始作長干客風波歷已多陶情三昧酒慨世五  
噫歌雲物題詩帶豪華擲影娥平生性夷遠非  
以傲煙蘿

促朱亭玉

喜母蛛也  
野娥蝶也

我欲探君病其如亦病何遣懷吟輒罷索醉飲  
無多報客看喜母尋花問野娥心期雖有日良  
晤莫陸蛇

李二華小照

酷似先君子風流絕代無文章多笑謔骨相亦  
清孤日醉羣書圖閒評十客圖其誰能與匹當  
作晉人呼

海棠

獨立欄干外多君共暮朝歲蕤憐並鵲宛戀約  
雙翹醉月愁來醒畱風病益嬌一從歌舞去誰  
復念無聊

感焦家玉蘭

去歲新栽得今年已過墻枕邊偷遠夢牕外立  
嬌香戀月枝枝畫垂風色色涼有開應有落何  
惜剪春忙

北客春晚

花催三月盡山際白雲漫密樹藏期約輕風送  
所歡人言隨塞遠鳥語憶江寒極目高樓望飄  
飄雙舞鸞

別印六二首

三年不見汝儼作小摩尼固是青霞骨猶然白  
玉姿演琴雙燕舞坐雨百花垂可恨秋風動蕭  
疎江有離

促膝談前事三秋紀夢長山透琴韻轉牕暗竹  
陰涼小鳥含芳蒞輕雲落素裳好緣如可再祈  
盡紫茸香

五芳去

交澹情無已臨岐首欲垂空閨憐影處夜雨夢  
君時樹外看山盡蘆邊與雁期兩心唯自解無  
處說相思



楊柳枝贈朱太玉

不爭桃李色偏助賞花天  
葉葉含風笑條條帶  
雨暝魚疑垂釣線鷗得  
襯沙綿日惹無情惱驪  
歌唱水邊

秋葉夜棹別慈少

秋葉辭柯去輕風送客  
稀醉花香入酒坐月冷  
催衣意托冥鴻遠情憐  
飛鳥依一聲歌闕後慷  
慨事多違

悼范七

七纔十二歲麗色妍態已壓  
倒名下真花中金步搖也  
予一與識面卽往攝山  
秋初復訪之而七已死矣  
施肩吾但看日及花唯是  
朝可憐已足淒感迺芳未  
流而蓋已罷又不止如薜  
華也

尋夢江天遠招魂淮水頭  
昔時多一見此日得  
千愁媚眼空留月花容  
蚤謝秋寄言歸去燕莫  
想舊時樓

詠月

哀猿啼處處千里鬱茫茫刻影花情亂含情笛  
意長借風窺繡榻扶夢出紗牕畢竟無情物催  
人速斷腸

慈航雲谷言念六載矣丙午復渡江相對  
聲價猶如昨鬚眉已偉然素樽千載夢片語半  
江煙度世求真訣看花問少年盤紆數往事雲  
影自孤懸

山間

醉葉空庭亂悲禽遠樹深名詩題秀石總帳結  
瓊苔山半橫煙帶亭西曲水迴釀成得意酒何  
日美人來

與倪馴之集在歌館

自信多邪癖知君解佩萸笑回暝柳夢春鎖畫  
屏紆看帽思投權聽歌想綴珠醉攜香滿袖日  
落上蝦鬚

癸卯雨花臺遠眺懷幼于

因竹看山鳥相思政落英雨花吾地月曲水異  
鄉情思渴途加遠神飛夢亦輕登高憑望處日

日得濤聲

燕子磯

漢室英雄事秦淮黯淡秋波濤江咽口煙雨石  
籠頭古樹傳猿嘯懸厓釣客愁遙看雲數片冉  
冉落蘇州

客燕

流光看冉冉草木已春酣歌齒風無緒愁腸苦  
自含人言俱塞北鳥語獨江南莫向前溪度陰  
森不可探

清明日西山道中

此日遊春莫山輿夾岸呼酒帘邨市密蒿徑紙  
錢鋪花氣籠魚鳥人煙逐鼠狐歸來疑雨過聚  
淚濕蘼蕪

渡江望方山一帶

風疾帆揚半飄飄御六鷗樹欣新沐雨雁識舊  
棲洲峭壁銜霞赤奔濤抱玉浮追思疇昔事呼  
酒讀離憂

飲木末亭紫薇下

初得秋光好登臨物色饒入懷風與月遇飲晝  
連宵小鳥銜香蓓名花著紫綃高情應寡調每  
欲委山椒

新識俞羽侯

窮愁逢雅客相對任吾真調叶敲歌扇神飛落  
醉巾書空雲潑墨席地草鋪茵偏趁風波好天  
容作浪人

與徐子

憶昔分徂兩何緣見所欽擁鑪寒夜語秉燭夢  
中心鞬得離弦箭牀餘纏臂金分陰真可惜莫  
厭酒杯深

燕子磯夜坐

夜坐獨呼酒清餘燕子磯浪紋和月卷山影帶  
霞飛雁落深蘆暗魚濺暖浪肥歸帆吹片片天  
外舞雲衣

有悼二首

共帶當年約君胡先我歸媚花含唾石舞柳泣  
容璣人字雲中草魂香枕上依風光如有意肯

許一羣飛

憶別當秋暮相悲及瘦年因緣誰問杵狼籍有  
遺鈿麗曲山頭響雲裳水底眠縱遊天外去何  
處挾飛僊

子秋入禪

羨爾回頭蚤青泥忽作蓮因空能厭色觸味已  
通玄醉少風流坐情餘文字禪溫柔鄉欲老還  
訂白雲緣

寄友人

一從別爾後聊寄一枝巢夢少因無事情濃爲  
淡交深杯能具款長歛耻鳴鞘非愛輾涎樂其  
如嬾解嘲

梨花

獨立斜欄外嬌慵倚石幢鎖枝辭宿鳥含意入  
疎牕化雪流香韻臨風綴薄妝昔年曾對飲今  
日更情長

懷歸

風光久矣負僧諾此何期故是霞心遠同誰鶴

骨竒自來收棘刺好去結茆茨最可分陰惜飛  
花經意時

春歸夜

安寐忽驚醒三更春去初明知年易過其奈刻  
難疎花繡征衣懶雲籠步障疏推牕君已去杯  
露滴蟾蜍

贈某師

何心顧蠲忿此念在忘憂舉世無青目吾師尚  
黑頭馬填天易曉時讓我先秋敢絕長安望樓

西水北流

感別

二十年前路三千里外情翠塗塵樹老淚洗夕  
陽明裝薄雲來贈山長夢背行最憐飛倦鳥何  
處不丁丁

南歸客

長路興猶堪雖長友二三異花吹樹樹方語譯  
謫謫匹馬雲千嶺叢林僧一龕風光看不盡隨  
筆寄江南

自娛集卷之三

長洲俞琬綸君宣著

七言律詩

莫愁湖飲別

此渡空傳是莫愁，客愁無數泊湖頭。  
陰陰翠遠何家樹，忽忽聲淒甚處樓。  
枕破鴛鴦殘夢雨，竿分鸚鵡一江秋。  
曉來欲滯西歸櫂，共說東風不可留。

滕陽道上

翩翩雙轡友人俱景物相違二載餘馬上品題  
奇相樹碑間逢讀少年書山沉沙磧雲何在雁  
過人寒月自如何日清風眠碧落蘆舟不釣紫  
金魚

過孟嘗君養士碑

欲弔三千無一客纍纍新骨滿荒埃若令公子  
今還在此骨誰非雞犬材殘食已隨珠履去豪  
風猶挾紙錢來聽何碑下啾啾響陰雨黃昏鬼  
乞哀

新城雪道曉行

匹馬長驅曳素煙柳綿梅片滿林間點紅來遠  
知爲鶴纖翠浮空或是山萬頃玉沙書鳥跡層  
霄銀闕擬天顏計程今夕高堂夢靜野寒鞘月  
一彎

曉征

一聲愁雁過江灘莫訴征人行路難籬落掛星  
雞塞寂樹頭吹感馬鬃寒玉樓賦夢雲猶在瓊  
騎團沙月未殘曾憶相期湖水上可堪橫笛弄



江干

瓊花臺夜飲

相晤情濃夜未闌  
風吹狂興入雲端  
鐘聲宵渺天邊落  
樹色依稀屋外盤  
月作連袂供睡穩  
花爲小婢勸杯乾  
忽聞響出空山外  
何處雙雙和紫鸞

壽八十翁

門前荒野接春波  
睡美應誇安樂窩  
禮數不繩能嘯傲  
塵鞅無繫得婆娑  
年年詩癖吟猶懶  
日

日酒狂酌未多  
幻世浮塵看已盡  
偶將一笑托煙蘿

途寄蓋玉

一年履歷半山湖  
逐日情悰托酒徒  
別後荷花開也未  
寄來桃竹寫曾無  
千聲塞雁銜風遠  
一片江雲度影孤  
回首嘯歌憑一夢  
蕭蕭煙雨宿菰蘆

靈巖女

卜居恰傍館娃宮  
宛轉橋邊一徑通  
百疊水紋

自集 卷三  
旋月白幾枝花影入溪紅淺斟綠酒分蘭露小  
樣青衫稱柳風始信仙緣非浪說人間多自有  
奇逢

三賢堂

三賢堂上坐凝暉堂下雙懸黃鶴磯粉蝶颺風  
飄碎玉綠荷承水弄明璣秋生竹底斟螺髻月  
滿簷前卷伎衣散髮不聞山外事今朝喜與世  
相違

憶玉如

昔年竟體貼芳蘭今日徒珍錦繡端滿舌潮甘  
消病渴雙睛淚飽向誰彈千金共惜奔宵馬一  
顧悲鳴照鏡鸞漢贖文姬真盛事氣豪難洗舊  
儒酸

柬維揚徐茗玉二首

湖煙漠漠雨漫漫一水相思問渡難到得醒來  
猶是夢元非愁處不成歡晚鍾僧散林陰寂素  
壁宵分燭影寒滿逕落花吹恨去一杯蘭露獨  
盤桓

素昧生平夢已通  
芳顏大略可相同  
棲雲不返  
天邊鶴  
邀笛空  
來鏡裏  
鴻鄣目  
山山多樹樹  
愁人雨  
雨亦風  
風君歸  
莫渡南  
泠水流  
去桃花  
幾處紅

題弘濟寺

湖光收得滿秋衣  
才怯思將急手揮  
細浪躍隨  
輕鳥上  
破雲忙  
卷亂山  
飛鐘鏃  
十里風  
前鐵砧  
杵千家  
月下磯  
只恨有  
期人  
不至  
思歸  
非爲  
鱖魚肥

黃雨石南山祠

芸暉栽插萬松岡  
題滿名詩事紀唐  
垣守建康  
堂有美氏從  
江夏國無雙  
千秋風月人  
猶昨奕  
世茨梁草益  
芳香火南山  
神物護時時  
鸞馭接  
雲莊

虎丘夜歸

載酒狂歌喜漫游  
羅衣初試怯風颼  
白雲吞吐  
千林月  
碧水浮  
沈十里樓  
隔岬火光傳  
伎面挂  
墻花影亂  
魚鈎投  
杯欲作  
閭丘計  
不是隨  
行到

虎丘

曲水草堂贈侯雙

一亭曲水遶紅裙，醉發狂言惠紫雲。  
滿坐花英緣爾墜，半簾月色借誰分。  
無煩學態腰能舞，未必通書語自文。  
莫問風情曾解釋，共將杯酒費殷勤。

送陳玉海

燈前如夢接殷勤，夢醒還添別恨新。  
水逐片帆分夜月，酒翻雙淚濕文茵。  
多君禮樂追先輩，媿

我弓裘俟後人。自是休文文弱士，風華偏稱作儒臣。

懷遠

昔年君向月中遊，今日懷君已麥秋。  
片片海雲迷夜渡，紛紛花雨亂人愁。  
五更遞報占風鐸，千騎飛來督恨郵。  
自是心期天外遠，風光不敢問皇州。

江風感

長天白浪起，須臾亂沸空中雁。  
一驅閨月暗隨

帆去處房雲停與夢躊躇枕吹萬里瓊瓏玉淚  
湧千年纓絡珠可恨風波緣未已秋山何似一  
身癯

喜碧來

默坐遲君半里遙好風飛度玉春嬌  
牕前賀喜翩翩燕谿外迷人處處橋  
貼水新荷搖淺碧傷簷舞柳戲清蕭  
臨行宛約施檀髻爲問紅芳幾日消

子秋習禪

愛河今始脫沉埋秋蝶春禽莫浪猜  
貝葉直從空果會琪花肯爲助清開  
旃檀座上求羅筏瓔珞幢前作辯才  
指點不須彈鉢水前身元自月光來

昔年曾携孟珠登燕子磯坐石臺俯江流  
醉夢嘯歌者數日今復登此臺感而欲泣  
卽下舟去

當年曾是避風臺臺是人非萬壑哀  
水面絮雲疑浪壘杯前明月動人懷  
良辰半向愁時去好

句多從夢裏來一望幽沈千里色清魂何處托  
浮埃

有贈

晚風漾水山花落朱樓何處吹闌蕩一榻葦綃  
皺綠漪龍愁秀髮雙翹約杯間玉鏤語鶯流絃  
上丹纖嬌燕掠酒醒隨風倦徒蘭輕花細雨飛  
來着

薄暮新月

微微初月離餘暈竹上梅梢止一分碧案斜懸  
繼玉鏡青山徐度一絲雲浮來千里鷺毛東飛  
上雙鈞柳葉文太液歸風歌曲罷天邊畱得繫  
仙羣

子秋

一葉梧桐起夜涼半簾花雨畫瀟湘雙睛款出  
燕華慧滿坐驚看杜牧狂粒粒珠歌人語寂熒  
熒燐蠟酒杯忙問伊解得情幾許肯挽羅衣借  
嫩香

憶秋華喜

題滿縑細醉百場玉人一曲舞山香  
可堪良會更榆莢每遇佳辰罷詠觴  
憶爾長干頻入夢問君昌闔幾迴腸  
空江隔斷春來信南陌風吹草不芳

節兒新破瓜以襟帶索題戲書此

六街蕭鼓正喧闐初月今朝一線添  
睡去烏衣驚玉剪鬪來宵燭混朱簾  
香綃染處紅餘白翠黛攢來苦未甜  
阿姊當年曾似此從他戲汝不

除夜泊淮陰朱侯適亦同船相對驚快朱  
出梅花酒縱飲三日迺別

此時結勝大家忙相對鐙前話故鄉  
畱歲枕餘須刻夢報春瓶有一枝香  
加餐人遠頻投箸橫梨情豪更舉觴  
欲禱旃檀神是客逡巡懶與說衷腸  
右除夕

天涯今始作波臣景物如常事轉新  
杯酌梅花吾地酒岍堆松燼客年薪  
風塵未老占清夢淮水多情遇故人  
願止高堂拈手線扁舟載得有

餘春 右元旦

梅側有樓外祖所居處

看來一帶絮雲垂十樹梅花映小池  
白髮老人情更淡素心居士骨偏奇  
花多恰好寒輕日樹少連逢酒富時  
禁用隴頭橫笛事沉吟半晌不成詩

答攝山淨持子從實時讀書天開巖

性癖偏宜客侶單一枝籐杖獨嬾跚  
門深雲護千林寂巖曲天開五月寒  
萬法且從身外了一鐙還向箇中看  
自占半枕清宵夢始識前生學止觀



自娛集卷之四

長洲俞琬綸君宣著

五言排律

庚子過惠山憇漪瀾亭懷僊樓及謁諸賢  
祠

晚晚過惠山清風逗行轍雲根百尺高月射千  
秋結濯手知鬚眉尋源悉委折靜觀曲水閒杯  
飲寒潭冽霞影接湖山松聲繞珮玦餘雨翠嵐  
媚滴暈小蟬咽谷深雲意多林靜鳥音徹見道

自集 卷四  
慨流逝觀空忘凹凸烹茶漱晚煙假寐枕飛屑  
摘葉點漪瀾懷仙仰孤杰痛飲傲骨疆噴嘯窮  
愁絕散髮揖先賢相與盟素節

楊二郎善琴善歌不美而多態卽若若弟  
也

吟噓開蓮幕相逢覆髮時含情一把手對面欲  
交頤語出疑新燕嬌來儻曼姬明光催月滿淥  
水度雲遲婉戀重諧佩飄搖可借枝樽前數愁  
緒半爲卜花期

書扇頭贈玄仲家佛舍

一笑知英物長庚墜爾家奇香霏鳳幕靈景毓  
琪花照社神光動橫秋壯士奢犀錢天上錫麟  
玉掌中誇曾識之無字應吞日月華甘羅真可  
異報趙始童牙

登天池蓮華峰絕頂

身坐蓮華裏諸山擁翠遶松濤如蟋蟀陵鼻作  
蟬螿咳唾縣南斗馮臨釣漢查盤紆遊帝圃遠  
憶指天涯尊酒遲顏日羅衣卷暮霞花間雲氣

上芒履覺輕斜

和張餘子絡絲嬾詩

纔下蠶孃手還教絡秀拈鉤懸褰細細粧罷理  
纖纖腕力雙環重容華一縷滄風輪忙卷袂雨  
綫急梭簾芸麝翻文縠啁啾響玉尖髻橫驚翅  
舞絲絕巧唇添寂寞空閨况柔情托素縑

燕子磯南石門山之聚風處也從秣陵歸  
盤桓山下數日徐公子挾玉華至苦秋熱  
飲于石門華病腰兼有別離之愁神頗不

怡謀所以怡之者鼓興狂飲命歌者歌大  
江東去詞主人洞簫倚和華爲解顏曰今  
日惡得無詩爲予檢韻得歸字成十六言

雲影流江遠離情滯客歸樹高攢石劒煙翠濕  
荷衣雙峽開龍藏孤濤觸燕磯汀沙連海白潮  
水及秋肥酒有蘭陵美霞看碧洞飛玉人連病  
骨花蝶舞天機歌起蟬吟咽簫幽漁笛希臨風  
懷帝子隔水問江妃浪劈波光碎帆收暮色微  
豪情趁餘飲猶欲借星暉

同子顒渡江而北

山氣連江遠輕鷗撲霧歸沸濤磨石劒空暈結  
霄幃蓮碣題龍藏潮峰控鶴磯棹迎山月轉鈴  
吐塢風肥星落鼉靈躍沙明豹跡稀遠聲騰萬  
戶寒影列千圍壯氣傾淮飲奇情歎玉燄暗香  
吹膩鬼遙夢接容璣雲劈江南絮塵吹塞北衣  
悠然回首處鸞嘯入芸暉

城南聯句

有序

期子龜過予城南藉以邀諸契數人駢

集月下遲至夜分涼風襲衣子龜不至  
客半散去客有請從谿橋楓桂間布英  
散坐迺相與仰天放唵飛觴促句句不  
應觴出者浮伯雅篇成得十三韻客云  
美哉賦景絕會惜未作一詈子龜語予  
曰若然則子龜真不與是集邪

月湛湛於水樹涼涼作秋

聲

松影入谿靜

博竹

扉向野幽

真

曠色千里遠平望孤城收

聲

氣爽

噴林薄

博

吟空寄浮丘

聲

豪發酒杯疾情來

袂投

聲

僦席煖風露暢心失窮愁

聲

唧唧凜危

砌

博

颯颯揚清謳

聲

橋外故人去煙際輕查浮

聲

晴山渺西望浩水湯東流

真

陌草亂雲影汀

花隔漁舟

博

香霏渡銀漢暈濕侵兔裘

聲

醉夢

領清異飄踪任蜉蝣

博

側身謝飛鏡長此雲松

儔

丁未除夕

無年無此日情事兩年催爆火縱橫落瓶梅次第開擁爐寒夜煖對酒去春來佯笑從兒戲無

言慰母懷支吾言守歲人靜獨徘徊

園南室

園南有小築微尚學墻東地僻多蒼靄門低見遠空牕前煙散合几側石璫瓏樹出雲間寺鈴傳塢上風花陰環岼濕霞影落潭紅城外山如髻天邊鳥亂虹草庭圖茂叔柳徑塑陶公呼酒追前事奇情一夢中

傅子晉祖載寫哀

傅子豪於酒筭醪滴羨門野雲陳世幻閒月落

松痕色笑泥間爪才名石上龜老親歌薤曲幼  
子挈壺餐草宿留餘淚朋情重玉昆

鳳從滄關移居胥渡

蒲葦春愁在蘭若客夢何關門留涕淚胥水借  
煙蘿載酒臨風度懷人駕月過祇林堪辟跡凡  
鳥亦辭柯白苧裁歌宛名花引醉多千山封遠  
恨從此破愁河

再贈日方

濁世佳公子綽有古人風足步自高闊文章特

奇雄徵詞兩蛾髻勸酒雙玉童世幻委蛇度路  
難屈蠖通綠桐坐閒月碧沼窺長虹義俠真徐  
孺風流復謝公願締金蘭約詎言筆研同

舟中別

話別浮春露蘆邊蕩槳遲花香來遠近山影隔  
參差愁目晴光黯榮懷樂事悲月橫流水斷雁  
急寫人離寂寂歸飛葉東風吹爲誰

送何仲先鄉試

折柳寒山寺因君有壯遊酒杯傳樹月帆影拂

自集  
卷四  
江鷗腹笥當緗麓龍文豈蒯緱桃源千葉渡桂  
海一星流書草飛銀榜題縑倚玉樓燕磯清唳  
寂淮水鬱金浮醉逐江妃夢歌高帝子秋長鴻  
人共遠谷鳥友何求挂席雲征去驪駒唱未休

別王吟有序

見吳伎緒風王吟于潘景升長干寓吟  
素豪舉是日惻惻不怡予問之吟揜涕  
曰吾卽晚去汝寧妾呼江上風君望西  
飛翼千里之隔在杯酒間矣予悵然罷

飲書此作別

昔日曾傷別而今別更傷素情畱匹製愁色動  
行裝淚溢聽歌苧魂銷爲覆觴障顏堤柳密兀  
夢險厓長寂寂山雲處相思共渺茫

贈原博胤子

秀徹能傾座吾兒較不如磽磽頭上玉咄咄掌  
中珠異日呼小友他年卜鉅儒縱然非鶴蛻應  
亦是龍駒湯餅纔堪箸之無已解書挺之有此  
子不數慶充閭

此子美而文作此志喜未幾而殤原博以此  
詩殉之予語原博曰此子必修文地下則此  
詩當亦在瑤房紫府間矣

別夜賦燕姬弄

箜篌弄新曲一弄數人聞林鳥千聲寂梨花百  
指零唯予策馬驟諸客送風慙飲盡杯辭月秋  
飛劒劈雲曲終猿亦嘯將手向誰分

七言排律

追念伯起先生

多風自古難多壽九十才情曠世無祇許賢書  
傳姓字肯從通士託江湖流光歷歷浮書卷色  
相仙仙儼畫圖場愛少年留白苧夢尋同調泣  
黃壚緘扉元絕投懷刺閒榻何緣擊唾壺舌過  
晉人無惡謔學讐宋語卻身符鵬風息六垂雲  
渺鶴子生三結樹呼筆塚長菁靈五嶽文星忽  
雨淡三吳閒腸好記塵寰事慙我先人別眼枯





國家圖書館, NATIONAL CENTRAL LIBRARY, TAIWAN, R.O.C.

自  
如  
作  
人  
卷  
四  
子

自娛集卷之五

長洲俞琬綸君宣著

五言絕句

貧婦曲

有引

古白有貧女曲字字可涕予謂貧女良  
苦不如貧嬾之甚有貧婦曲

高堂待炊糜被霜炊以餽但愁無糜炊莫怨有  
霜被

其二

汲水見鄰母相對不言苦歸來見鞠母有苦無  
從數

其三

芳辰爲我讎低回自掩面可憐簪與髮經年不  
相見

其四

人願兒女多我願兒女少筋骨易以銷一事無  
頭了

其五

人苦商人嬾猶有歸時歡我無別離時終身得  
摧殘

其六

夫郎朝自出奔走衣且食日暮夫郎歸莫敢問  
消息

其七

垂首欲流淚我生命何薄回見堂上姑汪汪不  
忍落

其八

一自嫁郎後終朝結眉宇斗粟與尺布不得常  
砧杵

其九

回首樓頭人擗面常歎惜從來無鏡臺容顏暗  
中易

幼于草堂歌 有序

從古才人死多孟浪公亦如是死耳公  
死而風流不死風流之事半在草堂如  
公之行集及志舞諸書堂中所結撰纂  
緝也有尋詩徑堂左竹徑也有白公石  
堂之庭側古松下石也有曲水環洄堂  
外者也歷先後聞人把酒臨風品紅題  
翠茲堂行樂事也公嘗執于感蒙假面  
戲舞城下則堂之前階醉月處也古來  
存一遺事必存一遺趾草堂其不死矣  
地且以公不死公豈死乎爲歌七章亦  
爲草堂思風流耳

於邑淚承睫撫劒揚雙眉一時志舞地衰草何

離離

其二

狂顧倍惆罔徒倚茲傷  
惶歷想舊風月拂衣長  
慨慷

其三

良玉殞窮壑杖頭不復  
煙縹緲千卷書駕去峨  
嶠巔

其四

白日若黃土陰風慘蕭  
蘅竹徑故如昨邈矣尋

詩人

其五

盤桓愈悲憤四顧唯空  
幃廣庭挹清風依稀睹  
舞衣

其六

沐芳勿彈冠芳揚身且  
隍宜爾青松間蛛網羅  
蜂蝶

其七

客散紅裊死暮雨聲泠  
泠白公數行淚灑作秋

蝸鳴

予有把酒憶明月九章原博有六章採其一章續後成十章

把酒憶明月明月出妝臺日日卸妝時愁思多  
滿懷

其二

把酒憶明月明月上寒樹寒鴉不禁聲忽忽啼  
還住

其三

把酒憶明月明月起邊城夜夜聽笳鼓難爲此  
夜情

其四

把酒憶明月明月照荒丘死後得清閒看此無  
盡頭

其五

把酒憶明月明月過平康結璘不管事閒聽說  
衷腸

其六

把酒憶明月明月入朱門歡歌與愁淚狼籍幾  
多人

其七

把酒憶明月明月到隱居渴來茶竈冷空影濕  
殘書

其八

把酒憶明月明月映江流寂寂征帆少千山影  
欲浮

其九

把酒憶明月明月來古寺往蹟已埋沈猶識殘  
碑字

其十

把酒憶明月明月生雲彩仙人五色衣片片歸  
滄海

原博六章如生雲彩等名自爲一式與予不  
相合愛其翩翩仙句也

幼于生殯十首

爲君齊執紼茫茫動白雲君能脫苦海苦海未

自如集  
卷五  
六  
饒君

其二

道君槁且灰矍鑠尚如虎  
畱與世人傳異鬼能  
躑舞

其三

遙望容車至車前動地哀  
試看車以後拍手放  
歌來

其四

面目尚本來  
浪言解詩械此福未易能尚虧千

卷債

其五

公身長七尺今日酒二杯  
誰言無賣處收盡紙  
錢回

其六

笳簫迎異骨紅粉挈芻靈  
解人茲白驥抵死不  
悲鳴

其七

世上有此鬼山魃盡驚疑  
請看花樹裏歡載傲



尸歸

其八

明年寒食後野祭爲公陳公豈能當祭公猶野祭人

其九

幼于一身子名姓落何簿國王與鬼伯不知屬誰箇

其十

托身是何境對面是何形從此人間世相看盡

柏城

甘蔗郎

有序

橫塘甘蔗郎每午餘必以蔗來稚年可親原博有曲志賞曲文郎不解予爲俚語解之

君問儂年紀君問儂不答君莫問儂年春來始垂髮

其二

小小負蔗行夏月行如火蔗則儂與君君與儂

瓜果

其三

人人飲蔗漿蔗皮人所棄不識君何心疊疊還堆砌

其四

他人持蔗來蔗大君嫌小低佞問阿儂汝可嫌錢少

其五

他人持蔗來不許上堦頭點首呼阿儂汝可來

上樓

其六

蔗味只如此君言不可食一經阿儂手便說甜於蜜蔗甜儂則苦起蚤衣猶濕

其七

賣蔗雖則苦此苦猶可當阿爺不愛儂教儂牧牛羊告君君不肯坐名甘蔗郎

其八

知君有蔗癖日到君門首一日君樓儂樓儂

伴走好心將。蕨來明朝定無有。

禪房

佛教除六根鼻根幸未絕。旃檀一片香解去衆生劫。

之客

游子意何屬。高人貴識時。歸鳥何太忙。爭欲栖安枝。

蛛網

思君似蛛網。卷去復成結。肉腸能幾何。晝夜無

斷絕

馬湘蘭畫蘭

染墨傳名字。幽芳倍可親。不知湘水隔。癡對畫中人。

金山曉起

潮至涼風起。鍾鳴曉霧開。隨僧叅好相。香火半如來。

山茶積雪題扇

寒日無所事。呵手臨醉帖。玉塵片片來。鬪下樓

強葉

題畫

薄醉走谿雪寒飛拂林表與爾盟素心薜門對  
空杳

新春日

一歲復一歲添歲并添癡日日尋酒所不知春  
去時

書燕子磯石壁

慷慨歎呼酒攀條倚危石往來離別情鬱鬱江

心碧

山望

地僻尋花少山陰落月孤悠悠千里色好信托  
飛奴

畫

笑語聲孜孜流魂夢黯黯小蝶護花肥輕雲度  
風嬾

閨懷

別君知已矣問我欲如何別後衣香盡那堪揜

淚多

與原博舟中別

話別莫投箸相逢意氣新  
山頭一寸月猶足酒  
千巡

風月閒

人言風月閒風月何時閒  
深夜猶不散相將樽  
酒閒

歲朝

一年空碌碌往事一齊歸  
點檢誰吾有開箱止

故衣

畫蘭

染墨寫幽蘭細細香風至  
世無紉佩人化作湘  
溪淚

畫

開畫君家在門前擁翠茸  
坐來無客到仰面對  
清風

携幼奴

我欲携卿隱東山此日過  
山中勤借問若處白

雲多

樓雨

聲靜鳥棲竹水暗雲暝池曉來看兩山遙共淒  
幽思

手藉

爾得攜郎臂妾身恨不如此心唯爾會傳與淚  
殘餘

弱秋小影

與子三年別臨風正有神夢覓淮水上難訴卷

中人

春晚

含意拾春花紅芳不堪掃燕子肯多情伴我歸  
休蚤

悶待

情月三更夢驟風十里秋美人期不至小徑綠  
苔愁

招遠

嬌波蕩春柳情雨憐夜花寄意遠行馬回頭客

有家

別贈

代張壽

懽晤春花明腸斷多風雨有夢通話言初醒猶見汝

其二

有別還須來有喜償今苦與子言素期送子江頭去

其三

短橈輕於鷗觸浪聲如虎刻燭飲千杯人醉秋

江午

其四

仰面一天寒雁陣翻來去行行寫箇人人在懸如許

攜李別諸友後寄謝

各分煙雨袖吳越夢交隨一點嚴灘月君歸已到時

馬行夢驚

鳥落聲空樹山深淚黑雲美人鞍上夢難得馬

蹄勻

懷舊

花好偏多恙時歡不易畱幾饒秋上苑况是故人樓

古意

虎出莫探穴魑歸多夜氛安覓在蒼嶺識盡往來雲

緘寄

既去不如速訂歸莫甚前話多無可寄有淚滴

回船

雲

挽手拾巖桂揚杯餞去雲去從何處歇先我俟河汾

交運

良晤久如昨屯年過尚愁生涯君欲問買有鏡中秋

金馬行

相玆夾楊裏誰是雙心飛隔馬行人淚風吹沾



我衣

懷友

雲薄從人遠  
誰開與路長  
思君淚稍滑  
提起卽

千行



國家圖書館, NATIONAL CENTRAL LIBRARY, TAIWAN, R.O.C.

自娛集卷之六

長洲俞琬綸君宣著

七言絕句

桃葉渡

澹漠流光細雨飛  
數行春草蕩風衣  
扁舟桃葉猶前度  
仙影欺人是又非

燈市喜素奴不赴

狼籍珠鈿款款收  
素容憐殺晚風秋  
半枝花雨催人病  
何處笙歌不夜樓



覽髮因感

因憐旅鬢添來異，遙想閨容減半初。  
狼籍少年雙渺渺，後來風色總模糊。

有訪不遇時歲底

雖未春來已借春，綺樓多處更春新。  
訪君不遇逢花雨，兩袖鮮香欲醉人。

追懷魏蓉

美人元自難經識，何苦當年偶識君。  
潦草長安春去半，殘書一卷病紛紛。

復過淮堤新柳邊有感

溪口迴波戲柳枝，波情咽咽寫相思。  
三年前亦曾來此，一片雄心竟不知。

登山喜雨姬月下至

偶與清風兩值閒，嘯聲吹沸萬林間。  
一雙行玉脩脩上，恰似相期月滿山。

感玄仲諸契

客久歸來嬾入城，舊時落地半殘英。  
相逢一片皆新少，裘馬風前避道行。

余峰丈同渡春江分手作茆山游

別我凌風叩導師素樽且與坐江湄明朝南望  
山頭上忽起青霞君到時

其二

拍手相逢堤柳間短章相送訪仙山三年後是  
誰山主此日君來不放還

懷別

一自江州憐小友笑人還夢望京樓錢塘此渡  
尤無爲繡澁山花滿路愁

岫雲沈舅誌

有跋

必不願歸求客死茫茫岫鶴野雲空他時狐鼠  
休相問此骨當年備五窮

其二

歸來羞作生馮煖此去寧尋死孟嘗請把送君  
千點淚化爲山雨暗家鄉

此蘇州沈岫雲也癖與鄉仇委命於此欲返  
其骨覓必不去生之所寄歿亦遂之所謂死  
有以葬不必其里也甥某傷居築土灑淚奠

別而以詩誌云

燕姬墮馬

忽望神仙下九疑  
彩雲散亂到蛾眉  
舞腰幾欲乘風去  
况是翻飛馬上時

其二

縹緲風前玉鬢橫  
惜惜不爲酒初醒  
會看芳草神馳去  
怪殺青驪斷遠情

其三

春來新服短蟬紗  
駕霧裝煙帶落霞  
輕貼翠苔

塵不動霏微疑泊武陵花

其四

尋幽陌上卷殘暉  
意得空中駕六飛  
蚤是九華妃  
侍女塵埃終不染  
雲衣

登太山

兩肘風扶接漢辰  
業軀何幸已通神  
茫茫大塊如蟻蝨  
俯瞰煙霞亦幻塵

其二

風微何物響清遼  
疑是仙家奏洞簫  
欲指故鄉

何處是人間煙雨隔山腰

其三

靡靡足下舞雲旗芒屨輕斜不自持仰首帝宮  
應逼近手擎香火念牟尼

其四

攜朋纔上半山隈田樹依稀且浪猜忽自想看  
不識面輕雲一朵撲人來

其五

浮玉峰頭碧落居虬龍下矚舞雲車笑人眼力

無多遠共指蒼煙作太虛

其六

人寰一片平如鏡天闕光明照大千高下參差  
星萬點山頭佛宇一燈爍

其七

無風蕭颯動人衣鶴駕羣仙拱太微一嘯空中  
傳萬籟悠悠散與白雲飛

其八

俄生八翼乍登天半世泥塗一日仙遊子歸期

何處卜紛紛珠斗落金錢

爲幼玉作嫁衣并書此送之

昔年度曲轉淒憐浴罷常沾豈蔻香一自月英  
消息斷人前絕口問平康

其二

會結生前未了因春來何計遣蕭辰從今莫問  
君肥瘦珍重清閨慰故人

其三

憶昔臨風戲錦鳧酒酣習與共歡呼如今再欲

看君笑便有千金買得無

其四

雨餘無賴酒行頻坐對齊牕看綠勻日日歌臺  
真自得從今樂苦屬他人

其五

君家性格本湫湄一入深閨強自支欲爲故人  
傳數語小青渾不是當時

其六

少年和淚別煙蘿儘夜矇矓向玉荷低唱欲娛

長夜飲不知夫壻性情何

其七

偶然無事戲投璫點點如星湊不成錯對小姑  
呼妹子回身不語盼流鶯

原博留綬館予月下獨歸晨遣訊之

寂寂空林染綠塵雲衣欲冷不知春迷離帶月  
歸如夢此夜清光惱殺人

其二

原博有竹嶽阿香香死矣音亦  
有阿香冢晨風鳥名

玉質何如此阿香半簷花雨夜微涼可知霓蓐

渾無恙未許晨風促淚妝

其三

好夢方成月色孤情濃深鎖畫屏紆枕間記曲  
張紅在問有工夫製得無

其四

驗取前期意更親日高輕軟貼花茵願君努力  
頻添酒聞說春寒也妬人

其五

原字青娥原博  
改作文綬

依依笑語送春波想像微風卸綺羅心事已通



無可道小名但囑改青娥

紀夢

夢到三更纔見汝千斛哀腸一時語簌簌打牕  
散手歸樹頭吹落黃昏雨

彈琴

彈來多出悲風調一曲一悲寒松清曲終宛轉  
悲不盡挂取壁間風自鳴

九郎過訪

聞聰初試雨前茶何處風吹到小娃促坐移時

交半語滿齋春煖不須花

夢杜若

千層暮色迷煙柳一曲清歌墜雨花驀地歌殘  
人別去淒然獨枕亂池蛙

題小翩圖

僊人初降海雲邊窄樣身材字小翩檀暈欲低  
春思嬾琴樽潦倒擲風前

月下虎丘見喜月二馮

雙雙桃李競芳妍對月清歌亦自憐欲識風流

種所在君家幸有綠珠泉

潯陽送客圖

橫空歸夢落平沙聽倦吳儂陌上花今日江頭  
明月夜行人猶自怨琵琶

書觀音閣石壁二首

峰頭雲起鬱叅差雲作峰頭曉暮奇來往征帆  
飛不住江山小小欲何之

其二

江聲時嘯亦時怒石皮復鼓亦復琴我有豪情

不能吐晴山空碧開吾襟

樓頭嬾

樓頭連日懶新妝半上珠簾草陌長貪看晚風  
弄楊柳卻忘馬上冶游郎

代

盤陀初整泣西關取次霜紅秋欲闌歌舞盡拚  
休慙問低頭不敢看刀鐮

憶別

情多日出還生事月月良辰有別離寒入北牕

夢來少一夜竹聲葉滿池

閨懷

樓東一望滿江煙誤約歸期過一年細雨天涯  
春草綠夢吹無賴到君前

別小四

送我江頭細雨飛鈎簾停柁採江蘼欲知何處  
愁腸斷故向杯前一笑時

春盡

誰負幽期不可尋影娥欄外漸生蘋鶯花不識

春將去猶着輕風賣弄人

記別

野步山花樹樹稀酒醒吹入晚涼微歸來暗落  
千雙淚檢出當年見贈衣

送別

回數歸時睫眼過至今猶未試新羅一春花柳  
昏如睡別恨偏宜陰雨多

餞友

攜樽江畔草如茵唱和詩題片石鄰一樹秋風

吹落葉登山臨水送歸人

鳳生

雲華秋色滿湘簾翠濕空庭影倍憐不見雙璜  
明月下終疑金屋事虛傳

空閨春晚圖

樓角青山入霧暝花蜂草蝶故凋零何人寄意  
南來鳥更半愁聲落夜庭

夢愛兒片語卽去

黃昏陰雨濕蘆蕪片刻奇緣見小姑不是春顏

常在念醒來尋憶也模糊

家樓

吾園池閣十餘圍不雨經旬水尚肥憑臥北牕  
簾半捲山雲樹雪滿前飛

挽何水玉二首

自來粉黛俱黃土一任輕綃付落霞誰復有情  
風共月破牕相與到箏琶

其二

新寒入夢使人哀欲向芳容問鏡臺願爾清魂

寄花下時乘風便逐香來

贈倪水泉

不善謀生甘餓夫他年肘有玉麟符說梅也自  
能消渴姑妄言之亦勝無

感雙二首 有引

過曲水草堂胡陸二姬擁笏于而飲時  
雙旣去矣笏于嘗曰二姬曰阿侯在何  
處不如吾家蠻素常作林下風舒我襟  
懷耳因益感雙

憶昔隨遊解拂塵思君脉脉暗傷神白公石下  
風流盡楊柳櫻桃也如人

其二

重來把酒恨人非坐向春風憶縷衣蜂蝶有懷  
如舊過幾番快快速度墻歸

南齋夜讀

自述文章慨遭遇逐跡泥塗負心素揜牕夜靜  
苦伊吾可惜流雲幾虛度

閨怨

憑望雲遙逼漢辰數行草草寄江濱東隣消息  
君休問斷送紅香風雨春

訪幼卿瘞處

滿樹哀禽不住啼可憐埋玉小樓西感君畱得  
多情在輕着花塵送馬蹄

醉步

翠衿鳥語乍晴時散步春郊有所攜可惜晚游  
當醉裏山花幾過未關思

歌婢畱別

玉勒裝成已夕陽殷勤更進一壺觴年年短曲  
供君醉此去樽前切莫忘

雲夢弔古五首

幾代名賢共結廬清寃常傲白雲虛假能臭味  
同千古肯許他年俎豆予

揖五賢

其二

落落雄心氣未平亂揮石劒吐千雲三分亦是  
當年夢此片山頭乃屬君

揖劉先生

其三

絕代風流雲一龕先生長坐石林寒人人會讀  
詩千卷可與心期固亦難

揖子瞻

其四

追尋往蹟何嘗死乍覩鬚眉果是生白羽至今  
藏怪算空中搖出遠山青

揖孔明

其五

一天秀色滿煙山人渺亭虛鶴不還寒夕酒醒  
何處響一聲清啖在雲間

放鶴亭

閨怨

月磨香煖素綢籠逐日空庭掃落紅負我一春  
花去半報他淪落雨兼風

長干竹居菴有手栽四竹歸時囑陳復所  
善護之別後時以爲念因夢晤陳君亟訊  
此竹陳曰無恙

秋來夜半已新寒千里相思爲寄歡可喜新栽  
庭下竹無風多雨得平安

薛虞卿得下嫂置大樹園

思君欲訪幾逡巡空積囊中當酒緡才致自慚

自如集 卷六  
嵇阮下窺慵更得品題人

畫蘭

清風一過枝枝舞墨雨新和  
朶朶香不是畫蘭  
蘭在畫湘江知斷幾人腸

喜見黃必顯

花前喜得又相親喜極翻疑未是真  
但見笑容無半語看來元是十年人

秋閨詞代楊素娟遠寄

登樓迷目草蕭蕭夢隔成都萬里橋  
果是月明能遞去何人無酒不相邀

自述二首

但是向人俱款款不須問酒且嘗嘗  
從來笑疾非輕薄愁滿人間不入腸

其二

舌自廣長無箇業曾雖狹小不堪顰  
北牕數朶瓶梅下豈食凡間煙火人

爲絲五作悲秋詞贈舊歡

秋風忽起黃花落車馬喧喧慰索莫  
有日憑君



一葉情簷前檻外飛輕薄

茗盞對奕適有客索詩者

鳥半歸巢日半黃兩人心事共茫茫彈碁賭卻  
林端月輸者教他照素牀

客中歲暮

逐日浮蹤問渡頭經年離恨半青樓有情天外  
空勞夢一片山霞趁水流

湖上追想

何日能忘昔所期迎人花鳥莫相疑浮來翠遠

凝如蓋十五年前春草時

又子鴻歸禪

新壯改作小沙彌第一當場更數誰頻念佛囉  
心暗囑來生莫種有情癡

懷盞玉二首

一片桃花幾度春離腸欲斷酒頻頻驅車過處  
流鶯寂難把春愁說與人

其二

新來燕燕喜成雙人有相思多渺茫散步谿邊

尋好句竹皮蕉葉是奚囊

有訪

因君日日苦縈懷走訊春愁破碧苔日午扣簾  
妝未罷可知情夢昨宵來

贈友

甕春已竭勤畱客池墨常酣懶作書睡起嘯歌  
風散竹一天清韻滿庭除

改睡起嘯歌清韻徹天風散竹滿庭除

懷諸姬

好風何處吐芬奇腸斷封家十二姨可恨夢魂  
吹不到聊將明月托相思

悼三首

春盡蕭蕭樹滿鴉尋蹤空有墓門斜幽明不隔  
惟清夢夜半風前簇淚花

其二

殷勤送子一壺餐夢入三更月半昏好去不須  
愁莫訴一腔心事託清冤

其三

夜半藤蘿面面低昏燈恍忽共君時坐君榻上  
香猶在畱卻芳情遺所思

春去日送行

馮高折柳送春華暫且畱春一盞茶春亦有情  
含不語依依別恨託飛花

春閨

簷前鬪馬響琳瑯度去三春草不芳寄語舊年  
雙燕子天涯何處好雕梁

晏坐

終日杜門非厭客一春心事睡時多飛來一陣  
香何處雙鳥銜花掠水過

夢恨

忽忽三更送所思風煙千里更何之寸腸不斷  
曾幾許夢裏猶堪泣別時

夜別因贈在坐之交歡者三首

小牕獨坐風與雨可惜春韶傷江滸人生莫恨  
無相知看我今宵別離苦

其二

萍合他鄉緣已奇  
蘭香分處意交持  
兩人莫賀新相識  
他日愁腸在此時

其三

一刻生平君莫負  
摘花與約來時暮  
欲將明月引君情  
千里長光入我坐

幼于來

幼于嘗僵臥梅下  
梅片蕪蕪落口中  
令人亟奔告友人  
曰幼于死矣

閒抽遺卷自刪裁  
小徑無人滿綠苔  
盡說幼于梅下死  
敲門猶自杖藜來

飯後假寐夢四兒

庭前夢接小霞裾  
依舊當年二六餘  
片刻匆匆忘問汝  
近來阿姊病何如

霧後歸園

乘閒信步訪蘭奢  
醉捉雲藍寫法華  
穉子扶歸煙雨散  
數竿影裏是吾家

春晴

一春多雨喜初晴  
屢欲披衣尚半醒  
牕外不知

何樣鳥但聞聲處若關情

臨別二首

山深秋近夜涼新莫厭殷勤酒頻一曲清簫  
何處月半尊殘酌幾時人

其二

薄薄流雲吹細涔茫茫千里孰知心酌君此夜  
別離酒嘗得人間愁淺深

平康曲

門前池水浸山霞難得東風戀妾家走過竹籬

寒袂住回頭知是麗春花

秋別

千里長征挾劍縱昔年期約逗行舟白雲一朵  
金仙去夜半蕭蕭荻渚秋

舊隱

當年共汎小桃菹今日橋邊訪舊廬風月滿林  
人不見挂墻清影欲牽裾

春暮二首

蒼烟漠漠雨絲絲千里悠悠未可期含淚掃花

勤勸酒豈堪重賦餞春詩

其二

鶯去春歸花事衰  
我將杯酒解縈懷  
年年惡况春無限  
今日辭君再莫來

郊外別

鋪花促坐錦紋墩  
且與高歌十里邨  
乘取碧天酣醉月  
霎時雲過酒杯昏

過去姬與遊處

插天孤石倚層臺  
秋色當湖萬錦開  
往事欲追

人不見  
嬌風倩雨爲誰來

訪高士

新詩賦就獨聞吟  
翠入清池月滿林  
縱識姓名無覓處  
但聞鳥語白煙深

山懷西望

岑雲寂寂水盈盈  
秋色當牕送我情  
明月未生西海白  
臨風一嘯遠山青

題畫二首

傍水因山蓋草堂  
離騷半卷一壺觴  
去年別子

秋雲老今日愁看木葉黃

其二

送汝湖亭正夕陽歷年離別惱人腸前途漠漠  
難分手兩岸淒風竹樹忙

感

江干立馬意躊躇春去春來人自如門館依然  
賓侶斷可能常賦絕交書

閨恨

垂簾久已隔雲華莫向桃谿問妾家風雨小牕  
人去後模糊春晚不知花

又莫念溪邊有妾家寂寞小樓天氣好一春  
風雨不知花

維揚遇華哥

此地何緣見小華枝頭點雨泣嬌花與君共寄  
風塵跋不必含羞揜臂紗

山夜

與君把臂入畫圖人世既隔殊清孤寒林野鳥  
任喧寂夜月空山時有無

夢醒

輪鞅翻復幾時寧  
閒卻堦除月露清  
竟夕匆忙何所爲  
軒軒床上一莊生

寄

邨家折得半含梅  
纔着春風取次開  
千里相思知夢准  
手溫餘枕待君來

醉歌

南牕仰面弄虛徐  
對酒聞香寫自娛  
問我前身藐姑射  
一庭雪露唱吳歎

海棠

薄羅初試怯風淒  
小樣紅妝着雨低  
一段天嬌描不就  
非關子美不能詩

仙仙楊柳腮

一雙燕子喜逢春  
颯颯風來不到塵  
怪殺楊花無箇准  
沾來水面亦浮蘋

哭顧二

遙望飛星落遠天  
荷衣幻作火中蓮  
多情畱卻年年恨  
此日秦淮可禁烟



蘭

朶朶猗靡葉葉顛枝枝含笑濕秋烟圖來寄與  
張祠部幽客還教壓水仙

寄茗玉

乍得相逢意自親素裝一襲翠超塵藍橋縱負  
當年約肯把玄霜屬世人

秋夜集

紅塵未減舊年容促膝移時月半空杯酒正濃  
歌正好相思已寄落花中

畫煙雨

綠楊十里勝皇洲此日空濛隔畫樓樓上莫愁  
花事盡瞿塘何處好停舟

看雲客至

閒來把酒看天上正好看時客過谿可惜數言  
煩應答白雲飛去大江西

蘆雁

自北南來幾度呼江頭影落日初晡曾遺多少  
閨人淚忍自雙雙戲荻蘆

憶舊遊

戀戀當年白氎巾烏紗不稱有情人酒懷常在  
花門口今日風光枉是春

渡錢塘

澹蕩波光萬壑開白鷗雲氣兩相猜偶因一曲  
吹楊柳夜夜愁心江上來

喜玉如強起

風光難得占家家怪爾庭前幾樹花聞說朝來  
嬾梳洗誰人鈿朵隔牕紗

別王學博

匹馬長驅萬里平開樽莫計故人情客中愁是  
芳菲色趁未東風正好行

遣病

燕留春語草留青客路塵多已倦行病骨滿身  
堪自喜回頭憶得少年情

劉隱士

聞說移居山塢間依然市處金無山一茶數語  
徐徐別覺是山中杖策還

送子秋仲喜

悠然雲路渺難尋且向杯中忘客心去矣風流  
餘夜半蕭蕭絃管咽春陰

答張一

蘭花一卷故人遺病筆描來更可思點檢藁中  
深自恨經年無有贈君詩

答徐日方兼寄元聲兄弟

衙齋結得小茆亭五斗無心嬾送迎爲報故人  
千里况別來唯有病多情

汪成龍

軟腰鬆髻舊青羅秋色花情爾占多輕眼一斜  
相逼甚問伊教我欲如何

江上

牢絡塵鞅蹙出頭波光雲影復當秋自知今世  
無多業願作來生一野鷗

鄉夢

苦無情緒夢沉沉秋氣當空雲滿林爲向故園  
鶯柳道他鄉花好不畱心

多病

攢眉作客已經年  
賴有山雲滿案間  
病色恐貽堂上慮  
時時呼酒沃冰顏

訪山客

巖花石竹傍雲生  
榻上風翻書葉聲  
喜此杯中無世態  
偏於閒寂有餘情

齋中

信手圍碁信口詩  
偶然一夢日西移  
賴因病嬾多閒日  
不負三春來去時

湖上懷皆可諸丈

花飛片片草垂垂  
問爾秋深何所思  
可恨當湖好明月  
遲予三日見君時

述感

相對情濃感慨生  
草亭無恙酒常春  
君如問我鶯花在  
換得今朝病裏身

青韶臨水

滿砌幽花滿架書  
滿容酒喜映香渠  
短闌曲曲春衣倦  
花玉風前蝶不如

有感二首

簫鼓樓頭馬上絃一人唱采萬人傳晚來風雨  
紛紛散暗落春花誰可憐

其二

牕前一樹半谿斜從未逢時怨小家寂寂戒容  
人不見病眸含雨莫看花

雨夜

蕉葉聲聲點雨忙殘書一卷半眠牀多情不必  
關心事雁過三迴淚萬雙

秋夜臨水歎坐

兩壑中分玉澗開蟬雲一盞坐莓苔愁當水月  
清明夜少放嬌花影入來

遠懷

暗雲西度影遲遲閒對殘鑪品玉筵今日花開  
簾莫卷天涯應是病眠時

江南意

春暝初起鬢籠鴉一襲文衣妒晚霞心事柳花  
偷得去輕風送到阿誰家

春雨懷寄

千里三年有夢思  
鎖樓煙樹雨西吹  
春寒花朵相憐恤  
唯我和君不可期

落花三首

遣疾溪邊覽物華  
步回贏得意無涯  
春嬌幾派紅綃隊  
歷亂隨風化落霞

其二

病起身輕汎水鳧  
斷雲秋色晚山孤  
池邊千朵蓮花舞  
今日殘紅影亦無

其三

每蚤尋花日未竿  
携樽挈杖獨蹒跚  
自從秋到閒遊少  
樹樹關情不忍看

秋淚

誰最相憐復相侶  
美人淚眼花枝雨  
香痕暗瀉水紅斑  
對向闌干訴無語

待夢

無馮秋雁與春魚  
不用千山遠贈書  
月影馬蹄齊赴約  
願君遲我到更餘

感春

莫道愁心無箇伴  
雨殘桃李盡堪嗟  
滿城春意人人醉  
惟有長秋在妾家

懷

白鳥鷓鴣帶霧飛  
紅莎的的影波微  
酒情無計留明月  
紈扇吹人秋滿衣

惜少年

閨怨

燕侮鷺欺花欲笑  
千里衷腸無處道  
殘紅寂寂雨春樓  
相期可復人年少

雨鐘

作別河干亟馬催  
有懷唯付紫雲堆  
秋寒風雨鐘聲鬧  
夜夜煩君送夢回

答友人秋山圖

別淚應餘百寶闌  
感君書寄報清安  
新詞寫出閒居樂  
贈我秋山曉夜看

寄謝

竹屐蕉衫白鷺巾  
曠懷風色有餘神  
當年自與君相善  
先得長干一月春

坐想

疑是封家最小姨相逢誰肯不情癡  
忙中鬪裏君常在况是低鐙獨坐時

悼徐玄仲

片玉簷風落畫闌山頭雲鳥夜啼寒  
野花歲發生前興別我年餘酒未殘

春病二首

慚愧西飛隴上雲病留清骨傲雞羣  
流鶯飛蝶來相笑到處花開不見君

其二

日課山兒煮白菘任他雙劍角雌雄  
病中間我何心事花吐新紅愁雨風

傷艾賓伯三首

何日能歸步紫苔署樓猶喜面山開  
鳴蟬忽作哀聲訴會有南昌書信來

其二

冶遊陌上試青鱗六馬圖開袞袞塵  
絕美少年都化去笑他花柳爲誰春



其三

一自君辭人世去我無情事亦身輕何能直向  
空山裏噴雨丹楓叫萬聲

夢別二首

宿鳥斜窺莫捲簾有期山半月猶銜金鑲一響  
人何在手吐衾餘護枕函

其二

堤柳紅橋曲曲深鑽籬小竹漸成陰月光照醒  
相期夢夢不還來月又沉

春去二首

流水湯湯何所之鳥鳴嗚咽更誰思三春總是  
傷秋日落得春歸也不知

其二

煙餘山逕雨餘樓忽動相思江上秋三月花開  
人正病到今空爲落花愁

多別

秋雲秋草任風批紀別年年東復西乍醒未衣  
閤問夢宵來何處聽猿啼

閨况

繡罷春綃意惘然細煙輕雨銷林蔭閒隨雙蝶  
園西去蝶過隣家我自還

秋去矣而感秋之疾固在母寃秋也以寄  
子葵

任值良辰病不離任從歡處悶相隨庭無黃葉  
玄蟬寂在怨西風秋在時

春思二首懷翩翩

綠玉條條煙半開碎綿飛繞徧青苔春風自是  
多情致可得吹君入夢來

其二

年年花信傳無已今日風歸信不傳總是一聲  
春枕上人聞鶯語我聞鶻

紀別

薄霧平勻萬樹滋多情偏與寡緣期一年有夢  
皆離別但卜今宵向別誰

夢原博

君抱才華泉下老百端無復費相商悠悠聚散

皆閒事賴有夢中人意長

野集

橋東一去泱泱水蓋玉煙香澹旂旄滿坐不聞  
獨我聞一聲鶉鴉殘花裏

秋病二首

薜荔牆頭挂雨絲衍波塵閣少新詩生來種得  
花情重病卧一秋落葉時

其二

回首紅妝五十絃湘妃一曲海棠顛情淡不忍  
看花謝自到秋來只病眠

惜花二首

切莫栽花臨水濱開時曾得幾芳辰悠悠一去  
無回首辜負憐春惜別人

其二

落花原自有根芽曾亦藏鴛伴月斜今日水流  
紅片片故枝煙鎖阿誰家

悼原博

酒醺相與臥庭柯無限交情一隙過世上風波

泉下月君應憐我惡緣多

原博玄仲

方歎幽魂不可招  
可堪雙帶更飄飄  
泉臺一見寒溫了  
定問人間第一交

幼卿朱鳳玉華

十年魂夢邈難儔  
玄鶴孤鶩萬仞秋  
從此不愁生死事  
美人強半碧雲遊

閨夢

竹底春醒小燕飛  
午殘一夢見依稀  
有期未訂忙分手  
半臉餘痕壓枕衣

不遇

約我春來誤及秋  
空樽相對遠山愁  
歌殘未久薰風在  
一縷餘春足此遊

秋閨二首

未暮歸來燕子忙  
雨天偏得稱啼粧  
垂眠不忍看花悴  
葉上聲聲滴斷腸

其二

靜掩春菟落日遲  
叢林影裏淡燕支  
病中嬾問

花消息小鳥嚶嚶弔故枝

又送王學博歸滇南

幾年宦跡海雲鷗  
劔臯空懸明月鉤  
此地勸君休費淚  
前途秋草更悠悠

有悼十三首

去去空庭雲影忙  
一聲漁笛滿林霜  
書來恨向人前拆  
眼看飛花淚入腸

其二

南塘相對月虛弓  
琴指含情寫醉翁  
歷歷暗思

如昨事霜花一片委秋風

其三

一聞消息淚潺湲  
能復春華駐好顏  
細檢別來無惡夢  
強疑還在有無間

其四

空枝寂寂海棠魂  
剩得當年笑語溫  
久坐簾前一博月  
從今收拾臥黃昏

其五

堤柳陰陰紫玉珂  
少年情悔昔時多  
橫塘草雨

花風下定有雙聲子夜歌

其六

鵲尾煙沉蕙帳空十年交與送歸鴻輕紅縱好  
情誰付謝得宵來一樹風

其七

原是蕊淵宮裏客安能絳雪點丰姿暗雲零落  
悲啼鳥已在書前報我知

其八

鈿朶飛歸白玉鸞墓門深鎖淚風寒生前可惜

懶相訪今日夢中一刻難

其九

噤噤難聞奈雁奴鑪灰已冷未更蘇離多每結  
秋風恨今欲離多更得無

其十

花仙獨占懷春夢壓倒繁紅誰與共今日東君  
也不容不教結得花仇重

其十一

月露塔頭總沒苔無緣花酒任相猜意中若有

催歸事未十餘旬此信來

其十二

所期難再燭陰偏月自臨溪風自漣固是琪花  
常不謝人間香色已茫然

其十三

千里懷君君在麼頻年無信信如何滿衣淚跡  
人休問早向春薇露逕過

友人死有冤以買姬致疾者

白鷺洲邊楊柳枝風流猶自掛絲絲維揚幾萬

高低塚豈盡臺城麥馬兒

夢期荻那二首

別來何計好懷開夜影空濛滑露苔我有欲言  
勤就枕君多心事記清來

其二

當年曾挾風雲氣今日誰憐冰雪顏期汝夢魂  
行及蚤來途隔有萬重山

懷素玉

遙憶佳人畫不如庭柯葉響立躊躇鶯聲付與

春風去吹入青樓午夢餘

夜別

瓶插野棠嬌玉面  
牕橫梅子結青瓔  
連牀話別煎寒雨  
忽忽池魚沒水聲

送別歸

送別歸來當日暮  
野禽三五穿雲度  
欲避芭蕉點雨聲  
竹牀移向東牕臥

祝生病

白鷗橋下弄清漪  
燕子心忙簾卷遲  
我意凄然

君尚病殘書風雨杏花時

痛祝生四首末首爲生招魂

月浪吹殘碎錦光  
多情元不耐情長  
琪園收去爲花主  
幸與人間一辦香

其二

暮暮朝朝不記年  
何分歿後與生前  
凝眸細憶君何在  
髣髴牀頭燈影邊

其三

絕異才仙去宵冥魂  
香猶結桂風清遺縑  
幸有



生前慧夜夜翻嗟剔短檠

其四

寂寂言愁起暗埃半餘丹葉半青苔月深無底  
風燈笑背摘芙蓉寒影來

別梁丹甫

風送帆秋雨袖分近花飛處遠波紋傷情脉脉  
難爲賦寄與鷺聲帶贈君

作雲期曲懷人因寄

濁酒三杯慰所懷離離荒草舊歌臺白雲意急

秋風嬾目斷天涯期不來

湖上喜值

世上浮沉付水雲閒書一卷面山羣忽來一陣  
空秋色亟喚開門卻是君

友人作病顏詩代爲贈答各二章

山外雲寒客夢長踏莎未闕馬蹄忙朱顏暗與  
君同去一路飛花莫踐傷

其二

啼鳥鳴蟬不可聞白蘋丹樹恨紛紛別來無物

能將意日減春顏寄贈君

答

斷魄中流一線分萬千心事託秋霞芳顏千里  
蒙君贈賴有慙慙病答君

邀夢

愁殺路長寒夢短離魂未到夢將醒願君早睡  
魂先走到我夢初來半程

樓望

高樓風盡鷓鴣斑日夜愁堆遊子顏願作來生

無恙鳥悠悠千里白雲山

野步

步出空山山欲暮癡與白雲隨步去雲肯遲留  
風急催飛過深溪莫舟渡

鴛鴦枕

紫帳斜牽燭影偏三更春雨足情田羨伊浴罷  
雙飛去猶自沙溫柳護眠

促至二首

片片秋帆挂夕曛山深樹樹鳥呼羣多情唯有

江灘月未報歸期日待君

其二

背陰淺泚綠苹開佩綰春綃薄霧裁贈我萬雙  
臨別淚不如一日早歸來

春意

花日當牕度影遲畫眉含意欲投誰雙聲付與  
春風管淮水樓頭莫向吹

雨樓

小樓面面對山開亂石無奇也綠苔一自雨流  
花信去東風不送好春來

自悵

命薄所交皆命薄秋聲燕子怨何誰願君與我  
無多好但一情深有別離

期飲

煙樹離離月泛湖樽前借爾一冰壺莫言明月  
無勞贈昨夜月明君見無

風緩

江芷畱人不忍歸一灣釣艇蕩秋暉狂風亦得

憐香意纔着花枝氣力微

雁

漁火疎疎夜半明  
斷雲殘雨雁孤行  
十家九作天涯夢  
飛過江樓且禁聲

送春

天召春歸春去忙  
任他歸去莫牽腸  
人間爲汝多愁恨  
天上無情去不妨

江船

璽籠雲色淡  
緗裙新月寒  
空吐鏡餘江上怨  
歌

流入夢悠悠  
遷客意何如

餞

去爲功名好  
着鞭劔鋒長  
掛碧羅天相思不斷  
如春草千里隨君在馬前

別怨

馬上霜天倦行李  
千行淚落桃花水  
莫思舊日綺羅人  
明月無家伴遊子

閨望二首

浮碧空谿草自芬  
月橫劔畫水平分  
思君目極

無天處雁過嶺頭空斷雲

其二

瘦玉含風秋復秋  
曲眉雙結水波愁  
白雲明月知歸路  
去客倒行何盡頭

春苦

坐背明燈淚背人  
被籠燠煖自爲親  
烏愁花病雲偃蹇  
難說今春也算春

夢述

卸卻羅韉袒半襟  
數杯明月隱楓林  
平時未必

知心者夢去相逢自有情

順流別

木葉初黃細雨收  
無情江水順行舟  
癡心欲挽東行柁  
淚滴波中不肯流

懷魏元

相對香齋綠正勻  
清歌送眼更愁人  
至今想起銜杯夜  
猶帶長安二月春

憐秋

我憐秋色秋憐我  
花影蕭蕭別去樓  
雲凍不飛

天半雨晚風一捲出山頭

題楊柳參差揜畫樓

年年憶別水西流儘日無端倚畫樓恨殺綠楊  
遮不盡斷魂煙雨盼歸舟

畫二

離情飄落滿江濱蕉雨梧風正暮春忽忽野鷺  
聲欲碎樓頭莫有斷腸人

其二

秋山樹色雨餘新片片飛紅間綠蘋誰處簫聲  
莫嗚咽江頭多是載愁人

懷歸

歲月笑人人不省晨昏謀事事皆非豈無意赴  
雲霞約奈爾江花牽我衣

其二

病中不飲春風減病去銜杯又別離從此無聊  
何處是日沉山半下樓時

夜櫂

裁就新歌擬四愁笛聲煙斷百花樓平波蕩得

雙鳧嬾柳線斜牽月一鈎

娥眉疎

猿穴陰深山外雨雁聲微渺月邊書空林可惜  
無人處誰坐危橋待玉如

西湖感

有序

與黍回來玉相感湖山之瘁謂以今日  
西湖比西子西子恚矣然安知非病心  
時也湖山憐我湖山豈受人憐兩君憐  
之兩君之湖陽也花粧零顛自是關情

而予與俱憐愚矣然不有急淚乎當別  
有致憐者作感懷詞投兩君

瘦山瘦我相憐病山半呼人鸚鵡低片影凍飛  
雲玉晚爲誰畱夢竹枝西

閨怨

樓牕不啓少風吹樓外梅花多雨時待得信歸  
人已病開書猶訂百年期

秋倦

得意閱書塵四壁鳩子一聲寒寂寂夢情宛轉

入香煙曉簾卷出西山碧

郊送

十里送君君馬肥君遊酣快我何依馬頭一揖  
嶺雲沒孤袖披離煙雨歸

霞望

莫言霞影虛無相良藥奇書妙友人豈但百年  
常伴我不妨攜去作來因

秋病二首

書來恰好命猶絲欲斷還牽幾箇時承問病容  
難寫報請看秋盡野棠枝

其二

藤蘿四壁秋光暗一卷書收郵復親獨酌連宵  
多半雨勤教風景莫欺人

嚴灘

灘頭步步少平波何必魚竿讓局柯心被野雲  
畱不放敢輕名利奈緣何

錢塘

二十年光不可追止餘花草又將萎所期久負



錢塘月夜夜潮忙問送誰

遠行

花自雙枝人自分既成同調自難群單飛莫說  
無諧侶五里前頭有片雲

新相識

久聞情致果翩翩前此風流忍記年酒罷欲歸  
雲未起殘花偏問玉人憐

蚤

春鳥春鳥何相擲誰似寒蛩故相惜不向合歡

樓上鳴來同抱思吟秋壁

雪

一夜青山換眼看楊花斷處絮雲盤飛觴莫賀  
明年瑞幾處空閨添暮寒

古意

據夢尋真事明暗卽景思前懽久暫聽蕉訴雨  
聲起垂看我隨燈影濃淡

失意

墨尚淋漓白練絕柏脂蘸冷鷓鴣血一時雙照

鬢顏羞天上玻璃杯底月

秋恨

夢日隨行行更疾情堪飛到到何如審君去跡  
唯秋草不令回風寄妾知

贈別

幾片梅花飄月碎一盃霞影報妝成情仙應與  
天緣近豈向人間學負盟

行

風迎得意花情遠酒入離歌愁力彊勸子樓頭

休目送畱儂未斷一絲腸

名歎

鶴非霄漢枉名仙人在圖書空號古總與人間  
緣不長湊成三字傳何苦

秋興

曲入灣頭更水清秋風有意點殘英江花本是  
無知者恨爲騷人說動情

寄意

曉飛簾雨暮飛鷗別未旬來夏已秋欲識倚樓

望何似試從煙嶺一回頭

春興

雲隔重樓面相失西橋帶過新弄瑟誰吹流酌  
起春風小鳥銜花贈求足

春閨

宵來輕雨蕉聲送蕉雨流情情欲凍燕領春風  
窺幾時開簾放入天涯夢

感慰二作

十萬言書一布袍嘯聲道處馬猶矯霜斑爲寫

客腸斷劒怒欲髡頂上毛

其二

誰笑當年是畫龍每於時到顯奇蹤一羣墨鳥  
鬱飛去山腹空林泉萬重

賦別

風來何處馬頭玲遠遠幽簫山遍青對此西風  
元欲淚况攜杯酒坐離亭

驟寒

半籠牕碧雲虛點葉不藏巢鳥悶秋唯有故園

花未散最遲小蕊更風流

夜集有贈

笑語籠袖情眼垂芙蓉隔坐微香吹雙心結就  
藏杯底月色滿堂人不知

瓶梅影

壁側殘花人夢冷頃刻梅花換千本童子行來  
遮破燈可憐半折梅花影

集楊女郎

天涯別久鬢相依飲少談清客醉微盆水灌花

連月倒枝枝盡挽素娥衣

悼

接得鄉書且勿歡良時花月少平安相知泉下  
人間半生死於今平等看

戲贈

滿山殘月影朦朦幾世緣來狹路逢袖底半承  
雙靨笑桃花何處借春風

送人

金鞵整罷雨滂沱得此淹留半日過苦盡挽君

君不住淚情輸却雨情多

悵

牕影疎疎未小春亂煙鋪地野棠新南風琴遠  
西風劔愁喜雙吹總誤人

秋懷

秋深落半家園葉不得牽回游子情樓外鏤鏤  
西去馬從他無數遠歸聲

柬寄

勉我淡心多謝病贈人情語亦還癡白鷗漁父

相期久唯爾功名好自爲

春懷

雨添花色還愁雨花受人愁不顧人難道玉門  
關外客年年燕去不知春

羨閒

水流自在行人險風徧千家游子酸閒客懶花  
無底事杯前日與共盤桓

別

莫向前途回首思花寒草病客先知持樽勸謂

自始集  
卷六  
隨行者倦馬霜高留意時



國家圖書館, NATIONAL CENTRAL LIBRARY, TAIWAN, R.O.C.

自娛集卷之七

長洲俞琬綸君宣著

序

陳古白南園日牋序

余與古白讀書南園三年揚摧今古目示心許  
無弗洽也而吾尤師其文其文每成必細心摸  
倣之間得一相肖語氣輒驚喜不勝而古白亦  
嘗訝其合謂不復可置辨嗣後凡遇坊間諸刻  
卽程墨房稿俱不喜覽覽亦不經意惟於古白

文津津也古白又讀書梅花樓又毘陵未必日  
與朝夕而吾令人往來索文不絕於道自吾摸  
倣以來無一文不歸吾篋囊入吾胷臆也古白  
所遺失者吾有之吾所遺失者亦能以記憶錄  
寫之共得若干篇私付之梓先是唐君俞已梓  
梅花樓日牋吾今所蒐輯曰南園日牋者從舊  
合梓名也因以拙撰小題若干篇附於後蓋以  
自鳴其師之之苦心得之摸倣者如是非敢言  
同調也

### 何侯兵錄序

予讀書遇不了意處輒累成編帙叩翁杖屨前  
問之未嘗不滿志而反而知翁胷中泓然不可  
涖也檢其案几間無一書不手披籤記問奇者  
亦復不虛坐予請於翁曰翁蓋有所纂述以行  
於世翁曰予之讀書予之所喜而必有所纂述  
毋武健之士借藝林爲終南邀當事之一盼乎  
有鄙而不爲耳無已則亦言予所當言者有兵  
錄若干卷固予平時所究心老而不能忘情者



予爲是書卽如汝家爲制舉言卽謂予托以自見而亦予之所弗辭嗟乎此政翁之所以不欲自見者也翁又豈好爲是空談者嘗皇皇懷隱憂幸不身試其言終不欲使百年無事之後不得見此錄也翁性怡曠不以溫飽易遠大之志故服政則清勤自好而埋輪積薪之日亦復究心於是是錄也非翁今日之所自見固他日所以見翁而翁廟廊之憂于茲焉寄者也是爲序

蘇子忠詩序

子忠無所不拙獨巧於詩予無多讓其拙而不如其巧蔣公鳴無多讓其巧而不如其拙然三人大畧無甚異予於世間可謂一無所知而游情遠思往往有所觸會每讀子忠詩佳句恍若竊予意中物但予不能暘而子忠暘之是其巧耳公鳴曾中光怪萬狀或暘之於詩或暘之於酒或暘之於聲色或暘之於舉子業不如子忠之獨暘於詩故不如其拙而於世間生計則拙亦如之子忠不能謀生而窮愁淒婉之變多觸

於幽情物候而雜出於詩則子忠之拙所以巧也予與公鳴俱與子忠友予友其拙公鳴友巧而巧拙間蓋有所獨解而又不在于巧拙者則我三人所莫逆於心者乎

談節甫文敘

代陳玉海

予庚戌游蘇州識節甫焉而其名則耳之久已四方之士動魄悅魂願與之同貌而共氣甚且拾其餘唾成南州之望者不少而節甫猶在蕭蘅間則文與命合乎不合乎節甫不能自信手

是稿以問路於予予讀其文爲之驚此有如此技可言爲四門闢一字者已覆而求其難遇之故弗得也寧抱癡骨不飾妍皮豈在是與節甫窶人也丘樊自好塊然無徒官不求金張之援游不求子孟之資爽然曰吾有百丈雄髮願頎然常在人前絲淚可屑金骨難毀安問長饑渴乎其文大略肖此襟度風情霜氣綽有張日橫秋之槩嗟乎命不可要也命與之安往不得通不與安往不得窮窮通自有數吾自爲吾文耳

願與節甫堅此素心勿以一時艱遇顧甘與折  
花賣眼者同擲春心也

浦麗江乞壽詩題叙

浦翁無不可忘情者而獨耽情於詩其詩有翩  
翩世外之想至道破處真視身如聚沫視壽命  
如焦穀牙使讀之者如薰悟香四大可遺矧作  
者乎乃一日持壽詩乞小序心竊疑之何道得  
徹見不透詩與識相刺謬也頃復出詩藁一帙  
示予曰天幸假幾年凡如此者又種種矣嘻迺  
信翁之不能忘情於壽者固不能忘情於詩也  
晚年之詩愈排蕩有氣骨力夔絕詞盡而有餘  
神益以卜翁之壽云

歸母沈孺人壽序

代作

歲丁未仲冬某日先中憲歸君次配沈孺人縣  
悅良辰諸賓親欲寫西池之頌以壽之而謀於  
予予曰是迂而無當不如卽孺人之生平壽之  
自昔華筵隆起隔世彌奕卽善貽堂構必有克  
襄之者王謝已非燕泥如故卽善襲弓裘必有

克翊之者然此兩大任七尺男子所難而頌婦  
德者類爲不情之譽不曰相夫子以啟後謀則  
曰勗後人以繩前武母太甚乎求其實堪是者  
殆唯孺人予自與中憲定交杵臼迄訂盟林泉  
每把酒言譚輒侈有孺人多述其婉孌不凡之  
行中憲卽世予曰其子卽藐諸有孺人在其代  
政於家必有大可觀者中憲內不獨一孺人孺  
人實能以恭順溫只得封母太恭人及恭人之  
懽孺人止一子列爲季而閭伍相傳仲季竝出  
其腹蓋伸出自他氏而孺人以中憲命撫之幼  
而含飴長而和丸一如己子二子童牙嬉戲時  
卽以後先之義誡己子令勿踰於是二子相得  
甚懽而里人亦遂忘其有二母耳中洲河濟之  
歲會予執鐸長安天罰我桑梓踵歲菽黍不爲  
聞吳之瘁民多有活於歸中憲者予深心德之  
久而知是舉誠義出於中憲而卒成於孺人之  
所勸勉噫推是而中憲歷仕中外底宦成絕不  
以苞苴汗家人所至名聲斐然或荷所贊助多

也孺人刀鏤旣解唯日抱痛悒迄茲數餘年蒿  
牀布茵煢守一室禁足柵外雖蘭茁滿庭脩澹  
競進不爲一破顏但切門祚宛然舊物何在日  
舉先中憲矚望後人之苦衷言於其子而已令  
子素負大志事母尤最孝無不曲意將順於是  
愈以其勗勵之語迫衷而勤於學復體母氏之  
心善遇仲兄子使與其子同外傳而倍爲鞠養  
之孺人愉而曰吾不以異母故薄視爾兄爾亦  
能不以兄子故私視爾子爾真吾子矣於是里

人至今相傳仲季俱出於孺人而仲子之子亦  
帖然自信爲孺人孫也嗟乎中憲固勇於義者  
然世豈盡乏中憲而丈夫子氣或不無繞指於  
嬾人義終弗彰令子固善繼先烈者然世豈盡  
出令子下或生長豪貴目不睹俎豆之容而荒  
於嬉竟碌碌後人故有樂羊子之妻而爲樂羊  
子不難有周伯仁之母而爲伯仁也不難孺人  
一簪珥儔聲不聞戶外丁承前裕後之任而兩  
玉於成果性植與抑讀書了大義而然與孺人

甫五十予以通家誼爲諸君子紀孺人聖善之  
一二以觴孺人白日隅中北庭翦鬱今以往今  
子將集百品簪裾進九霞長蹠而寫千秋而予  
亦爲諸君子操不文之管紀闡德於方來政源  
源未有已也是爲序

壽顧雲門序

局促者造物也缺陷者世界也吉與而得凶愛  
推而得咎天布也世上數奇命薄如某輩毒濁  
沈淪福輕如羽而莫能載良不足齒其壯年金

紫縱橫四方景耀珂里人爭歆之福爭歸之迺  
爲子孫奴邀人世升斗髮髡齒殘偃仰匍匐訖  
不得休猶之乎據槁梧而瞑也雲門先生少年  
負才華未幾雋都試造物殆將以人世金紫偃  
仰匍匐困公而公灑然弗受吾等嘗曰人生如  
公所得於造物獨奇矣儼然以姓名入天府則  
鄉紳國髦也耽淫圖史耕烟曠傲瓶花爐燼自  
供亦風人月客也間亦從少年場陶情歡伯促  
舞徵歌亦酒徒芸叟也輕屐濟勝短艇薄遊亦

山翁鈞侶也婆娑世上不問生產而福智壽臘  
得全於天又安禪散聖也公以是當老而傳而  
髮墨齒玉若始孩者而不智者或以靳公一金  
紫爲公憾則公之冢嗣久以妙才步公之武曠  
瞬爲金門貴賓而仲季亦翩翩如蝟而起則造  
物又何嘗靳公金紫哉某等或謬與嗣君商研  
席而獲公之愛者或以辱廁姻婭邀寵於公者  
或累世交好爲公之子弟者相與謀所以壽公  
迺卽公之生平行樂所得於造物者壽公而異

日公之諸駸駸挈緋衣偃手墨勅封悅公以金紫  
而公嬉嬉然食天家酒也某等願竊而窺焉

壽張老伯母序

吾兩家累世入金蘭簿矣宜老伯母及縣悅之  
辰諸兄弟繪西池爲頌而屬文於綸也其與仲  
子齒夙商研席而父事伯氏兄事伯兄弟友季  
子諸兄弟與綸同迺以世誼顛悉其內政則無  
如綸也伯母相夫子及課伯仲叔季及御家人  
大都法主嚴蓋伯氏同吾先人皆有蕭疏放浪

之癖吾先人并不爲家計而伯氏齋用經耗則  
壹綜理於內先人有酒狂視官爲浮湛影可以  
有無伯氏剔繁劇繇郡歷藩臬約三十餘年而  
帷幄傳警紀綱馴戢凡令勤於官而逸於家責  
蓋在佐之者矣先人不喜課兒母課之伯氏亦  
然然綸止一人耳伯母多子何術而咸使憫然  
脩行不矜羞伐且恢奇多文名善所學義不得  
姑恤如吾母是以仲子崢嶸頭角矣恂恂若處  
子目不及華飾門無襍質惟吾諸兄弟髮燥時

交十數人時通雅故計亦當年有從墉間品題  
者因至今存可耳今伯母春秋七十視吾母五  
年以長吾父與伯氏竝負才華後先雄飛其貽  
貴於室翠帷羽蓋之榮兩不相下綸與仲子季  
子同業父書爭途策進則彼此俱有承先之望  
可謂匹敵已然吾母未五十卽詠栢舟含辛食  
蓼爲母而父需綸於有成而伯氏至於今玉立  
豐儀顏酏而體頎方來宦績引於川日而膝前  
相繼起者且得邀尚方之宜城進九霞以壽二



人則吾母若母縱並臻期頤而壽吾母多矣

### 壽郭老序

翁春秋七十而顏若醅齒若玉神清而脫形喟而體頽俞子與張子遊望而奇之若何人斯其邃古之遺與張子曰此郭老也其人無綴宅之術而得長年之理如古至人生於芳埃游於大孰此老不能然未詣至德而廉於取咎不無嗜好而拙於取盈家以儉饒里以和譽子以教成神以澹休樂山水狎禽魚名花醉客條風快歌

吁嗟乎造化跼跼生於其際者類爲其負之而走以侈望而得嗇去以嗇去而得沈滯以沈滯而得萎枯忽忽而適盡者歲冉冉而愈弛者形若郭老者吾知其免乎哉以不可必之者願食後晷之餘榮不敢邀在天者豫爲翁慶獨登其堂白髮雙脩爛爛滿膝蹠而前進東海之籌獻南極之頌而翁且遺形放心啾啾焉俯孫枝而酌宜城也其又奚羨乎

### 壽伍孝子母序

夫漆髮養子白頭依之丈夫亦然况嬾人乎少  
襁褓長讀書壯有室辛勤勞動以爲子謀半世  
去矣及壯而匪母靡依者衰於妻子甚詎語箕  
帚幾若路人或貽之憂貽之辱貽之憤恨噫爲  
其母者卽維祺何足壽哉愈壽愈囚繫耳伍君  
孝子也孝子所致於親者胡可言狀形不足而  
聲聲不足而氣氣不足而神神不足而漠親不  
知人世間有所謂憂辱憤恨而孝子以爲無時  
非憂辱憤恨其親然則人盡母也何獨伍母所  
得於天若此厚哉天不能以西籬下九年粟與  
孝子而使之貧君不能使孝子如馮唐以孝著  
爲郎而使之賤然蒿牀布茵蓼食糲飴自足娛  
親何必板輿輕軒嘗君之羹而後爲隆奉哉昔  
母有不可爲之疾伍君效崔浩剪髮截爪禱北  
極以請命乞以身代上帝假之錫母以上古之  
壽而今始六十也淥水奏曲桃花佐觴娛一生  
平無憂辱憤恨之母真壽母哉

壽談母序

憶少年負氣時每遭一蹶亟呼甕頭春歎曰老大不遇退而讀蔡葵汜勝之書無難耳今頭顱古矣顧影此惟而高堂有盱衡而望者不能忘情竟何以自解予生於丙子與節父同春秋吾母半世詠栢舟與太君亦同孤苦母父母師勤劬一生而有子如吾兩人何如無有乎蘇端明送沈遼詩嗟我與君同丙子宛如言我兩人如予僕邀之質不知何底然儉歲之稷寒年之糲猶得活吾母節父將奈何節父抱奇貧遇奇困

而才華襟槩益奇然自恨無以康太君而太君固習康成餘業能以青箱隻眼節父信其非長貧賤者於是視蔬水猶柔脆而節父益得安心肆力於文文價貴於四方四方之英無不折節事之且多借其力尺以起聲譽鏡葉裹限日不暇接儼然作文家山斗矣其伯子亦翩翩摩天手也與之同調廣和神鋒雋氣大略相比用岱摧繇御二龍於長途此時太君欲辭富貴得乎而吾兩人同丙子之歎彈指且天淵矣戊申之

嘉平會太君設悅之辰諸兄弟進千齡之觴而  
予爲之文



國家圖書館, NATIONAL CENTRAL LIBRARY, TAIWAN, R.O.C.

自娛集卷之八

長洲俞琬綸君宣著

引

會課引

代朱按臺

觀風觀士風也可一寓目知之而必欲與士之  
性相習則非習其文不可於是焉有會業然而  
會業具在習其文久矣而吾所習者猶然風也  
則是刻也毋亦脩觀風故事而與士相期乎若  
世之僞理學者侈談性命薄舉子業以爲伎倆



也夫指以爲伎倆而理學於是乎僞唯舉業有  
弗精耳夫其精者據案沈思神游千古刻畫名  
理抉剔道奧以聖賢心發聖賢事此時一具肺  
腸純是理窟此非性命誰其性命者而目以爲  
伎也恨其藁未脫而聖賢去案尚據而理境昏  
科名拾而敝帚棄雖目爲伎也亦宜然獨不思  
升堂鳴鼓而談道者橫經拜手整華山之冠發  
青谿之諦於謳而玄冥玄冥而參參參參而疑  
始佃漁六學直追無上奇矣而談鋒寂而講堂

虛禮法收而燕娛處六鑿至而寢兵來則又何  
異於士之對題咕嗶精理悠然而案尚據而空  
睿者乎則士於此不必相非亦不必相慕第不  
可不借其鄙夷爲薄伎之言以自警試與子涉  
佳山水遇好風月凡賞心樂事每事去而心不  
忘況面題矚理聖賢陟降照千載之真源獲本  
來之至寶恍乎天游重闔之如故而忍使爲燭  
光爲漚影而瞥然而僨然爲蚊蚋相過乎前而  
弗見耶夫士也養胎而待用者也胎何果證吾

直謂舉業是焉視爲舉業則雖壁合星稠猶夫  
書巖筴塚不幾文肆而質儻誠視爲胎元果證  
而三寸竹爲情條一側理爲行葉何必幽性而  
玄命碧慧舌之鋒機爲而吾復有感於談理者  
每拈一書自不能爲理外之理而又不欲以餽  
飭示拙乃援乙之旨爲甲之疏迤正解而搜旁  
義要以不便於制舉業爲奇乃士爲制舉業又  
窮探性命之微一吐程朱之故而士之知性命  
卒未有窺程朱之一班者無乃性命與舉業一  
致而舉業之玄竅又不出程朱之齒牙乎請質  
之諸士

張仲防稿引

吾翁若翁年齒伯仲也意氣伯仲也杯酒嗚噓  
風月疎狂伯仲也所得經奇一時文價伯仲也  
及吾與兄年齒伯仲也意氣伯仲也俱有父書  
可讀伯仲也遇輒偃蹇計無所之而游成均伯  
仲也然吾困於奇薄顧影自憎文章之興索然  
唯小題稍喜爲之故與陳古白合刻日牋多半

小題至經稅生平無經藁卽有坊刻皆竊古白  
文文其陋兄從宦游多年久不共商此道邇得  
經書義二稿大爲叫絕如芳花過目名泉著齒  
但知色香不能擬議談經尤直追先儒非不刊  
語不道多年何所修爲而所得之奇遂至此若  
兄者真能步前武者矣相對話舊不無思先輩  
之風流而其子之賢不肖又不甚相遠哉

太淳文引

明淨如妝妍冶如笑飄妙翩緜吾鄉文態也四  
方動魄矜美太淳獨謂予曰吾先年亦好作此  
態竟思胸中自具大觀乃憑蝸背爲盼附蟻蠓  
而游囿於風土習此小言後予讀書園南室每  
出新藁示予殆半菽慳子遇錢甃麝壁唯有驚  
歎不知所從適梓人在坐隨付之以榜四方曰  
吾鄉固有此雲蒸霞蔚瀾空漫海之文而若爾  
動魄而美者則蝨脛蟻肝薄爲小言不足道者  
也

子灝文引



文曲降而子灝生蓋徵之子灝之夢云東壁掌  
天上文籍而司人間之貴然人間之貴非其質  
也故子灝年少貴矣羣眎爲齡霄上人而子灝  
自眎爲麗壤下物余語子灝曰必處何境乃當  
子意子灝曰吾能以揮精劒斷五濁腸矣夫安  
得斷五濁事乎噫則子灝所從來可知已故其  
奇趣多在碧羅虛落之間其所讀書多好鍊圍  
金地之語其落筆運思多出月露風雲之狀率  
而有所欲鳴則率而鳴之於詩間抽情抒每結  
愁霖大要不可一世之意居多子灝子灝殆欲  
以人間苦境苦情謹使金衣雙鶴銜飛雲錦書  
爲報三十六皇耶

自引

人生苦境多已至我輩復爲舉業籠囚屈曲已  
靈揣摩人意埋首積覆醅之具違心調嚼蠍之  
語兀度蘭時暗催梨色亦可悲已鳥弄春晴魚  
翻浪雨人獨無情乎偶輟依吾而咏歌寄意此  
亦水泠花笑鼓舞於天然耳迺仰面看梁空齋

蹋壁斷鬚擬議嘔血推敲懷曹氏之餘鉛陷唐  
人之棄唾竊彼齧肉餵已枯腸竟忘嘲吟之始  
意謂何是自以籠囚之不足而益以枷鎖也予  
不能爲工亦政恐其工趣來而成調原無絃上  
之音意止則忘言不强曲終之奏或佩纒贈語  
或椒醕寫哀觸雲物而書空挽鬪酒以濯足聊  
率癡傲而已有女子披帷鼓琴作楚明光曰非  
豔俗所宜巘谷自娛耳蕭賁作畫咫尺內千里  
爲遙敬慎不傳曰以自娛也故予亦嘗以自娛  
名此藁想月卽是爲月想酒卽以爲酒想歌舞  
想山水卽以爲歌舞爲山水始嘗以赫蹏書之  
遇人至則疾卷置袖中偶不得已而人見之已  
大非吾意乃復謂某字未安當易某字削去某  
句當是全璧等語豈不愛我然距之則我負罪  
受之則此稿負冤有雙袖蒙耳耳

太淳戲擬十義引

命不可必乎文不可必耳玉良必碎器完必敝  
才美必忌而人盡愛才不必識才盲子布星脉

猶鬼神而堂堂司衡不必不盲予曰雖然必求真命則盲子皆餓死必求真文則先達皆困死姑妄言姑妄聽以命戲遂以戲靈也舉子之彼岸戲場也欲入戲場不飾戲具烏乎能得故九十其儀不如點檢傀儡神哉傀儡酒散局收傀儡不愁明日載燕傀儡復現此天下之至文也遂無處不生活此天下之至命也予不善文能善戲太淳善戲恥爲戲會柯山有期與余同客見余傀儡其形朝戲而出暮戲而入因亦伎養而戲爲是是凡五題蓋予爲信安士子左執簧右執翻鼓率而爲戲者也予因謂曰爲越歌者三百人爲吳儂者一人慮無以相詭遂從而演之演爲十義初猶驍壺累卵戲也漸且戲擲到戲高絙漸且戲乞寒戲潑胡而觀止矣觀者大叫而戲者不言唯張厥海口啞然而笑

王瑞卿宮詞引

嘗戲與友人各擬長門怨十首集漢魏後諸詠覆几間有一語髣髴道過者罰巨觴予罰二觴

迺另構新意補之而索然矣九畹示宮詞百首  
翦雪裁冰梭雲織霧寫宮掖中芝童桂女之麗  
如萬斛金珠恣取筆端而樓東怨居多避前人  
齒頰如讎幻出新景以文人錦腸繡肝極宮閨  
粉愁香恨必不許後有作者安得長安婦五輪  
瓜發諸細嫋長喻與琳池房中並歌使王仲初  
費花藥二百詞黯然無色也

林若撫梅詠引

與林若撫結歲寒盟爲千古人懷千古心相期  
而不可以相喻落落者吾痼疾也此期一訂於  
落落更宜一抹交情類蕭然有寒意於若撫則  
尤寒蓋兩寒而寒愈冽也冰入爐火有消而已  
必不變而爲火此寒德也濯錦江邊殆與棘門  
寒塘徑遠然豈千古懷哉然又不可以不慮若  
撫特於湖上作梅詠百品頽然而來以詩擲吾  
寥然而去懷哉懷哉其嘯也歌隴頭雲遠花落  
春枯千里霜根一函寒意是豈在梅是豈在詩  
也

吳康侯文引

康侯喜與諸名士游諸名士驚賞其文席之甚謂足空海內予不信問猶龍猶龍云未必然壓倒吳人士矣予復不信問愚公愚公其師也故爲抑康侯語謂堪壓倒吳下諸年少耳予曰何易視年少文固年少事也意興佳情致濃名理淺故其文顏芳而意喜不可強也如寒塘古幹不旣傲然遠秀而非鄰以花榭傍以名石蕩以春風樂以詩酒坐以美人過者不一憩於其下

凡此盡得之年少吾輩不能矣康侯飲日月之華而生生具繡腸腕多儻采信與諸年少不同然春風花榭奇石美人得之天不繇師傅至其蒼然之榦深本發長若似從風霜久鍊而成者則師之功詎少哉而嗜與諸名士遊亦不無畀云爾

張伯雄選許子遜稿引

元局元度元脈凡會元類得之然不善學者類病枯寂庸淡蓋猶是人間藥草固能卻病亦能

殺人子遜於局與度與脈之外別有仙采其行文在水雲邊驂鸞馭虬萬里蒼茫睫眼徑度不問善學不善人得之如服碧奈花琅玕寶南燭草爰而身輕但恨人間不可多得吾方恨其少而伯雄猶以爲多去不當已意者而僅存若干首可謂去形存聲去聲存氣去氣存神去神存漠觀伯雄之選而伯雄之造可知也識道之年顧若是蚤邪仙乎仙乎子遜風扶肘下白日飛昇伯雄褰其衣不久將亦飛去吾願爲伯雄雞犬不得已

刻時秬自引

茲集凡三百篇友人曰過多矣盍善藏拙余曰此薄情語也凡不得意文皆思路不開時所作踣壁苦唵燈昏據案神瘁欲僵氣憤欲淚如此苦境諒我與子俱嘗過矣才不才皆吾子也秀穎者吾愛之彼以駑而受賤憎惡不已繼以敲朴吾憐之吾於憐之者尤睠睠焉

宛似歌引

原博之與楊郎善也起于手語色授相得於吳  
舫杯酒間酒罷席茵苑陌低板輕喉翦水酌唱  
已而唧唧附耳者久之竟不知作何語今繹其  
詞意蓋語此後及期如楊楊嬾容素琴以竢共  
載橫塘留三日辭去曰相與之私何厭久長然  
泥塵委質搖艇月中當在何時周感其言許荷  
衣一解卽金屋置君楊謝曰願得一言以券乃  
爲是歌備寫其初終合離之況云

打棗竿小引

街市歌頭耳何煩手爲編緝更付善梓若欲不  
朽者可謂童癡吾亦素作此興嘗爲琵琶頰陸  
蘭卿集二百餘首間用改竄不謂猶龍已蚤爲  
之掌錄甚富點綴甚工而蘭卿所得者可廢去  
已蓋吾與猶龍俱有童癡更多情種情多而寡  
緣無日無牢愁東風吹夢歌眼泣衣吾兩人大  
略相類此歌大半牢愁語聊以是爲估客樂每  
一宛唱便如歸風信鶴平時濶絕者恍然面對  
天下多情寧獨吾兩人乎如以春蛙秋蟬聽之

而笑爲蚩鄙笑者則蚩鄙矣歌不足傳以情傳  
巴歌擢歌踏歌白苧歌吳歈歌或入琴箏或供  
詩料至今有其名是豈在歌也

題跋

題日方越吟

千里命駕或芬月也興盡輒止畢竟興淺何言  
此處同風月薊北江南萬里情所同者風月耳  
灘塹流逆山深雲凍新兒在室游子思歸風透  
紫蕉爐寒氈帳其睡中來乎當亦奇夢非夢矣  
吾以爲夢也蘭塘棹弄因奇夢而有奇吟以奇  
吟紀奇夢夢破而吟杳司香送果者亦懷而去  
乎月落潮平是去時誰作此斷腸語又惡得不



以爲夢

題畫卷後

友人題劉先生畫卷示予乃畫唐人成句凡唐  
句有卽景賦景有借景賦意芳陂玉澤雲樹烟  
山快風涼月景也中有遠情不可言而言于言  
外意也意可畫乎予每披一圖恍然以爲是詩  
徐復按圖求句反不相類嗟乎神手矣句中  
有畫無有句所無有畫有之不傳景而傳意神  
手矣

自娛集卷之九

長洲俞琬綸君宣著

祭文

祭張幼于先生文

公於先子稱忘形而於綸復稱忘年綸何人哉  
而迺與忘年亦足以見公之奇公一生奇而死  
更奇閭里接公之奇狀百出無不怪而笑公言  
及公之死又無不怪而笑公嗟乎不知公而但  
見公之狀與公之死烏得不笑何怪乎里人哉

然則公之死當唯是風雲帶憤泉石下愴不復  
可於人間求痛公者乃一日遇東浙人數丁相  
與集舟中齒及公之死一人云太白扶風豪士  
歌天津流水波赤血白骨相撐如亂麻不意爲  
幼于草堂作讖因數人相對垂泣綸以爲皆公  
生平交也而曰曾未獲一識面噫此可見公之  
爲人不當於奇不奇間求矣

祭黃麗江

代歸郎子

時女夷之司景兮公獨罹霜秋之玄月覽翳鬱  
於修岡兮風淒緊而傷切聽華亭之鶴唳兮度  
蒼山而聲咽撫長劍而興嗟兮緬懷公之遺烈  
生得五茸之秀穎兮礪山川而瀟蕩攄才采以  
紛綸兮擅斯文之龍象甫弱冠以登朝兮聲颺  
舉而雲上紀歷仕於中外兮賁瑤琨以篠蕩晉  
彥謙之惠化兮醉彼民以春風兩珥筆以升闕  
兮肅桓典之豹驄及左馭以前驅兮有潘尼之  
靖共秉操目爲清卿兮抵宦成以無營有偉人  
之卓度兮器沉法而莫測進鞭雷以駭電兮退

潛虬而民迹辭日月而耕煙兮讀怪書以消寂  
集玄圃之長蓀兮採南國之蘭苗羨絳趺而朱  
萼兮何葢葢而薦香奮摩天之羽翰兮竊上府  
之球瑯寧獨貽謀以大門兮尤且危扶而義匡  
爲我曩之岸粵兮伏塊壘於谿旁伶仃藉以獲  
蔭兮感澤及於枯骨每一食而三祝兮胡舍我  
而奄忽雖形化而神存兮望金鑣而莫卽謹致  
辭以鳴痛兮淚與情以無極

祭何鳳老

於惟我翁古貌樸心和於春靄朗於雲泠高情  
霧薄篤義淵深丘山一諾重於千金緝柳編蒲  
少有書淫秋風不利困于青衿遂遊國學俄廁  
宦林然而仕宦實非素襟貳宰仁和琅然鳴琴  
仁和之衆沐其膏霖參軍南粵骨益嶷岑清白  
自愛上僚所欽遷客散吏鮮不牟侵世尚容我  
孰肯投簪翁乃灑然懸輿高吟卓哉古賢迺得  
于今菟裘自樂庭柯蕭參秋花貢妍春禽送音  
兒孫衆多顧以自歆兒孫遭遇聽其浮沉翁之

仲子爲國之琛始分研席旣結姻絃私爲翁喜  
寵命將臨胡爲遽逝逸不可尋先輩凋盡痛極  
而暗聊薦短章用將菲忱

奠宋翁

吾儕與翁子汝章同研席因與其兄弟並爲垂  
髻交卽最後者亦不下數年而翁未嘗不撫而  
厚期之乃迄于今懷刺敝矣雖囊無恙豈翁之  
心哉吾儕亦竊有以期翁者則汝章一朝摩天  
去被綠雲衣集雕輿之侶爲翁寫千秋尊也嗟

乎某等誦瓊餘年猶不信瓊誕壁上楮其身以  
副翁之期而所以期翁者翁遠望望然不少顧  
邪翁性溫煦和霽開豁涵塵襟而靜躬奇美而  
恬操纖儉而雅際有無多寡而寬大過人徵貴  
徵賤伍競巧之場而養疎拙吳趨薄俗閭市尤  
甚而穆然有遠古風如寒塘老榦樹之穢塗的  
鑠固在也汝章諸賢復競出箭筈畏佳以演其  
盛翁曰謂連理何獨俯此繁森也遂翦一枝續  
棠棣之後是卽吾汝章汝章事翁不以是故小

臧二賢此其無窮之心期以富貴翁者豈反出  
吾儕之所期翁者下哉學不汝章而尊榮其親  
壽逾翁而食子之報世復不少而獨靳於翁茫  
茫蒼天胡以問之橐挾良金寧終歌玉席帽有  
日離去獨奈何無以解生前之顏而僅得傲有  
子于地下也豈所以爲翁期者乎

祭傅子晉代

嗟乎子晉翩翩玉人年少勇修孝友特聞時未  
總角登高四驚才名鬱起雙掌蛇文挺之有兒

咄咄琪琚撫爾器愛曰吾家駒吾子何人竊附  
尻輿意氣相許文章夾礪寧直姻婭兄之與弟  
猶夫若翁與我交締嗟我兩人共期白首爾輩  
定交甫離杵曰瞬息幽冥負此良友才情何在  
幻結蒼煙彩毫繡腸散作芊眠邈矣高誼還付  
雲天嗟乎子晉鍛鱗摧羽生也何來長白山主  
死也何歸修文紫府空羣神駿歿亦權奇悲哉  
若翁何以自怡繁英森森剪其長枝繞膝二華  
一歸草露矧有孱孤呼母而父親彼燕樓淒風

黯度謂而躁薄性質溫只謂而神嗇玉光豐起  
反復靜思而無天理豈其芳名鬼神所忌劍光  
永埋文星已墜四方之英悲歌聚涕余奚若人  
曷勝痛邑有淚可枯情其何極灑酒爲文吾子  
與側

祭楊培之

嗚呼楊子白晝少年白晝不難子才則仙我之  
與子若兄與弟弟上聲偶一對面躍然而喜言語色  
笑忘其所以人皆謂子尚有稚氣子非稚也以  
世爲戲且戲且厭并世亦棄人孰非戲子戲獨  
短雪泥宛然飛鴻則遠嗚呼楊子泡影夢幻白  
雲去來虛風聚散痛子腸裂欲狂欲死雖不能  
死病狂不已狂與稚較大約相屬子稚我狂如  
笑如哭狂發之中楊子在目

祭歸爾昌

嗟乎予於爾昌誼屬傳肺故爾昌死造其堂而  
悲者如市蓋悲死者之窅然而吾獨悲生者之  
莫倚顧此瞿瞿失怙藐諸翁齡髮髻而毀容不

三十而崩城是予之何人而寧不傷情傷我情  
惜爾死少秀穎而稱僕僕咸以凌翔之器相屬  
許而卒不能天實與之痼疾而摧其羽形則痼  
神則智六年以來唯臥而治靡不關掌而籌計  
瞰室之鬼宵媚之狐斂容而避吁嗟乎傷情參  
華構堂一人柱撐丈夫所難而以遺榛筭之婦  
苦塊之孤何以克能生者躬儉而操瑟不如死  
者之蘭膏而鼎食生者勤昕而苦夕不如死者  
之高臥而指畫是予之所泫然悲而當亦死者  
之所哽咽而咄喑錢鏗之壽不可延陶白之積  
不數傳幸有子其翩翩美頭角其軒軒撫帷牆  
而喪所天可以俯膝下而娛未盡之年惜餘年  
之莫度不若和膽而勤爲助慨奉匱之惘然不  
若易書而嚴爲詒孝子懷親而永慕不若規行  
而矩步大宗祊兮有人用起泉臺於不暮

祭申晦之

某年月日晦之卒結衾蓋冠棺卽人世者及月  
于茲矣姻弟某以庶果清醑造寢門而哭之於



乎晦之竟沒耶余季女弟甫悲獨旦姊氏嘗憐而憫之而亦踵而罹此凶邪言思爲位之哭不越月而再舉吾生寧已而堪此里中舉高貲巨藏輒首歸金門鼎貴輒首申謂一氏二女肩齊而得所歸矣孰謂負薪鹽井之婦所未嘗之苦情亦肩齊而受之乎然而姊氏校甚已子昆衆多撫諸弱孤而需之有成筋力易銷肩政未息也白髮尊姑晚晚而負建鼓代子爲色養者豈宜復重之以戚吞淚而進之柔脆以貽死者安也又所極難晦之才華重於士林元龍氣橫中原簪筆掉頭可竢爲其內者不能無匹貴之想而芸牘風林聲華草露復何以爲情晦之士之賢者也才健而行廉質譔而文愛雅嗜讀書學日積孝友篤隆家日稔趨步繩尺信義以與友日譽高誼不減杜季德日聞欽然虛懷目不見華軒貂冕之貴而醇謹善下衆日附性質闇素無所異好門故無雜賓志不在封殖旬修月會之事多所弗屑家故無紀綱之輩天無親善是

親種德如是將邀天之寵寧有旣而竟沒邪人  
生至死真性具見晦之將貝含家人固請其遺  
言乃一無有而唯命名其幼子益信其磊落寡  
營垂死而胸中無物廓然獨見其大棄去人間  
直猶影脫泡化可謂識理而通于命者矣而亦  
動情于生者之無依仰天夢夢蹋地而無從者  
乎天奪其壽不能奪其後斬于其身不復斬于  
其子孫晦之良可無憾而余所不能解于蒼蒼  
者獨修短榮戚無私厚薄迺亡棲失浪之悲竝  
與我二發是果有知而然無知而然所欲叩玄  
闔而問者也重泉杳然文縮而情永於乎亦少  
鑒之

祭薛雲舉

予從己亥秋見子之文而驚歎爲清才也迺因  
子之友納交于子不謂一知聞而開心寫意如  
雅故也子得不可爲之疾久矣卽子之友亦每  
歎非到頭之交而予弗忍信及將入白門探子  
肥瘦則重衾之外索索可骨而數也握手言別

涕沾翰衣子因視手曰從今一分不可復攜矣  
舟已隱而脰未悃疊猿送聲青山答響無非子  
也此江濱洲島之神之所鑒乎初入都卽寄言  
歸風問子之飲食子猶得感予意而增悲也不  
數日復有遺問而子已不活矣子生也月而孤  
子之母三年懷之十六年撫且教之迄于今而  
所望于子者無不至也善文者必達理達理者  
通于命子固不以死生壽夭責于天而子之母  
則不能不以死生壽夭責于子是二十年以來  
子之母不幸而壽不幸而有子也嗚呼惜哉

祭陸冲宇

申詳哭言思而爲位非禮也吾故不能爲位而  
奠君以生黍遂白其衣冠爲之絰而脫絲屨造  
君之廬哭君于寢門之外恨不能披君之幄卽  
君之楮哭罷阼而降見君之子長而杖哀莫能  
狀少子甫三齡亦瞿瞿而若望君之內人榛筭  
而毀容情欲死而聲喪吾不覺泫然再哭女子  
寄父母而嫁爲歸君之內人歸君三十年日望

君膺寵而蓬輝且白首而齊眉今也何爲空付  
之夢回胤子熒熒誰爲怙長而讀書誰爲詒天  
下寧幾魯九子之母而師柳仲郢之母而父人  
皆笑君之文爲庸材爲散材應淪落乎灰埃不  
知世上之材何必不庸不散而後躋乎雲階則  
君之不遇實可哀望君如懵懵卽君也冲冲若  
嬰兒之未童世盡如君吾復覩夫義皇以上之  
風胡爲乎遭天之不仁而備諸人間之五窮且  
不盈五十而云終

遙祭宓子章

驪駒一歌如絕天雨更不復上離岫雲更不復  
還榆火葭灰已十新七變而款款私衷弗能自  
白每欲卽死以白于子或子卽死以鑒予衷予  
不能死而花月之軀豈堪此磨折計死久矣迺  
夢與子風前相對倉忙閃忽不數言而辭去數  
言且不及其所遭嗟乎子謂我恹情者何以入  
予夢入予夢則鑒予衷矣鑒予而來探胡不告  
我死所也

祭若愚羽士

吁嗟若愚乞術回道人而姓亦呂戴熊鬚兮望  
之霞舉豈其鶩羣兮高玄皇人之爲侶方口兮  
廣額聆清言兮蕭瑟風之質兮雲之骨松之念  
兮烟之客塊然獨立兮無所友余神漫兮何幸  
與紫府先生後先而左右余讀書方丈兮三年  
一如夢子分我以清泉妙香隱書怪牒而爲供  
更分我以朝霞暮烟清風朗月對酒而相共神  
清兮爲仙骨寒兮不永於人間君清而不寒宜  
娛神而怡年胡爲乎捧玉清之鴻寶遽辭我跨  
蛇而朝阿環吁嗟若愚聲瓌瓌而步虛怪丹臺  
之早署兮從此人間絕傳夫太素之虎書導師  
一去兮歸浮丘駕三千兮金衣遍十二兮玉樓  
余墮塵壤兮望師不見空淚稠我欲鳴天鼓扣  
天鐘擊天磬致君兮筵几祭君兮杯水君自有  
玉爲醴金爲液奏洞簾而烹石髓遂祭君以辭  
君其知兮其不知願君拱手相向朗吟洞庭之  
濱而來歸君大嘯兮我淒傷願言懷兮雲路長

安得爲君之淨鼠每一月而三易腸

祭陳貞母

嗟乎古白甫九齡而失恃貞母未三十而崩城  
竝人生大不幸哉乃竝見陳氏天何薄陳氏也  
然予童年卽與知古白之事其大母者矣自與  
共研席締因亞益熟察其家而曰古白九齡以  
來曷嘗一日無母哉非事大母也直善事母耳  
嗟乎古白喪母幸有父若是而且得貞母爲大  
母貞母喪夫子賴有子若是而又得古白爲之

孫何謂天之薄陳氏也迺若貞母靜好嚴正御  
家有體鄉黨皆知之誠子以清白勿以苞苴汗  
家人四方之人知之銷五十年春風夜月而霜  
雪一操則旌揚之日天子知之矣而某也惡容  
贅一喙乎

祭陳貞母代

嬀人之德不令外聞孺人之德達之紫宸靜好  
永儀四懿以成迺其緒餘不足爲稱三十素幃  
兀然煢處不識寒熱不識風雨朝吟暮怨獨瞻

衡宇自此青髮逮于齒齠天子曰嘻異哉凡嬭  
人德以儀以範迺彼厥德迺聖迺善凡嬭人德  
有家克閑迺彼厥德世風以贊褒之嘉之四方  
爾勸孺人令子壯仕數年望壓僚友橐無一錢  
百姓曰賢歸德孺人孺人嗚咽曰我何能天厄  
我命復鑒我貞酬我是子慰我亡人孺人之賢  
永烈千秋僅一令子詎足爲酬所以有孫海內  
名流孝友特聞好古勇修文章鳳麟望者辟跡  
今日璠璣他年鼎石天子曰嘻異哉伊誰之後  
有此英物褒之嘉之揚爾父未報之績重光爾  
貞母之德用起爾五十年九原天者之色

祭王宜人代

郡君嫂氏毓德溫溫京陵之秀東海之刑處麗  
而淡不飾華簪貴而善下敬共特聞兄有書滌  
蒲編柳緝嫂實最之象先是責兄篤友誼蠲金  
澤骨嫂實成之相勸以德兄莅關榷節稱素絲  
門市心水牙耳懷茲昔樂羊子清風可思其妻  
同志嫂亦如之兄守承天寺人落膽萬口氣伸

孤忠罪免兒女繞指筴人氣減誰非嫂氏大義  
勸勉追唯文恪制馭權璫兄倣厥躅祖烈彌光  
凡我氏族藉以令芳因推嫂氏克贊斯煌兄子  
復賢玉瓚黃琉才氣橫絕舉舉上翰羽毛旣滿  
埃以風秋孰非嫂氏和膽貽謀自媿鴿原飛伏  
庭徑喬樹扶疎卑枝獲蔭友愛如兄心藏首隕  
誰其夾扶亦嫂之令慚我室人靡善足數嫂之  
愛之如兄愛我豈曰媿睦直以鞠撫丹忱負暄  
犬馬安補立几興拜唯祝靈長胡天弗仁嫠女  
爲殃音寂玉琴香銷翠裳方頌西池回車北邙  
雲璈引去我腸寸裂化者含笑我淚成血生死  
岐途中道棄絕仰面呼天嗚嗚悲咽

祭陳嫂

傷哉陳嫂出自故家作嬪于陳婉靜柔嘉媚德  
咸具可稱聖娃吾友仲子清修令姱嫂之輔之  
芳辣齊葩輔以業儒艱苦弗嗟髮髻晨糜龜手  
夜麻仲有傲骨耻傳炎華是以旣宦蕭然素衿  
嫂亦甘之含辛倍加一生淑嫵中闢靡瑕半世



悠悠名榮實賒庶幾有埃時發春邁無何茗菌  
中道零些曲歌暮雨景散朝霞衣篝香冷良玉  
沉沙弱女嬌兒咏蓼啼花咄嗟膝下痛母呼爺  
春蘭及時霜殺丹芽苦海方脫風墮檣牙夫子  
既貴糟糠棄遐孰無壽夭樂苦爭差傷哉尚饗  
有以子祭父者代爲之文

翁死二年翁之子思翁而求文于予欲曲狀其  
思翁之情以達其飲痛不已之意予曰子奚以  
久而愈痛也翁之子曰吾亦不自知其奚以然

予曰子且不知予惡能知之且爲子狀之而悉  
之於文也雖然人情不相遠試槩以常情爲翁  
之子狀焉而翁試聽之昊天無可報稱雖曲意  
順親亦何處非逆天之罪何歿而無終天之恨  
然果能善事之使親生前得有子之樂則雖歿  
而飲痛亦可差慰萬一其不能善事者人謂生  
前若此何望其身後之哀吾謂不然儻有前知  
者執其人而告之曰爾親當以某日死則未有  
不遽然心動勉力事之以終其天年者矣獨親

杖屨無恙時莫觸其痛心視其親如無死期者  
而一旦死便章狂懊悔摧胸呼天欲求生前一  
刻雖千金莫買真有欲生不能欲死無地者予  
誠不知翁之生前翁之子何以事翁儻善事而  
猶抱痛不忘真不讓曾閔而苟其不能則其痛  
翁也殆真有欲死無地者而翁少鑒焉

爲張皆可祖奠

嗚呼痛哉自父生我備嘗艱辛迺生若某曷如  
無生憶我穉齡孱羸多疾父之護之如卵斯翼

及父疾也寧如萬一我生差長導我明師學之  
無成寔荒于嬉甫喪吾母家故藤糾時某老大  
莫分父憂生平勞瘁半爲兒曹兒曹旣立親顏  
已凋嗚呼痛哉生于辛丑卒于癸卯六十有三  
差已不夭父雖不夭揚眉日少太嶽中崩北庭  
日實感彼赤烏自媿自憤風樹徒悲蓼莪空詠  
嗚呼痛哉父目可瞑生者何倚魂氣則靈音容  
已矣三酌椒漿一生父子

奠沈文元

有序

詞子小沈曾爲賞心之晤且手語相訂  
有玄髮歡無白首歎歎平聲后讀書山塢不  
通殷勤一日過陸處士叩及此童陸曰  
死且歸窄堵矣雙淚流霰不能一箸卽  
復還山輒夢竚立几側短衫螺髻自言  
可憐卽醒時亦恍惚顛倒隔間若有物  
繫繫迺于某日晨起乘奴子未覺將杯  
水奠之花下有文

嗟夫小沈英茗秀穎一醉不還一夢不醒膏髮  
薌銷串珠喉冷白雲斷巖金瓶絕綆堊玉窮泉  
埋香培井砌咽春波花雷蝶粉牕月懸愁歸禽  
弔枕狐兔塵封鷓鴣圖屏舍我歸冥我懷耿耿  
幻鳧蕭騷夢鳧纏緝吾與子盟腹心腸腎子與  
我俱坐立行寢脫欲離子如欲離影影有時離  
除是身隕存亡易心忍與不忍

祭胡一

爾一伎家未嘗習禮自幼于死斷棄歌舞視梅  
楛而言繭繭若居喪然其出至情可知及設祭

哭之撫棺擊胸下拜不能起從此遂病卽病或不盡從此而當此適病亦足多也病中忽忽見幼于無所怖懼一日有老媪同幼于及難者促之使去乃翻然而起顧謂夫曰卽與汝長別汝勿悲吾得死所矣頃卽氣絕嗟乎幼于卽才人然才豈爾儕所好載鼙以車馬樂鷄以鍾鼓何大不倫而迺不能忘情幼于若是豈不難哉玉骨寒灰金粉黃土流傳舊桃死得事寇公亦事屬有無爾搔背不如麻姑灑掃不如玉女乃得與賢者相從于碧山紫煙之間復何憾矣

祭半齒

有序

爲齒蟲齧去半齒埋之王園梅花下因  
摘花祭之泣而告曰三十年苦辛爾噤  
之二十年酸味爾嚼之千萬斛愁慘爾  
嚙而忍之徒有飲聲不識笑口爾固賤  
骨也賤愈可憐賤莫如馬馬骨猶埋矧  
爾乎卜花下少人行處理爾隣爾以花  
本覆爾以花瓣沁爾以花露護爾以花

神蚓窟爲斧蟻穴爲堂草雨爲芳醪蜂  
蝶爲死友使寒微片骨雖賤能香復懺  
來生母墮業軀也

憶維吾生三十有幾此日何日齒落之始毛骨  
無恙半齒已死人間烟火爾先獲洗言語凶咎  
爾先謝委舌本滋毒七神所忌半遠舌者俾先  
脫穢半近舌者墮業未已若有深意微示衆齒  
半雖未已方衆則邇零丁搖動旋將繼此誰料  
一齒墜之二地况本分者是惡足倚

祭桃影 有序

園南有桃二株左臨小池右倚齋牕牕  
外卽莽蒼四野間有人跡迺常拚牕日  
對桃影就桃相影就影闢牕南齋之勝  
半在此牕也戊申之水爲禍竹木南園  
雙梧園南二桃相踵而斃予業有文祭  
雙梧矣桃影之功不減梧葉復有祭桃  
影文

自我得爾夙暮對向爾亦親我案几依傍分裂

酷炎遍引清颺宛弄旖旎拂掃塵障動無風聲

因風以颺可瘦可長時偃時仰仰去聲月高爾低月

下爾上愛不可摘畫不能狀收去迴波送來翻

浪伴我孤寂形影相望又低回相望示我至理空色

一相蝶舞濛朧鳥飛想像蟬吟掩隱蜂簧鬪撞

爭妍助幽皆爾之貺牕設常關暈濕書幌有時

而淵清移幃帳誦讀寢處賴無俗貺醫瘦猶可

醫俗難量方與爾盟升恒莫忘忘去聲無何天災佳

樹爲障雙梧已死爾寧無恙樹隕葉凋枝亡影

喪月冷風淒鷺悲蝶悵猛雨破紙烈日肆炕爾

已歸虛我心則悵顧彼齋牕愈增憤愴遂廢此

齋并歸消蕩

挽

挽江進之

嗟乎指屈吏長洲者未有進之江公者也吏不  
賢不無悅之者吏甚賢不無怒之者魚唯于邦  
之縉紳百姓多受其烏鳶之患而惡之寧面鏡  
母魚唯將又不勝側目者簿書如山客車如錯  
几不能時饑飽何暇上館多士而士于是乎含  
胡有怨言異哉我公何術以各望其腹而紛紛  
之口舉曰能賢蓋公之寬仁豈弟如春風愛日

令人栩栩也公既去鄧侯爲政公郵傳每至必以扶植士民爲勸勉真不減嚴穎川去穎川之心嗟乎公德于長洲長洲隕首不忘長洲何德于公而惓惓若是鄧侯之治大要祖公遺法而佩公勗勉所活不多遜公于是長洲之民謂江公雖去猶儼然冕藻而臨撫吾儕而哺護也而公竟逝耶公記五賢祠有云安知五賢不駉鸞馭虬翥然把袂于其上蓋公文采風流實類五賢故寤寐神游生死交得俎豆其間當不辨今

古五賢如眉山先生非蒞吳者其行館耳公猶謂翛然常在而况六年以來教化所留精神所寄生前所旣去而惓惓者遠視爲飛鴻之雪望望不首回耶某于公不減門下士意者德而私公不足邀公之盼問長洲諸士及薦紳鄉民悲歌聚涕甚有不翅如某者嗟乎公逝矣宰茲土者能盡如鄧侯乎公豈弟之政無有替則公之蒞長洲也殆歷世如一日豈特去後之惓惓而又豈特駉鸞馭虬與五賢把袂于行樂之地而



乎

詠

詠雙梧

有序

南園庭中二椅梧以水死主人某設酒  
脯祭而別之春萸秋榦誰諧心契之交  
樽淚猿腸爲報情深之樹痿猶望起枯  
不復榮酣酣桃李是豈鳳條槭槭松楸  
亦非帝種南園旣無遺秀東君固有餘  
思是有詠文

雙雙椅梧列吾南居兩柯交錯滿庭扶疎人坐

其下若不開虛每翦其繇翦爲薪芻南居多木  
寧唯爾與然而唯爾近我坐隅鶯歌蟬吟有功  
讀書破碎烈日弄風南徐如是以來二十年餘  
天災流行江南溱沮天非殃我我亦受痛天非  
殺爾爾亦命徂嗟爾生前剪除煩紆煩紆旣去  
蕭疎亦無良鳥啾咽清風欻欻請無欻欻人世  
遽廬遽廬同盡豈私吾居吾居復然况爾雙梧

傷小董浣

有口序

小董浣已有一屬矣十齡餘而死特爲文

傷之

爾曹中獨爾甚切不堪使令甚蠢不解人意但  
能搔背撫足犇走呼應而已我不能仁慈稍不  
當意輒作聲如豺作面如虎從事我以來至于  
今而低眉鞠之者少矣知爾今日卽甚不仁必  
不若是因爾而凡遇爾曹每以爲戒然爾獨何  
罪乎爾之夫每情驅使輒語之曰汝妻死能善  
事我我更妻之嗟乎我何其忘情于爾而且使  
爾之夫忘情于爾也哉

哭顧二火死

人忽生想夜卽夢遇想之不已并夢亦去所以  
卿死杳無問耗且無神驚夜無鬼告嗟乎卽告  
斷不虞此人死疾病卿死乃爾卿死三月猶望  
後期得卿之變不知所之寤寐恍忽至此始夢  
嗟乎至此夢亦何用卿骨已柴我腸則裂卿肉  
已灰我淚成血天若有知殺卿何心天若無知  
何獨殺卿不及其妹不及其姊他無有及益惜  
卿死嗟乎人死抱屍而悼卿死奈何望塵而弔

應奎死感泣不已而有是文

有序

子起家小青也起每一探予非奎不遣  
遂風雨寒暑不絕于塗後予從石城歸  
月餘起不通一聞問竊心疑之求其故  
而奎已死矣蓋起重有所感亦深會予  
衷不復他遣寧罷往來以志不忘

吾子執衣侍吾子起睂眼顏色宛一處子不爲  
取憐翩兮瓊尾衣止布素灼灼青綺子起探予  
必以屬子困病不輟子亦樂此久遠相習可以

辨履聞戶外聲蹙然而喜稍爲款言袖出雙鯉  
言止卽退退立屏几偶有顧問垂頭霍委子起  
視予不啻兄弟以主之故無敢目指詎無勤斯  
願言輒已會予遠行從別吾子予行子病予還  
子死生有他腸是負子起死無痛心是負吾子  
譬子母環宛轉相倚拆之復合如露荷水中所  
思存言弗能擬生死雖岐寸心可矢

哭宋伯醇

死者常耳卽稚年死亦常耳若子之死則異矣

予在南中得子之變驚絕倒地口咽不能出一  
語神清而骨寒者秀穎不祿躁露儻薄則凋殘  
神氣而中道零反復而求子之天理無有也固  
知非降年不永蛇鼠相迫而瓶雀去也管公明  
四十九而卒歎曰天予我才斲我壽不及見子  
娶也不及子娶猶以爲恨况身爲人子未娶而  
亡也哉房瑄前身永禪師歐陽仲純死爲長白  
山主來非無因去非無故誠不是爲子惜所不  
能知者子爲長者之後長者之後如子而子且

如是死也

傳

先大夫別傳

有小序

凡不文者於詞賦纂述無一而可若叙其親政不宜文故不文者獨宜於叙其親

先大夫諱字別號人品政績文章則張伯起狀徐公望銘詳矣而更有碎事未盡其平生固兩君子所匿焉以爲不足教者也男綸曰丈夫何事不可告人迺爲所匿故載百拜而爲別傳大

夫一生讎貨利不讎酒色讎今之道學不讎古  
之狂肆意氣顏色每以偃蹇畏於人實無輕眇  
儕俗之意人卒諒之故怨希也少年嘗曰吾爲  
文寧唇頰爛不襲唾涎爲官寧面皮爛不受睂  
眼爲鄉寧姓名爛不入官衙後每對後學及僚  
友輒舉以相戒計所好馬牙香圍碁花竹酒腐  
朋友鳥研故人搬戲詩畫童子供具不喜豐麗  
冠履衣服以殷敝短素爲適或云俞公在山卽  
山人在里卽里人在野卽野人在官絕非官人

也丙戌推校士力辭免曰收門生甚好但妨我  
幾日嘯歌綸少時有衙役呼以公子大夫怒曰  
凡麤暴之性加人必呼爲太監性牛性公子性  
等之太監與牛辱吾兒甚矣里中有高四以大  
辟下獄適同甲戌榜李公任長洲力救出高大  
怪何以得此於大夫叩頭稱謝曰願來生作犬  
馬相報大夫曰犬馬之力報効幾何來生之期  
渺茫尤甚某家郎童與汝相識此便是報地耳  
一日乘吳舸過閘河爲他舟觸折艦楫同舟某

索償三金會大夫醉臥頃知之命亟反金問索時曾道我耶曰道曰然且頰首以授殊慙素未孚於衆也孝廉時悅一豪貴家歌兒與其主無生平不欲令知每侵晨匿一廁中俟其出後主人稍覺迺邀飲竟留三日主人曰不謂傾蓋之知頓成如蘭之臭大夫曰恨如蘭之臭從廁中來耳備兵建南立台柯公素交好柯命應天學使來別大夫大夫以友人子託之吾母促綸當亟歸就童子試大夫曰吾曾託以友人子矣此

子年已長吾子尚少且當使自勵不應藉此後二年綸隨母扶姊觀歸柯公尚在得入庠蓋有轉聞於柯者而非大夫心也大夫與一妓善後有讌大夫者更召一妓侍飲異日其與善者邂逅生公石數呼之弗應曰知罪矣妓曰汝知罪卽於此長揖數十使舉山之人大笑方赦汝遂如其言至妓破顏而止見者大笑旁客曰殊失觀瞻曰觀瞻吾不惜恨曩日侍飲人知之必亦以此法難我耳有通家子某小飲書室大夫偶

出某啟其櫃匿一金鑿絡將入聞鎖鑰聲知必私啟櫃也及御步避之頃復飲盡歡宦閩時一縣令饋武夷茶數甌明日發之皆黃金亟召令歸之笞其吏笑謂令曰黃金誠佳還不如茗請易來大夫性喜謔然綸平時進見必使童子豫報整冠履端語言而見之劇暑亦然見唯以舉子業及古今人物取次勸勉絕不及家人生產坐中或有俗客及道鄙瑣事者必目綸徑出嘗曰男兒長俊由小若俗氣一入終作廢人可不

畏哉至議人短長發人隱私尤生平嚙齒痛禁雖極謔中或大醉時或素所心鄙或有事蹟敗著爲衆棄者亦絕無一字犯所禁有一布衣必以儒幘作弔賀偶自言曰吾家科名政未有期昨夢始祖以秀才巾子數十散我族人必盡此而後有科名起家者大夫笑曰科名速矣族人盡如君數十立罄耳茂苑文氏皆聰穎尤工書獨一人亦諸生文與書竝拙遇歲試大夫力勸勿往驚問何故迺曰以衡山書書子之文定居



黜等卽王守溪文而子書之亦是黜等一秀才不能受兩黜必加子以罪名矣嘗自懺曰吾繇來止此兩惡謔他無有也丙戌仕長安有鄉人邀飲醉後大譁某九列也居密飲所患疾使人請勿譁大夫曰爾患疾吾亦患酒狂再請大夫置不聞也及從閩遷某適撫閩疏劾曰聊有晉人風度絕無漢官威儀大夫拍案笑曰可謂知己但云聊有不無遺憾其言絕無則感之矣遂解組歸民皆臥轍百望不反聚涕號呼大夫亦

重悽感因有歸田不是遺蒼赤其奈當年喜畫龍之句閩中有兩衙前深器愛之携至粵粵歸二人不欲去携之歸久而習吳語不復能作閩音益愛之自戲曰此吾於閩人移風變習之德教也或問風土粵何如閩曰閩多美兒童粵皆轉矢蜣螂耳因自言吾不能自解者三平生不信佛而喜供大士最不服宋人而喜學長公官二十年了不得趣而深得於閩居於鄉去城二十里許榜其門曰敝刺不入公門蹇足不至城

市歸林歲餘問之市民多有不知大夫之歸林者有田家樂漁家樂樵家樂數章以寄意曰吾聊學王摩詰輞川諸詠第無唱詠安得從地下於故人中覓一裴茂才乎又言吾於此頗樂但恐如其別輞川惆悵出松蘿也一時談笑語聞者疑其不祥觀野史種花卉所與昕夕惟布素時交冠蓋而契厚者類不延接卽門生故吏里中同榜諸賢亦一切謝之不一通手答曰吾非有意遠之但猶着衣啜酒豈所宜廢煩暑中病酒後沾帶亦焦聞氣欲嘔耳有一言鳥親爲飲食導之語鳥病卜當死晨起誦經禮大士以禳之果愈搆小青衣數人每夜飲環坐嘯歌恒至漏絕不輟諸童子有陶陶多語言有喧舞有憑几夢去有枕大夫膝手撚其鬚大夫亦輒醉開襟解髮婆娑攬攘其間如是三年而卒己亥春綸之友人家見粵人士言及大夫惋悵無已曰凡士民思其政治愛其風流知捐背無不欷歔流涕至於今如一日因立廟摹遺像于小金山

蘇長公祠之左偏以風流儒雅云

記

翦四宜堂竹樹記

有引

堂前多竹樹鄣蔽湖山伐去過半守者  
懼罪乞予聞于主人

芬月達夏携所同志幽尋僻訪清壑詠地迺得  
此堂堂在鄧尉余十年先餌芝于是山光依依  
如戀夙契諸子攻苦互相策篲席連臯比夢沉  
經笥禁目幃外焚膏晷繼余則不能遠睨高睇  
若光難來磁景易至埋首而度既將曷悔日與

淨持快遊美睽講脩生理問震旦事瓶花香雨  
一爐一偈此堂之南竹木爲崇碧虛鏡湖蒙以  
蒼鬱縉霄緗嵐驅遠側避余命童子設漿以祭  
旣誅以大利其斧鑿血移難首爰及偏裨當乃  
斡然而生朗氣紫磨素霓禩來貢異曙影張屏  
飛湍吧翠近堂諸山漁洋爲最在堂左偏爲堂  
聖應堂左篋勞姑且勿刈以籠漁洋使聖破碎  
守此堂者瞋日而視余問曷故僕且下涕曰吾  
主人屬吾掌寄一葉一枝皆有數計君悉翦除  
我將獲矣余曰勿恐爾且寬慰所伐無多所償  
億倍頃三萬六峰七十二齊入此堂皆吾所賜  
僕曰雖然非主人意請君數言榜此堂內主人  
見之自我之罪予應曰可乃爲是記

讚

張元長像讚

有序

元長雙盲矣未盲時人勸其力養目疾  
元長曰吾雅不惡盲亦命應爾矣吾聽  
其盲君亦聽吾盲耳風流才采超穎越  
俗真可謂半天朱霞人與之相對須頃  
便如坐蘭薰雪白中肺腑皆清涼行樂  
極其灑然之韻當風而笑倚松而立小  
絲執衣於其後

斯翁也家婁東性無營好坡公俠骨之雄舌士  
之鋒文家之龍類與坡同眼也朦朧世其眼空  
箕踞長松殆亦白眼看他之意而過其風惜其  
耳之未聾如其聾吾許其目明而耳聰執衣童  
美姿容善事翁翁名之曰小縣而可以想見其  
多風且亦可以知翁

劉周巘行樂小像讚

斯何人哉似溫而栗處囂而寂於象頤頤音祈於  
神抑抑樂山水嗜文筆樽有金膏爐有太乙爾

品也真長爾術也彥伯豈一至之偏長實儉年  
之良稷物外冰稜雲中鶴白如飲醇醪令人醉  
心如噉哀梨解我蒸食我將插瓶花立水石常  
對爾於端居室

章右之先生像贊

厥德充充厥相融融煙霞之致邁軸之風臨世  
濯足隱居息躬安梁廡之久儻甘顏巷之屢空  
不飭華腴不侮顛蒙世業貽安效鹿門之龐老  
遺金不顧似羊裘之甄翁廉隅不設僉小能容

量已及物惟始慎終是爲章公

張氏族譜讚

大姓首張斯張復首譜牒雖新楹楹則舊風流  
江左名聲漢右有傳於書有傳於口有予比肩  
才情抖擻有予父行呼予小友內如伯起詞源  
談藪快讀幼于生死無耦傷矣仲防將祿弗受  
千仞悲夫駿骨誰售是於先輩予復何咎最不  
忍觀斯譜之後歷予交知難悉某某然予所交  
十失其九庶幾先子臨風歌缶輒歌伊人等譜

所有誰賢而貴空霄龍吼誰貴而隱筆牀茶臼  
誰隱而才胸羅八斗誰才而俠千金敝帚誰俠  
而貧典衣貰酒誰貧而學編蒲緝柳誰學而亢  
閉園扃牖誰亢而年綠瞳而耆誰年而德鳳耆  
麟交誰德而風蓮塘蕙畝集茲所聞諸賢如觀  
載合斯譜全觀洞剖點綴琅琅鬚眉糾糾九原  
頓作子孫襲守羨我原美別未卯酉忽爾一見  
成此不朽惜不朽事命予序後世好實予繪材  
則醜痛予先子譜中人久使今而在叙屬其手

自如集 卷九  
必有可觀爲茲譜壽

侯雙小照讚

景升示予一小照曰是誰之麗予曰嗟乎此其  
侯雙宛乎其態之妍色之芳再視之如有喘息  
再視之襜褕欲颺再視之目睛時一轉動再視  
之如浮如凝微聞幽香再視之如含胡欲有語  
再視之若易喜顏而生勞傷是何照之怪常也  
意予相憶云長中心云藏觸於照而神自將乎  
嗟乎雙郎雲山鬱蒼矣江水淼茫矣魂氣不可  
以飛越而胡以能倏然而介吾旁

國家圖書館, NATIONAL CENTRAL LIBRARY, TAIWAN, C.C.



疏

募脩觀橋疏

玄妙觀觀橋圯廢不可行有僧某募緣重修予  
爲之疏蓋此觀當城堵中央茲橋素居人絡繹  
告天祝聖禱雨祈暘實爲福地浮梁不比花堤  
野渡前此摩肩共乘永爲便矣廢則袖手坐視  
可自安乎願分半橐之藏共假四方之便莫謂  
利溥於人何用德自己出當思福有所本勿難  
善與人同或仔肩夏馭乍驚取道之迂或濕淖

宵行均歎絕津之苦人多望濟衆實可圖一爲  
唱伯爲賡士民爲之全勝結筏歌於塗休於市  
縉紳願者奚翅解驂孰云善小可以不爲吾謂  
惠鮮期於當厄况何物沙彌甘廢饑飢困眠而  
廣求施主吾儕舍利寧忘結跏脩土以普濟衆  
生日望功成幸同心惻

講楞嚴募疏

經言識者知是佛性不識喚作精魂小果人天  
震時迷懣茲法僧其一襲道衣中藏明鏡臺五

輪法指顯出菩提樹潑水淨瓶普施惠雨點空  
藤杖遐振玄風叅透真乘六宗講明楞嚴三昧  
設大法藥將聖道祛外道聽秘密藏卽鈍根易  
上根吹散世上空花發盡鬼家活計眼前優曇  
種言下甘露門人人與汝安心竟能提盧鬼超  
昇箇箇還他廣化身勝繪楞伽變相有相宗無  
相宗採藥作舟直通性海卽此用離此用聞香  
登岸立斷情河猛覺生時共帶來還教靜裏尋  
思去但法案通霄香火佛堂滿座經文僧寮無

算可勝食蕨炊松行者若干如許刈蘭薪桂凡  
茲衆費實藉檀那講者若敲骨取髓勿謂談空  
助者如刺血濟饑深於護法聊書疏引廣結機  
緣

立禪募造疏

某謹疏羅筏登於苦行福田種自因心繇苦得  
甘從因證果某遠方布衲荷擔而來隙宇檀那  
築龕自寄面北三年南與東西瞑然罔見身住  
寸地行及坐臥久矣若忘願假歲月焚脩剗立

莊嚴法相奈一本豈能成厦瀋鯢可以得淵累  
世塵劫消於佛宇一然燈應念德緣分爾金雞  
一粒粟禮師而法墮雨花共得無方智果飭衆  
而惠分鉢水並稱有髮僧伽少者壯壯者老一  
善可以永年十傳百百傳千衆心可以共濟願  
註金穀之數幸觀棟宇之成



自娛集卷之十

長洲俞琬綸君宣著

尺牘

與郭履台

重感多情深慙薄倖唯此懶骨不捨素心或可  
見賞於年丈耳相商之事幸彼此親知可無終  
訟恨弟行迫未覩成議真一步一牽情也弟與  
載夫直是夙世天倫非是今生交與敢云一貴  
一賤却已一死一生若不自盡於當年何以相



逢於地下滿腔熱血多所幽懷所恨人微井教  
無補興言及此按劍茫然儻荷年丈素入寶山  
時結此方便局使周與年丈永切九泉之感弟  
與潘衛母結千秋之讎全在此舉弟豈徒有胸  
者萬一潘兄因薄面而中止之則弟未盡之春  
秋尚可効他年之牛馬使人見德於生交易使  
人爲惠於亡友難而感之深淺因之矣萬惟垂  
慈力解其圍臨穎跪禱

與吳

備承款曲過勞過費來而不往感愧不禁親家  
乃古心人不善爲時好然率直任性亦受侮之  
端不妨與里中稍與親睦每於未事之先甘受  
小虧毋待臨事泥補也弟見親家凡相與親友  
赤心者無多指屈唯張挺之兄不顧利害爲謀  
獨忠真天下熱腸人也弟遠違左右一切家務  
無可相托唯此兄能以弟之心爲心以親家之  
事爲事相與朝夕不獨舉業可以相長且緩急  
可與相商弟得安心遠遊無煩挂意者全賴有

此豈唯來歲直當久處豈唯久處更當久敬人  
人有心各懷知己之報特患無知己耳千萬留  
意勿忘鄙言端此奉懇不盡

與陸觀卿

初選時相知皆爲弟皺眉謂作縣甚難那做得  
過今乃知並無難事亦並無別法唯日與門子  
勾肩搭背嘻嘻哈哈呼徒拍笑而大治矣剛剛  
湊着我長技至樂也若退堂時門子不在眼前  
則唯閒坐一室想陸觀卿近來碁子可能略略

長否見了門子弟既得意想了觀卿碁子弟更  
得意別來之況如是不敢不寄言慰兄遠念也  
寄令兄無他語但改爲閒坐一室想陸元來近  
酒量何如便是寄令兄東矣老伯晚福益茂奉  
懷之情滿胸而苦爲莊語寧失通問幸爲談及

與方孩未

幾個春來無淚痕千古斷腸語寧我腸斷勿斷  
人腸以我輩人令人作妾薄命詞使後人腸斷  
奚以我輩爲矣弟扇頭二詠一麗春詞一傷秋

語也唯兄知情惟弟愛情敢爲人作樓東賦乎  
正遣人來乃兄惠至卽以附去如新詩嗚咽不  
能展觀容且屬和

與孫蘇門

夢想周原博無虛夜無虛刻也賴有子慎惠贈  
停雲一帖帖有亡友手書數字又一小圖書記  
乃原博病時得寄弟匣中者今雖劇冗必携此  
二種以出入每兀坐呆看不聞旁語願子慎只  
以弟之思亡友者思其親只以弟之望猶子者

自爲望惟兄善勸勉之弟今猶然寒士以此得  
不俗然一餽之報多所違心不獨於知己所欲  
報者以歲莫爲期而子慎四十金尚欲緩至來  
歲幸道鄙情感兄念兄一年如一日千里如面  
對又非短簡可述

與尹慧生

兄窮乃益豪知有日送窮去目下則奈何天不  
能愁兄而愁殺兄之知己空愁徒抱無乃以見  
情愧負知己名耳弟恥爲罄折不奈牢籠輒於

禮法地故出狂態爲走別徑計而竟不見許於  
上下以鐘鼓文繡樂鷄鼠駭而思迤且益繁苦  
惱之况太淳略識之然但謂野鹿之性不堪拘  
檢耳夫拘檢良苦而牽情處乃在故人故人而  
豸冠時交者爲甚當聚首時平平耳一有別離  
衷情無限情積而不能吐兄自喻之川後何處焚  
脩幸兄作丈夫氣勿戀戀舊歡舊歡者誰與兄  
同病相憐之密底也窮官無以爲贈聊以微物  
伴緘毋罪寡情

與徐日方

兄去乎其夢乎聊說夢於越吟之顏可以留嘉  
話可以續斷魂風前三歎雲外孤期脈脈於此  
臨書廢筆而寐希復有此夢也

與宋汝章

月映盆中天邊在手人映心坎千里在面如情  
蹤之常靠聚首則人生離別更苦矣弟一入藩  
籠欲脫而不得清夜靜思不禁狂笑本是極放  
浪人乃爲此大煩惱事去春姚孟長臨別囑弟



云切勿嫌首肯爲冷淡今始知弟之自愛不如  
良友之愛我也御下不可無疑弟病處在不疑  
然每與不必疑者過疑與世不可當激弟好處  
在不激然反于不當激者過激非大無心機則  
太用性氣與官之要訣恰相反明知前途必無  
佳味只博得與知己相違是何筭計也夫仕宦  
者人見之若在上有一舊笑話云一人遇虎  
躲在樹頭虎舐斷樹人落虎背虎負之而疾走  
旁觀者相訝曰此是箇仙人其人云汝不知仙

人肚裏好苦也相別不久忽臨考矣考事一過  
又臨場矣兄且暫賈餘以決之意勿以且戰且  
却當之據弟看兄斷非老於此者卽終困豪傑  
亦強至來秋以定行藏何如郎君非不進矣然  
就此三作見其胸中當浮游而少沈摯今歲可  
望八九倘弟可緩頰處不妨與太淳仲先相商  
可便宜行事旣行而示後報可耳窮官無以伴  
緘惟有拙稿一集佳墨四笏寒酸可掬知兄能  
諒

又

感兄情別惆悵淋漓他無留贈之言微恨舟中  
郎君不在使弟滿懷勉語不能面勗面勗亦無  
他說總之功名固有數讀書亦甚難有志之士  
苦無好筆端靈秀之士又苦無好緣法天與之  
資父母與之閒家與之溫飽身與之無疾病如  
此而自廢何以子爲何以生爲矣

復崔連嶽

別後情味蕭蕭胸懷悶悶交知落落政務離離  
僅無玷知己耳實無可述於知己者年兄愛而  
忘醜頌而忘規醜愈形而規乃至感可知也三  
年之間二毛生半齒齟百愁聚非復昔年狂奴  
矣得於都中憶起昔年境況忽有生氣乃復接  
手翰兩腋風舉遂再見本色神哉我兄何以知  
弟之頹頓而出我於焦火也片紙霏屑百疊瑤  
粵照人心顏沃滋肌骨每舉一觴叫兄不已獨  
飲添膏恍對夢寐所鬱忡於懷非酒力可遣者  
則猶子之誼何在終天之感未分念及此而投

杯四顧無繇自容耳冗次草勸言謝殊未盡思  
不勝瞻企

與馬心劬

奉違三秋風期遙訂依戀之私每於名聲所通  
快然慰釋若弟骨癩而材下略無可述於知己  
者奈之何弟僦館春明凡同藉而天涯者強半  
聚首眷懷如玉於焉倍至會有敝媼談卿蒼頭  
之便率附八行馳候台履一紙銜風神與俱去  
千山雲黯更爲邑邑所望年丈以寧失不經之

心廣之死致生之事以活人一命作頌號千珠  
無寶山一入此芻蕘之獻在年丈固已行之矣  
談卿爲不肖瓜葛方愛莫爲援乃又年丈犬馬  
適天假之緣一莖腐草俛傍春谷溫風陽煦欣  
受榮滋上之人左顧左重右顧右重無窮在年  
丈一指顧間凡可垂情百惟推愛彼荷二天卽  
弟仰再造也

與陳玉海

別兩周序尺素未將情篤而骨癩知己之味固

自有真耳去冬曾辱遠書雖無多語恍如晤言  
別離之愁藉以差解弟兩年來無可慰懷之事  
惟唐人傲吏閒齋困獨眠與朝看飛鳥暮飛還  
二語稍與莫逆客車如蝟不問姓名拜跽如奴  
視爲俳戲身在浪淘風簸中情在烟駕雲裝外  
是可爲知己道耳弟人都不遠屈指晤期欣然  
起舞凡貴省貴榜貴部諸公從北而南者鉛霜  
未卸卽叩問起居皆言萬福深以爲慰終以未  
達一函爲快快適有家兄便草數行代候儻以  
通家之好不惜一見寵藉無窮餘留面旣

與同年某

每於月底花前言念風采言念款誼獨步百迴  
渺焉神往及逢驛使動筆寫懷輒未數字而裂  
紙嚼去蓋臨風靜想之神過於晤對巧於夢寐  
纔落筆而真失耳年丈雅愛吾書弟不能謙惟  
感年丈能愛吾書爲知己乃別來潑墨數升盡  
歸椽曹兩廊架上與屋梁塵宰堵雨絮結爲團  
而竟以歸鼠之腹架上者之薄命與愛者之有

情相憶而緣淺可歎也然機緣雖淺作合有神  
長夏初秋間願以新作草書數筆以當長安蕙  
纒之贈恐費相思先因家兄道經之便以爲作  
合之媒家兄名某倘不揣投刺幸門者進之彼  
無他腸但於都中敝止每以辱顧時曾望顏色  
別來瞻戀無已於懷耳彼臨岐受緘躍馬而北  
弟深羨之羨其見年丈之早於弟也春雲引思  
谷鳥牽愁遇有青鴻幸有以慰

與徐大治

落落睽違依依注戀千里同晤言三秋一彈指  
心神綢繆夢寐勿替自得金玉之教萬千款愛  
有逾天倫每對敝年伯余泗老臨風馳睞各述  
奉懷之情輒爲移晷奈奉懷雖殷病懶疏候心  
期良不在是卒亦無以自表茲啟敝姻家闕嘉  
璉爲通州衛幕雖小吏而自愛雖風塵而古心  
昔年嘗有恩於綸久懷報以無地長安多人未  
易投肝膽者與其輕投於近交不如遠屬之知  
已復天作奇緣有令弟立宇老先生以鼎望居

要地稍睇眄寒厓春噓鞠摩提携不能殫懇乃  
托妻兄張涵吾袖八行代致翁臺以片言重而  
逡巡躊躇實用自媿蓋綸之疎節曠禮如是而  
往以妻兄相屬百荷垂情今復以敝姻求援尤  
爲望蜀盡德竭歡殊非所以自處所恃以千古  
情照亮于形骸外而均感之私則未易輕吐也  
臨穎不勝慚慙不勝惓切外書扇頭近作并寒  
儉之儀以伴緘統惟炤存

與徐大治

言念如玉幾番腸斷弟素有一癖性凡一處注  
存便萬事廢棄自西安受事以來終日閉門漫  
不理事卽或稍理焚如亂絲蓋爲注存年丈也  
甲寅秋曾有一極長柬托一過客奉寄其中曲  
致相思可當面談今并此過客忘其姓名而細  
味來翰知己浮沉可恨也仙御逗吳昌多日弟  
正百病相煎甚有性命之憂簿書高束筆研欲  
焚且千里傳言有謂已還楚者有謂不久來西  
安惠訪者有謂卜宅閭城久居者遂視咫尺之

書爲緩圖而孰意其皆誤也天涯久別恨不能  
促羲和之足及此冬春間可得一快晤兼晤錦  
瑟樓人而弟命涼薄遭逢違願年兄再淹苦塊  
初容漫卜刀鐶蕭索都門黯然無色去歲聞有  
惠訪西安之興懸榻以待乃有促至一詩片片  
秋帆挂夕曛山深樹樹鳥呼羣多情唯有江灘  
月未報來期日待君又有懷初容一詩相對香  
齋綠正勻清歌送眼更愁人至今想起銜杯夜  
猶帶長安二月春今人事多舛兩詩不靈不能  
爲星媒月證便嚼碎付濁流矣金元甫丈真第  
一流人物弟藉交契已註金蘭簿中晤元甫面  
讀年兄書作初容想四人促膝邸中矣敬此慰  
謝涵吾內兄再遭熒惑之災昔年燼餘今盡燼  
矣報施善人蒼蒼何意可爲破屨而歎奈何

與王存韋

遠客頻年鄉思孔切跡疎修候心邇奉懷隨鳥  
雲迷因風夢寄但鱗羽之途欲斷而嚶鳴之好  
猶陳非照心如丈不能信也邇來丈之所處稍

勝屯年然知足之念聊以自娛而不足之形實  
無毫補所藉後人不薄而郎君近况却復何如  
以彼聰明絕人何不可就而骯髒天資屑越良  
日問年不幼問業多荒弟嘗于家庭間與言記  
性作性公烈過我遠甚而放心知求力軌于正  
潛神得趣銳意鑽思則我過之是以將來之數  
不可知而目下之成吾已奏此雖燕閒浪語而  
于郎君却中病原敢錄以贈以劇冗不及東致  
亦所欲致不外是也蒙彼縐緜君子偕老雙修  
雙壽福祉如芙蓉賀鵬飛兕觥遙舉江蘋之獻  
聊託遐心

與鄭

據此深山合此情友晤言歌嘯皆名業矣享用  
過侈羶俗將及回首茲樂邈不可問慎勿輕放  
過也選詩樂府槩多麗句就中新險幽陰之處  
願慧指一表章之請以一月爲期容面謝

與李君仁

新詠大都風瞻就中幽異可思及秀麗駢偶者



仍以句字牘字標出於顏如唐詩品彙狀長夏  
可作一清供幸勿嫌煩半月爲期容謝

與張介峰

黃必顯雖過時花風神故翩翩也相失數年一  
朝把袂恍然夢中兄真情人作此情緣彼此均  
感矣春集釣鰲亭作節山游別因有一詩相餞  
亭在鰲何在千年釣不休濤光星餌動墮影月  
鉞浮臚出江妃手酤來海市頭送君分一箸直  
飽到壺丘旣作此詩忽忽且半年矣風光惱人

奉懷無賴不謂考成之事兄先著鞭又不知晤  
歌何時矣

與姚孟長

再客太末善病如初門閉多而開少枕就多而  
推少風光欺鬢每鏡自驚山櫻野蕨之思無日  
去念別後情悰略概於此適有一亟語懇兄兄  
須立許此中道尊陳礪老乃異度故交爲其子  
求春秋師以謀於弟弟謂安得姚孟長樂遠遊  
乎礪老躍然以不敢辱兄爲辭而以僥倖萬一

爲望弟偶起一念信兄必肯遂滿力擔當蓋兄甚不必館亦不愁無館然鏡葉褻限訓應如雲館與不館總非善計此名士之通誤而在兄恐尤甚是以知高明人所必許也脩脯應不甚薄其子才與年俱妙其讀書地爲衙齋之別業竹樹甚深亭軒俱麗而主人風雅豪快絕無官腔保無一件綴兄眉者漆髮高堂供柔脆者非一雖千里游無妨也彼立埃好音萬萬首肯會劇冗中道尊立道人衣袂蕭瑟致筆無留行草此

相瀆雖文起兄且埃後鱗將寄其他可知也所委不久課奉諸不悉

與尹慧生

念兄之貧無時置也徒念而無以爲情遂成套話然弟終非負心者或可留以他日耳兄固不能一日離家然尤不可一日無館有館而不坐雖孔子出世亦無半箇學生唯有日日絕糧耳念餘遠來愧不能分子美草堂資贈而念餘亦不甚恚足見其進德則今之草草奉芹料兄必

不反出念餘下也

與周玉繩

別時未春草也今且枯楊吹鬢矣引頸拂霄恍  
猶拳袂皋蘭清露尚有餘芬所恨過去風光疾  
如飛激未來日月淹若蚍蜉屈指後期再親雲  
上真剝刻三秋也昔人謂拙病宦情少弟于此  
語語真味長常想人生何處不可以容七尺乃  
有此一業境非苦非甜愈甜愈苦入之不禁額  
爛脫之無奈絲牽令人日老于壁上可歎也弟

濯翼梯高之志胸中絕無捱過兩年稍免堂下  
侏儒卽尋故丘篋笠青規兄弟望我母奢矣今  
弟考成時也何成可考無非兒戲稍循故事候  
謝從時一片微心不在側理也三衢爲橘柚之  
鄉遂染得一身酸澀卽以將寄味之螿人無盡  
鬱懷統惟心照

與京中同年

思愛不虧在遠更親天路高高日唯吟思入雲  
中也弟驢馬三衢含茹百辱病腰匍匐中夜緦

縻至于罪罹萬千貽譏遠近風聲所播有負心  
知所幸奮跡都門景星繁燦彤楸餘覆莖卉蒙  
鮮所謂申椒菌桂之間無菘蔬之不芳也回首  
執鞭流飈三載考成已屆寸績安陳雖有高掌  
相携恐亦化工難造亦唯有審已循分甘碌碌  
後人已耳別久候疎中心沈菀裁雲伴柬聊寄  
遠懷簡率匱文萬惟慈炤

與張元美

家園碧雲外兄弟綠江頭離索之感爲之嗚咽

時語湯五君忙度兩秋徼天之幸還盡歸人債  
便買邵平地一片接知己之廬置閒書數卷於  
竹月梧風之下相與共讀殘耳五君癖羶且非  
獲我心者請弟藏此赤而遠爲期因味古人愾  
言同心聊寄心于白月而弟遂爲自得寒雲意  
誰同明月心之語榜於楹原美則實與素心者  
謂弟果以語乎抑臆說也弟此來于宦計益蕭  
騷於世情一冰炭而于夢寐却不甚顛倒其邇  
蹟頗概諸汝章牘中不堪再述錄一通以寄慰

凡士貴仲先薦舅俱傳慰之若慧生昨乍明而  
氣銳慮不樂聞此語始誤浪于五君可再誤乎  
寒家事望兄時時察之前柬所云脚出脚進之  
人頗多復聞香艷氣之親不少每有所聞必執  
弟此柬徵色誠之且爲弟表白之而且指其事  
以見論乃見君子之愛人在弟相契者多而一  
片熱腸猶易一副鐵面則難非兄不能兼非兄  
不能任也肺腑之託千萬留意昔日壽家母之  
諸兄弟一一佩之以出乃爲頑奴子失去記不  
甚全望兄開示謝而或漏不如稍遲耳擲管神  
飛冗次不備衡陽之信萬祈源源

與謝赤凡

還想昔年真一夢也物換人非風颺浪簸少年  
雙去苕骨摧殘其匪石不轉久而勿替悠悠居  
諸不能老吾兩人者襟期隔世研席猶香翦蝶  
尋鈎喁喁晏晏一種情癡白首童心耳以兄丈  
之才荷衣猶掛天平人邪良足悲感因闔道費  
公傾蓋相得問弟舊游時之知己弟捫胸長歎

灑涕而談爲兄極口稱絀且深囑其睇睩費公  
長者兄試枉見之崇安史亦步弟與同籍而交  
契誼高古人足商緩急凡有縣力可効處不妨  
垂諭勿見外也白雲無情曠望迷目閩浙一衣  
帶水兄好游乎毋如弟之匏繫則弟幸矣際此  
周道往來繽紛然無可爲鱗羽者偶廣文某丈  
亦稔知兄與談甚悉因其使便走尺一以相聞  
慚愧祿薄無可爲贈區區芹致資兄捧腹臨書  
神往勿靳好音

與繆當時

未出長安眎長安爲讎今出長安之味絕少而  
知已半畱長安則屈指來冬入長安時又仙人  
矣淞江濤春明柳與年丈醒裏平分夢中交換  
然而通問之書窅然蓋自有心期而竹素桃文  
非所言贈也弟與年丈異氏宗弟今同籍雲泥  
矣而素心往來原不在同籍時故不惜有素心  
之懇弟嬾骨嬾情與仕途相謬受事來百苦攢  
心惟有飲泣無告人處雖有一念樸誠斤斤細

節頗見知於上下而情與事違病以愁積度日如年捱刻似夏兩月前以萬不能忍亟草文移改教而畏而思逃逃乃益繫計無復之惟有耐至入 覲時爲此舉而非年丈不能預爲之地蓋至期本省司公同在部堂當事者非有先入之言勢必取決於司公而司公未必相許則亦無可誰何望以此情同玉繩諸年丈共爲扶掖是則天涯兄弟向中禁僊求吹蘭蕙香者此耳適有西安廣文李使人燕便附數行不任倦切

與何仲先

烟水何闊歸雲何處回念桂鳥飛餞依依握手時又且秋葉鳴梭明河催渡矣雲樹之思何日不以知己耿耿也再過太末他無可慰惟意中于徐而體中因不甚惡非宦興之忽濃也謂三年旣過兩年易也巴一部官苟免於素服角帶便着蠟屐荷衣問農問圃長侍老親長對友昆鷗還海鹿還山爲期不遠是以愉快斯言也一字彌心永墮黑業且奈何以襲套語爲宵人舌

兄試券之此番主文鑑者不知於我諸故人何  
若無皆失無皆得總不足嬰游子懷所可嬰者  
未免世法繞指以目前景爲介介出我輩心期  
素耳長郎君遂成一時才士次君當不久爲二  
難亦無煩弟嬰懷然嬰則否而懷其懷其退然  
如不勝衣吶吶不出諸口良玉溫只爲家之吉  
是所與兄共慶者耳

與張皆可

弟之念兄兄之懷弟喜慶甥之衣冠望惠侄之  
幫補柯山續游言猶在耳虎丘久別思不去心  
振先湯君純李一一牽腸鏡澄朱達生王時時  
掛肚至於貼派役之及彼首詭寄之終求濟此  
皆自然之情必至之勢何足道哉所極緊要懇  
切奉求兄者卽日儼裝同太淳來而其必該來  
之妙理則亦盡於太淳柬中一事兩述如好曲  
三唱抑又贅矣目爲引望勿使空瞻

與張原美

知己之懷百年一日則叙懷之詞亦千篇一律



矣更不復贅但前書亟有所懇旦暮盼望僕夫  
回衢當挾得好音矣弟所言聞黜者實未有指  
只以老母年高旣耳重不聞戶外家叔寡交卽  
聽遠不出里中直諒如兄復廣聽聞凡有傷弟  
之生平者風聲吹到自能泥補故端以奉煩雖  
然此非以修名耶靜言思之乃有陷於不知自  
名自損而欲他人爲我脩知己爲我補抑何謬  
哉資兄揜口已耳一切錯履唯兄幹旋不遠之  
復敢且再誤統希炤原家叔事真堪髮指弟稍

稍爲應敵計恐未萬全設有緩急懇兄仗義顧  
小弟之薄面推全鏡之餘情知兄心許久矣大  
要家叔素懦非彼之敵然彼其人恐亦無樂乎  
爲敵者當今之世讓人一步便高人一籌火星  
在身便不得不振稍與火遠切莫吹動恐我吹  
去風逆還燒耳湯振先思歸之志頗淡偶問其  
故謂臨岐之前數日大相反目抱憤出門兩不  
相盼彼無贈淚我亦寬腸幾有感恩知有地不  
上望京樓之誓弟每以薄倖戒之弗聽也聊以

助撫掌

與王東里

翠華下賁深愧饋饗執醕之艸艸也父母之尊  
兄弟之愛或有貴于無文者則亦可以自慰然  
去世法遠矣回遡晤言持情耿耿商風吹鬢遐  
亦無聊然脉脉此情雖不能爲臯衡岍芷快衰  
清風猶幸有代爲瞻依者家兄薛廣文在家兄  
頗挾才華志每適上因頻遭繳羽姑假途退鱗  
以問業于名手其來就宇下實擇地而蹈望明

而投非蘋水便緣也寒宗三世薛氏先人尚以  
薛起家至暮年始復俞姓然惟至于復姓而情  
愈加殷蓋先人之遺命也以老年臺憐才素心  
物色風塵之外其垂眼相得俾隨鞭鐙者當有  
日矣而區區鴻雁之情尚無以自見意者噓之  
植之且進而子弟之使得竊大羅天訣牖之彼  
岍其年臺無已之盛心乎又何可鳴感也因風  
懷注跡遠心勞惟時被好音爲慰

與秦

綸不敢爲佞實于行藁中精神往來久矣見其  
文仙風飄蕭清映肌骨遂想見人希旦暮一遇  
而不得瞻對于茲地也再讀高韻巧奪天孫焚  
香漱泉臨風吟罷齒頰俱涼古今之業兩成絕  
調宜招造物之忌也造物忌才當亦憐才將來  
定遇一異人一洗數年之厄試志鄙言以爲後  
驗昨所云江一水江右人也千萬留意

與陳載甫

張籍詩多病減志氣弟不時爲退鱗之想爲病  
也丈則何萌此志事無大小全賴一片心血心  
血何來生于一副志氣孤鶴枳棘一枝未安此  
其蹙隙耳弟問例于識者知東甌有新令便姑  
蔑無改官始終得領教益無煩爲離索之感佳  
筆惡書勿謂廳有餘枝遂以捉刀相疑素懷日  
積承欵不遠未盡所云

與張倚公

間闊良久睠懷不寐然含情自知兄必不信蓋  
時爲游子密有心期而及返故園反疎晤對則

款款之衷奚以自表于仁兄也因懷兄不已而高堂之晚祉切切嬰神因懷老伯不已而仲氏之孤笑時時涕念凡此者既有兄在而復得原美以一腔熱血相與于天倫間又奚必弟以空談博雅誼之名矣弟再入太末善病如初若非有極契之太淳朝夕爲懽幾無以自必又不獨以渭陽情加惠吾子也乃弟需太淳甚急而太淳視弟甚緩必欲棄我以就瑩宇黃文且以兄之入要爲名夫豈有兄而以此狠心事遇我者足

見太淳之詒我也萬一有之望爲婉言以謝黃丈卽黃丈怨兄兄勿怨弟爲弟而受怨以怨而成德德重而感至矣慵嬾爲癖筆札俱仇若無此事相迫而咫尺之通不知脫到何日則又何敢以相思見信于兄丈也冗次草率不盡欲語

與陳載甫

二扇怯興到時書遂韻致不惡似足以釋前罪然未快所願他日欲以赫蹠數幅盡書生平得意詩以謝知賞貴門人徐光稊翩翩吉士受台

丈器愛素矣近爲其祖二千石邀丈不朽之光  
光旣不朽事遂非常弟敢不鄭重實稔此公之  
宦績鄉評雅不負茲舉特僭齒牙爰襄盛事非  
敢以柳下惠之言邀信于台丈也兀候四尊未  
得遽叩河下又恐桂擢將發先投此啓以引晤  
談

復周夢尹

流覽世路

如弟者雲幘道經何等

疎慢主人之禮同藉之情一刻抹倒方至今無

可施顏面而翰教顧反言之豈媿弟心耶弟再  
過太末病固猶初性益滋懶取咎之門不一苟  
全之計無容將來且不知作何狀所喜宦情原  
淡故鄉山水夢寐爲勞頗有心期今且未敢深  
談也年丈才華器識不兩歲而英聲燥耳貼水  
漂鷗摩天勁翼可同日道哉賢公子年姪度衢  
而東遇之疎節無禮亦復如是而遠來之贈反  
不敢虛荷有雙南金媿無青玉案徐有以圖効  
也草次言謝諸惟炤原

與陳韋翁

綸征軸乍北卽寸腸九迴矣不待今日也榆莢  
旣更未嘗數行通候然每于家報中得寢興康  
勝大慰遠懷音問雖疎精神密邇也長公親家  
得名山爲館地襟懷愈竒才海愈溢每一念之  
心飛神往然其聲名太燥燕中縉紳欲一識韓  
而不可得祿位名壽四字能兼之者古來惟舜  
且當今之世露不如藏願長公善愛之也綸六  
月受官侍對之期尚有百日思慕孔切舉眼無  
佳况雖長安鶯花殢人而兩腋翺飛目盼南鴻  
耳

與管席之

編愁以爲膺未足述相思也雲中之音乃得之  
卯金刀竒緣哉弟此番來病稍可而懶較甚委  
懷丘壑日想退鱗固未必前生有根荻者然世  
上淡泊人儘有何至如弟可笑可怪可暗暗驚  
喜而不可語于人且未可盡語于兄者遂亦未  
可自測三輪二諦徒滿人間席之一向好笑乎

不向僧中老此身又于何處放着也兄詩大妙  
卽此詩卜他日有放着席之處而今猶未能一  
鞭先到未知是爾是我耳兄謂秋涼過此何故  
而罷早是今日纔見此柬若是早見不害弟預  
報青山今將安解乎然此期終不可負春來未  
晚亟須畱意除夕祈夢此第一件吉事矣外附  
數年前一未了之事心日感而無賴又未可以  
盡言

與劉元聲

拙疾相倚薄還得靜者便此弟之邇况也仁兄  
邇况每得之太淳竊以爲慰旣慰遂亦忘言非  
弟不能言非兄不能會間或有未會如子虛叔  
彙諸兄幸與共會之若振之先生日與山水間  
相對矣別有一奉央在尋常寄語之外望二兄  
與子虛俱畱意弟春初一京歸而抱病夏初一  
病好而卽行目未及瞬間不容髮與素娥言願  
未訓中懷莫喻摧膺悔恨糾結爲纒因荒忽形  
夢達于星闌無刻不晤晤輒顛倒或祥或不祥

多不可解者得無復有風逐蓬飛之故乎他人  
驕驕馬而我薜蘿心息徒之志無日能忘弟元  
非此道中枯壁上者况知己情深青山已諾尚  
肯百里局結復負雲霞哉此時錦瑟樓人情芳  
在否兄輩且作遠鴻翔去當責弟以今日畱心  
之報勿令其羅帳咽寒風也凡此語意頗屬愚  
癡幸爲弟亟一走訪深致懇別不安之意月臘  
弟以給由入省特走一役報渠無恙薇藿之將  
統在是日惟詳道外會銀六兩便附元聲切骨  
感恩時爲泣下勿因數年無賴疑弟爲負心人  
也素娥之囑幸毋緩視搔首悵悵延盼徽音

與陳古白

得兄書乃在春之半而前此數日弟亦曾致遠  
懷情言索索兄見之乎犬子得師皆荷明賜前  
書所囑此其第一義也弟自出牘後殊自慚愧  
才華如古白尚困鱗池中我胸中若得古白半  
分錦繡則今日一第亦傲以爲當然矣弟不久  
卽歸以便道訪兄于京口計焚修之處必在金



焦兩山敝友劉季昭久仰高名今亦在隨從列  
乎外有奉懷詩數首來人甚迫不暇請教後有  
便鱗當并拙稿致上兼求一叙定名陳俞兩生  
南園二集矣弟試作甚不慊意不可以示兄庶  
幾平日頗自苦心見知于造物若論試卷則萬  
萬無是理乃知此道遇與不遇又有在入股外  
者兄亦勿過認真只落得瀟瀟灑灑快活過日  
命中若有必無人奪去若時命未逢亦必不爲  
躁心而先與之天生古白定有一發付處但寡  
交與省繁務才愈高而自歛名愈竒而自愛則  
似與天心相宜耳特望于此處稍進一解他無  
可片獻也冗次聊附短箋以代候兼廣兄意如  
左所云至如思念之情不待言述

又

三月杪作數行奉候且南鴻數返而嗣音罕有  
蓋知兄讀書北固枕江高吟瀉筆萬里才彩與  
山霞爭錦而地以兄靈兄亦以地王斷去塵囂  
神輕夢清寤寐可以往來不待尺素也然兄亦

知江山之勝乎朝奇暮幻爲千古絕大文字然  
非雲卽霞非烟卽雨三尺童子未嘗不經見文  
之所以壽也彼與兄鬪才定鬪不過而才多爲  
患似反輸一籌兄能以四出之才華爲三尺童  
子所嘗經見者乎况以四出之光歸并于一隙  
則此隙中之徧現更不可方物願兄留意才名  
爲造物之所忌如終當時張異度尚未得兄錦  
繡中一線而當時今始一第異度且欲爲昔年  
名士而不得蓋人情惡薄今且彌甚而天之度  
量似亦寬于昔而狹于今可畏也且才華爲山  
岳異寶收在性靈自有大用非以堅不示人遂  
謂虛廢也弟六月受官七月領憑木葉未下可  
與兄把臂于金山妙高臺兄館之間左有劉季  
昭名懋文者向慕已腸熱今定入金蘭簿矣此  
兄意超而心虛幸朝夕共事弟有拙稿幾二百  
篇在太淳處託渠付梓乞兄叙額以爲重又欲  
得姚孟長一篇反瀆兄轉索千萬畱神

又

夏初扁舟相送時千里命駕之期已訂矣昨所請把酒寒江品題青山七里灘頭揖清千古特期無負前盟非擇期自便也弟十三薄暮抵京口十四進謁晚遊焦山十五謝別而歸固是兼程猶恐未速特走匹馬再訂一到解維兄母猶豫也兄故多四方之志必不爲弟負此夙期且此游甚適總惟兄意可一年而歸可半年而歸可一月歸可一到卽歸野鶴江鴻不足費躊躇也奉晤在十七之辰啓行在是日之晚因家母在前途沿待不能遲頃刻萬望火急儗裝爲禱

與陳夢維

諧聚兩日病懶未一爲杯酒事殊負兩宵然此期不遠亟于署之外內間埽一偏宇養竹數竿精其供具牘曰淺遁窩以邀覆髮人爲卜夜飲勢不能不來其主公此時主公勿不來止遣覆髮者來也昨所述周道尊語愛兄哉別後詳思之亦可以已薦而謁已非相知且當必有迫之而然者其不相知甚矣有情變有道變謝薦非

道也又不及情不如其已弟方欲儲三十金置  
十三經廿一史爲家園長夏之事正苦其難因  
思我兄再益十金便有其料忽生鄙心乃以奉  
歸至若敝役今正在龍游弟何難飛一騎追去  
而甘罪矯制非愛兄獨出道尊下也端此晤盡

與張赤涵

吾與兄苦欲盡甘將來乎甘有不同皆甘也時  
感愈苦更甘也未到甘時望着甘境尤甘也其  
舉數斛酒遙相慶哉扇俱不佳字怎得佳非慢

扇而不佳佳字撐腹對此惡扇遂橫撐堅閉而  
不肯出其奈之何兄以送人姑言此書未必君  
宣真筆他日索真者再送可耳姚孝廉受知於  
兄兄弟子之更子弟之弟之幸也夫人被德于  
師之感深被德于不師而師之感尤深因此師  
更得彼師受彼師之德而爲此師之感尤深之  
深兄其使姚君深感弟哉而弟之感兄又可知  
也千里哀腸數行閔話而已

與王太玉

年兄乃右席師門耶弟之爲人無所不款款無所不落落落者款款之真不知者以爲無人禮其知者以爲有素心深知者直謂具千古情也是在探腸而照惟年兄哉弟再爲此游較前如食蓼蟲身在苦中不知人間有何許事屈指不遠稍還堂下侏儒之債便以六年三徑之資營漢陽樂事老其生年兄飛黃日乃弟守黑時矣此語足券非世俗言也姚君故是錢師門下弟以同在師門而亦以友道遇之不敢自爲弟

子也獨在年兄不然年兄旣儼然以師道視師之子爲猶子自當儼然以師道視師之弟子爲猶子且姚君慕年兄甚久而甚篤每進之左右有秘必授無肝不吐至于經學年兄爲海內宗工出一緒餘便使人以一滴水得百尺泉幸母于姚君惜金針一度也相晤尚有年餘言之脉脉

與文起孟長

兀念二兄無刻去懷今則稍解解以離索不遠

鱸魚故土蘋果長安又瞬息也弟生來守一退  
字性調亦與淡宜天資實已近道乃復隣我寧  
穴示我儉形顧影而駭前途之志更如水矣相  
知切莫以遠大望我弟固不能無望則孟長意  
狠而氣猛獨文起兄優游性成慧根爲誤意奮  
則唾壺擊缺念過則書枕清眠勞逸之情不遠  
失得之門亦近既可甘得誰居苦者苦志苦功  
苦行苦修何欺我哉向平之債粗酬幸母復以  
酬債之債爲念慙且無賴勿求于心以俟一舉

彈指臨期萬萬抖擻至鼓舞之藉不必他求只  
涓陽相礪足耳明冬北游文起斷勿違約得豫  
期徐仲容更善惟孟長恐不能無後先而公鳴  
則要久矣賦賀二詩與孟長之旨恐未合取其  
文詞可也文詞至古白詩而頂尖矣孟長誇仲  
容作甚善當是如何周季侯屬弟致意不久課  
成徑達孟長陳玄史復前事力爲剖明且已力  
託署勤者不知竟作何狀徐冲玄累弟小累孟  
長大弟不求恩而弟之恩孟長則一生以之矣

適劇冗不復多語凡相知幸各道意

與君亮

兄于晤吾齋言弟得力全在會考時席之奮然引腕立次會友姓字將舉事焉後竟何如恍忽年餘風光颺激弟雖聞問嬾通漠然如無肺腸者此中欸欸實自謂無讓古人探膽伊誰作此瘖語兄謂何哉長廊百步臨風睠言玉昆金友之懷鄙衷自會何幸念餘遠來攜有尺素兼示妙篇與古白一字一吟斗酒爲罄不謂遠竄苦

鄉而樂事賞心不異晤對秋春之舉良不足爲兄慮更不足爲兄喜立地得手英雄已困然吾黨之氣實一稍舒所私慶耳仲容朝夕酒情自濃亦文情同調知心互礪何埃弟言以劇冗不及啓仲容亦素所相眎而笑今遂布紙無言乃欲言者明冬北游吾兩人與仲容文起連騎而進切勿後先昨柬文起亦曾以是期之恐仲容心活而戲久要祈我兄更訂確耳諸不備

與太淳

兄爲倚公奪去雖幸與古白朝夕而古白復以  
不耐蒸逼思脫籜籠兩日正罹此苦一爲畱古  
白而焦心一爲恨倚公而致病至于五斗困人  
一腔煩紊兄所素知不必道也幸此蓼味嘗已  
不久渭川花竹之情歡酬有日但恐來歲之甘  
方到弟而今日之苦又到兄如參與商竟成離  
索奈何哉邇來詩興如何欠一拙序而弟固以  
多冗未成兄亦遂委棄不索豈忘之乎弟則時  
刻在心也湯振先因古白而思兄益甚弟日寬  
解之而解之愈至思之愈深忽忽長吁淫淫淚  
下爲此態者自振先而下不止一人然詳而述  
之似近于戲直可意領耳眷念情濃懷詩未就  
仍以舊作錄扇頭一二以將遠心諸不暇備倚  
公叱名

與某年丈

馬頭糞塵彈指又到一到而丈爲青紫司命弟  
侶漢陽鶯花矣清風吹來汪波流注玉筍亭亭  
門牆有色旣已得人可以謝矣長林自貴何必



三公爲年丈師者不旣傲然無憾乎弟輒無狀  
每以夙期遠託不肯多讓名賢而片心雖素腰  
骨未堅病多而性澹必不向此中生活息旅之  
盟已矢日指水矣故人劉生名曰傳年丈親赤  
子曾大有德于先人久銜報而未遂遠來求見  
了無他心知丈之同蘭味者唯弟而以其子青  
衿名光斗者請爲桃李之上枝抑何其請之切  
而求之雅也必俟其求而始爲道地弟已負心  
則弟之仰禱何似而丈忍不注念乎三分文七

分看十分貨百分情情不可強必發于其人之  
緣與文之相知然有仁術焉每接其人每覩其  
文而恍然弟在自不求情而情至矣千里難通  
唯此一懇萬勿以尋常薦牘爲視素緘寄意不  
禁睠睠

聚臺叔

骨肉天涯痛心何問所更痛者吾叔以逾艾之  
年跣斷雲之地而行李一肩復遭肱篋竟不知  
其何以前也每于往來之客訊峨嵋風土頗不

甚瘠稍用以慰而欲通鱗羽則宵隔一天惟有  
脉脉含思書空灑涕而已綸向來夙疾至今不  
減因賦性原非此道中人所謂爰居毀籠窮麋  
入阱時時飲恨事事違心宿昔之疾是以愈痼  
今幸爲期不遠捱過年許百里之局好友脫去  
將尋渭川樂事畱此殘命喫酸梨矣吾叔亦有  
舊恙今已拔根去乎泉明三徑之資又不知何  
若勇退固不必久客亦非計屈指三年看山緣  
了則艸堂烟樹可以相期父子叔姪天倫團聚

何負于我而我負之可惜也可歎也大弟雖不  
能時爲探問而近來學識精進幾籌且其人朴  
有至性却是有骨氣者此便家門之吉若天人  
叅半之數誠不可不勉然必有時未易強也太  
嬪諸嬪知金清安綸高堂以下亦俱寧穩但慶  
郎兩年連舉二女諺謂盜不至五女門今幾有  
其半矣便附嘉定州尊一啓欲備一微禮候之  
而大弟固執云已悉備遂不復疣止以二詩扇  
湊入乃若七千里之遙止采江蘅四種爲壽真

可噴飯

家書

自聞進學之報喜憂各半汝母子歸後忽忽心動若有物焉據吾懷者每以此言于湯五君而卷上墨痕之險果令人食不下嚥者五日後得二母舅手書而稍慰然千金擔全在覆試卷俟之眼穿何人役兩到而不寄也此事必送過進學纔穩穩是箇秀才日夕懸念何日而釋鵲噪鴉鳴風吹艸動皆心兵也萬一無恙絲毫皆二

孃舅之力銜恩懷報頃刻難忘然可懷而不可吐汝試吐之亦見我非負心者早上送學次早謝院折而謝府謝縣薄晚便可解維至學中事體合該如何不妨囑二母舅一力擔任于師長之前至差人迎二母舅時妥之耳我爲半年離縣庫中緊要待解錢糧俱爲署印者借用過半人牽牛去我拔牛膝以催科極拙之人爲挖肉補瘡之計日不暇給重不能支故明知家中缺乏親孃久疎甘旨而槩且違心非真置之度外

也汝可委曲宛轉乘親孃歡喜時節高聲笑容  
而詳達之大母舅倘能蹙拋家塾一同來此妙  
不勝言同足二舍尚是穉齡他年成學其關繫  
未必全在今日切勿老癡不妨以吾言醒之也  
其所囑吳親家與派役銀二事亦專俟其自來  
當一一妥貼站船人夫各役俱先期撥在江頭  
候久星火馳盼勿遲勿遲

又

母舅書來道汝文理頗進心志已潛已非昔日  
阿蒙我心大慰但讀書與人品兩事也而實相  
符寄趣卑下者其文意自多庸陋之想託志高  
遠者其筆端定多超曠之致我見汝平日心性  
欠溫精氣欠銳意向欠遠甚以爲憂非憂文藝  
之不就憂心襟品地之非吾子也當今之世稍  
識字者便多少年習氣其貴介而不識丁者便  
多公子性氣凡此皆極庸極醜極陋之態彼自  
沾沾得意而人視之有蒙口而笑掩鼻而走耳  
汝書來恐我得意之後荒嬉孟浪不自珍惜此

俗士多有之我鄙而不爲也今科有琢州馮振  
鷺名銓者十五歲發科十九歲登第其父亦甲  
科也而彼恂恂若編戶之子且不自知爲少年  
進士卽周玉繩弱冠而取會狀亦無異秀才時  
此二兄真吾師也我年紀老大鬚眉偉然纔得  
一第到手而遽以爲得意縱情于花酒之場可  
謂有人心者乎我歸以八月爲期一歸便驗汝  
學問之進步與器品之所就何如萬萬砥礪勿  
辜吾望也宋師近况如何將再圖一戰乎將一

意課子乎汝可每節中一往見之且致我遠懷  
之情我後次人便當致柬也渭陽師所柬囑者  
當一一留意因羽急不及另啓統俟後便詳及  
家中人不許在外生事須要加倍小心和順鄉  
里我到家自知好友斷不姑容一一曉諭之勿  
誤外告示一紙貼在大門內舊有告示俱換去





自娛集

長洲俞琬綸君宣甫著

詩餘

爲顧文英作古鏡詞

文英善書以碧絲作小行楷繡之盛鏡  
囊以遺所歡調疎簾淡月

張郎一去君且代郎看雙蛾解理贈別躊躇不  
忍把君分碎問容顏君獨知顛顛受多磨與君  
無異廣寒三五嫦娥愁向卻元自己 晴空裏

似丹青點綴箇中小小洞天深處背地沉迷形  
影都無據憐君自爲分明累看盡了漢宮人淚  
架罷粧殘瞥然收卻遠山橫翠

後有人蠲二千金娶之娶未幾而英死一夕  
夢英相對如常猶謝予此詞予曰殊悔有架  
罷粧殘二語遂爲卿讖英曰此亦竊疑之愛  
其佳不請易耳予所云二語之讖醒時初未  
及此甚嘔醒不如夢之神清也但英言竊疑  
等語未識此時誠然否當是予意外起意然

英故慧心人或果爾未可知也

友人有一十二詞爲古來薄命人洗恨者獨  
缺馬嵬一事予爲補之調惜餘春慢

有限君情無端妾命一搦牡丹顛顛紅塵騎遠  
解語花殘拆卻羽衣心字休賦樓東怨懷肺冷  
津消玉魚敲碎怪溫泉不與淚水同結汗紅同  
逝 怎不學賣騎當壚五湖載隱共守星橋盟  
誓胡笳散魄羯鼓催魂血濺一窩螻螻巴水蒞  
蒞路窮便引仙都訴誰悲思枉收傳錦襪餘香



留得鈿釵遺事

賀新郎贈倪馴之再娶

蕙圃春風續羨天桃之子于歸渡頭金谷綠染  
漪瀾垂楊醉解舞暮朝相逐芙蓉裏鴛鴦初浴  
簾外卻誰環珮至繞笙歌一派傳宮燭訝蓬萊  
飛鸞轂雲英投杵闌干曲一聲愁兩聲笑語  
三聲叮囑囑付多情同心贈結衣羅白首杏枝  
雙宿拚映羞蛾堆綠摘取宜男喜夫郎帶笑看  
妝束天賦就藍田鼓

贈韓香

粉絮隨輕風引燕子言愁人不省慣他錦色解  
欺人半簾瞥過飛花影一縷春剛絃月清藹俄  
延掛林末停樽欲許奈情何到得情來和誰說

閨怨二首調點絳脣

好夢連宵墻頭度去秋雲老鵲聲噪想來人到  
報與愁知道徙倚風前寶篆飛煙巧蜂衙鬧  
病來消耗報與他知道

右秋怨

其二

靜臥牙牀蕭蘅怕見堦除草糊塗好幾時春到  
莫與儂知道 占斷風光卻與風光笑癡情惱  
把牕鎖了莫與春知道 右春怨

四君醉我惜無一共醉人牽我襟袂竟踏  
雨夜歸旦日謝之調西江月

此日桃花競放薰風幾促春衣瞥然掉入武陵  
溪指引迷津謝你 自媿塵緣未淨丹成後以  
爲期仍教短檝捕魚歸更是風風雨雨

鵲橋仙咏月

客店游魂千家砧杵一望素山白樹

此句若咏  
雪則無味

風前

把臂盡幽期聽多少啼鶉處處 淒切笙簫斷  
腸詩句散與人間無數不許閨中暫得暝弄梅  
影牕前故故

情夢

醒黃昏睡黃昏畱半奄奄解半魂去去來來勞  
殺汝綺疏香雨玉釵溫

其二

乍明燈乍暗燈暗裏來時催去明幾處燭高雙

勸酒偏容暗結影中情

十二紅 以下皆曲調

病難勝酒愁無奈便是酒能勝病悶難開你我  
容顏心坎迸成塊人在冤不在如醉如獸從前  
愛逐件揣把往事小嫌猜巧爲愁城解那日他  
閑言閑語都是我自起禍胎那日我受嗔受罵  
正是他好心怨埋思量此際越添懷夢回驚痛  
呀你在何處去來忽時還夢呀元來你在風前  
搵腮這冤愆是我前生買得今誰賣見柳聞鶯

你的音容渾在兩人心縫血粘來花印雙鈴蓋  
由人笑笑我駘絲腸斷處怎生乖從來瘦瘦轉  
柴尚餘殘骨爲誰捱風燈慘月猿哀

孟珠十二調

步步嬌

記得文無當年贈闌干倚遍無人省驀然兩度  
春月暗燈明總是人孤另橋上共銷魂至今可  
已都銷盡

山坡羊

好花輕倚

深

深

更深

宛轉纏綿  
不勝此夫  
不勝此夫  
不勝此夫

看好花容提起你當年風韻看瘦花枝又提起  
你年來疾病媚人天舉目傷心到不如困人天  
儘日如沉寘苦黃昏無聊自遣尋欲將酒解酒  
解相思恨若可解的相思定不是相思十分十  
分縱飲千杯醉不成十分便爛醉如泥暗自慳

忒忒令

笑癡心無端愁恨料伊家衷腸無准果然無准  
苦思伊則甚只怕你意見真我情兒冷使你到  
做了閑愁恨

香羅帶

別時聞雁聲別時到今偶看雁影心暗驚又記  
風前攜手荼蘼下也到今日依舊西風緊比似  
你寒牕和雨空浙零華如飛向天涯也與我輕  
揭羅幃探故人

鬪寶蟾

淒冷漫自尋追省悔輕別不道恁般難忍未臨  
行相期青鳥頻頻如今怕重提舊姓名怕傳聞  
病害侵狂睜睜到不如斷絕鴻音安穩

玉芙蓉

支吾強笑吟有恨惟吞飲看寒雲依依戀月氣  
氲難道天宮也有此淒涼景明寫出人間離怨  
情天工手縱天工手寫離腸怎不差半分看來  
就是我離腸影

香遍滿

柯頭葉盡空林昏靄沾翠衿只見山頭一帶排  
愁陣高高起暮雲茫茫隔遠情果是雲山隔遠  
情難道無處雲山盡

醉扶歸

意見中好似你刻刻相隨定乍思量恍見你笑  
臉謝殷勤乍丟開恍見你帶淚將咱問把別來  
淒楚舊精神都化做了當年會合初行徑

江兒水

淺薄緣和分深沈義與恩子規懸樹聲還飲因  
緣越假情越真蜘蛛臨絕思難盡莫道如常蘋  
梗旣道情真便不是花叢蝶陣

玉交枝

解人牀枕夢兒中穩穩相親容顏誰道無馮准  
管不得曉來添箇傷心左右把日  
夜離愁付與君說甚冤家重別人初醒雖不如鸞膠再整猶  
強似支頤暗忖

嘉慶子

不怨東風催菽零不怨湘江阻客情怨只怨此  
日逢君又一日良緣累一生爲新人有故人爲  
投情有斷情

僥僥令

無言常自警若使負多情冤債一生誰擔任豈  
但是青樓薄倖名幾回恨把蒼天問不恨使  
世上有情人薄命恨使命薄離人偏有情

四朝元有序

黃必顯偉然男子矣然弱年奇麗非人  
間所有後來之秀復得小徐予嘗言得  
一小二天下可廢郎童得一小徐天下  
可廢女子或謂過贊小二不知壓下小  
二更無足述益令小徐擅場矣此曲蓋

爲小徐作也曲成示一友人友人云惜  
未甚工豔不能爲受者生色予曰取其  
不類讚女子者友以爲然

粉郎姣麗雲絲覆額時羨新鶯脆語社燕嬌飛  
香膩勻肌理把花容廝比那花容怎比堪憐處  
酒暈雙頤歌歛輕眉不解粧喬亂排儂媚嗔喜  
都風味啖抹殺那侍屏姬小小青衣偏勝着練  
綦溪女睡眠覷迷離櫻桃笑語微他是採芳花  
使害多少愁愁悶悶玉樓人意玉樓人意

其二

春風搖曳花間擲果歸看游蜂成隊粉蝶相隨  
記年華三五初交歲問春情知未料知情還未  
瘦腰如病不爲幽思輒怯輕風非關憔悴怕擔  
不起風流字啖休放過少年時荳蔻含胎難得  
東君有主縱未許卜花期先把閒情繫柳絲滿  
懷心緒低低啞啞欲言還住欲言還住

其三

非桃非李粧成別樣姿怪天公何事變作男兒

是男兒越覺憐人意把千愁付你費千愁爲你  
何必弓鞋自是凌波不待蘭膏自饒香膩不畫  
山橫翠啖莫說有情癡看滿座瓊英也爲你紛  
紛墜寒月入羅衣嫦娥也愛玉肥促花開連夜  
莫老却潛潛等等弄珠游女弄珠游女

其四

紅芳初盡東風好護持怪的是游絲拴繫俗子  
呼盧嫩柔條偏惹催花雨願伊家須記囑伊家  
牢記休得破顏容易須着意低回不是千金切  
休賣與莫愛閒調戲啖占盡了可憐姿料半世  
花星不出身宮裏巧語妬黃鸝高歌悞落梅怕  
魂勾春睡快將青瑣重門深閉重門深閉

尾聲

願爲君影相依倚豈忍把風情月思到鬢老花  
殘又付誰

元詞四朝元不用  
尾聲止荆欽記有

江行紀畧

閹十八

一天細劈雲如絮一江淡浸月如盃停橈呼酒



尋春睡

醉扶歸

春睡睡不去濤聲夜起

醉翁子

睡不去光

透斜櫺琉璃碎睡不去隔船頭語笑低

僥僥

睡不

去丁丁鬪響墀鈴微睡不去牢牢小犬江邨裏

醉扶歸

馮念誰在溟濛際

五更轉

徹夜愁無寐睫眼天明

矣

月雲高

只見初日浮天萬山酣翠

孝順歌

翠灑萬山堆

裏輕鷗貼水面儼飛曉霞潑潑點人衣新來燕

子沙中語

皂羅袍

忍不住有所思兮

玉交枝

有所思兮天

一隅

啄木鵲

滿眼添心緒

潑潑

山如帶夾柳堤猗猗輕

浪拍桃溪叢香除遶岼圍行行人向曲江歸

甘州歌

笑風檣萬里利名催不問馮夷

好姐姐

擊節中流

為甚的煙波釣艇今有幾

青歌兒

挂征帆何日休期

五供養

莫到江心補漏遲莫向南津問渡迷

嘉慶子

歎招

翫那見翫歸歎招翫那見翫歸感鳴夷還須子

皮

川撥棹

我且借落江城五月梅與行人共醉三春

水

玉交枝

湘娥環髻流鸞亂啼江蘆逗柅晴風細吹

從來青山不與興亡事

皂羅袍

問陽臺宓妃問陽臺

宓妃鮫人織淚琵琶可濕青衫袂

香柳樓

鄭郎合浦

珠還未秋蘭肯結湘神佩陌上尋花歌向大江

東去

江兒水

傅靈修五調

有序

脩童名壽字秋英又自號無雙善琴善書善歌蕭散自放交不濫與情亦寡合日以風塵爲恨欲得一才致人畢其終身偶出側理索一言爲品題予曰子喜歌卽以歌贈疾書五調示修修躍然曰吾生平無知己此詞吾知己也

二郎神

春時候看滿院繁紅爭鬪第一當場人在否小名兒壽字秋英又喚靈修架上圖書爲素友愛琴歌也不拘手口笑纏頭他是箇女中裘馬風流

集賢賓

癡中浪謔狂後酒意闌珊不會綢繆道是無情原是有到情來又却還如舊芳桃媚柳怎抵他數枝梅瘦親伊久纔見得粉汚膏臭

汚平聲臭音朽去聲

金衣公子

懶去整衣篝護殘香煖素幙傷心淡月牕櫺透  
杯間自羞人前暗愁聰明願付聰明手謝牀頭  
解人寃夢常不在青樓

琢木鸚

幽閒態性格柔舉舉朝霞天上有不枉他自號  
無雙徧人間果是難儔字學歐顏常帶柳口不  
通文文在口一片閒情誰處投徙倚盼東流

貓兒墜

畫屏春藹簾不上金鉤怕野外迷蜂強逗留雖

是眼前笑語事心頭何由比做得梁間燕子悠  
悠問前生玉杵還靈否迅速風光不可畱莫待

鷺老春歸人自醜

小翻十九調有序

翻又字蓋玉年少清麗穎慧過人破瓜  
未遠當月始通母氏亦昔年名流言玉  
謝指之也既別翻讀書攝山念翻不已  
曾把禪機銷此病破除纔盡又重生作

十九調

山坡裏羊

輕飄飄駕東風的桂楫急濶濶渡津口的桃葉  
鬧喧喧長安看花疾忙忙探問秦樓月豈料我  
僂緣夙世結遇芝田有女來姑射滿徑香霏徘徊  
花榭幽絕疑是文蕭家侍妾清絕却是章臺  
柳乍折

步步嬌

溫馴性子鶯黃頰宛約天然冶單綃整亦斜玉  
齒笙簧輕巧調百舌舉止舊家法見了風流燕

子思王謝

醉扶歸

愛他情眸一笑波紋疊愛他無時睡足海棠怯  
愛他兩腮檀暈微微靨喜容常帶不知愁輕風  
團攏腰盈捻

園林好

正遇了氤氳使者快將我因緣薄揭他則說你  
兩人深謝喜名字並行列該緣分這時合

月雲高

銀鞍忙卸春風逗馬也我只爲消殘渴忍不住  
將瓊漿借誰望多情把漿兒先待者他一盞玄  
霜味反惹得我心羹熱因此共把湘靈蘭佩結  
再指江湄盟誓設

江兒水

看他靦覷纖肢起燭光引盼斜雛鷺羽弱驚寒  
怯荳蔻含胎丁香結新枝好辦寬心折須把美  
滿工夫漫且喜鳥道鴻溝恰方始霞侵月瀉

三段子

交情正愜恨平雲終歸楚峽歡歌正叶襯花眠  
終爲夢蝶怎當他相逢豫問何時別別時又問  
來時節旦暮相期猶啞聲嗚咽

皂羅袍

非忍舍連宵懽愛奈從來無不散筵設杜鵑聲  
飲淚成血蜘蛛命盡絲難絕披衣欲起幾番捱  
脫把渾身摩遍雙鬢緊折捧住了粉腮膩臉相  
偎貼

節節高

衾溫衣冷怯竟相撇猶將袂口牢牢掣神飛越  
把淚遮心如裂若道丈夫有淚非關別必然不  
是傷心別站看行箱促馬裝一鞍載取愁盈轍

玉交枝

離愁滿轍載回來消停受些便時時消受消不  
竭按心頭不住如跌怕有人提起情更熱又怕  
無人提起心加切提不提總肝腸寸結提不提  
肝腸寸絕

玉胞肚

肝腸寸絕酒無靈飯成哽噎奈教人顛倒神竄  
語言間半是差迭離人對景總淒切無燄疎燈  
多事月

嘉慶子

分付兒童遠睡些分付牀頭緊閉些怕癡鬼不  
鎖心機怕癡鬼不鎖心機向夢兒中適然漏泄  
只落得夢難成無漏泄

僥僥令

兩情相湊洽攪做沅江月不暗不明空中結無

底無邊流怎絕

香柳娘

信前冤宿業信前冤宿業把我心窩防設片時  
不肯容人活笑無明無夜笑無明無夜一團團  
兩冤結忙碌碌無休歇縱千般計法縱千般計  
法化水鋸成屑只在我膏肓住也

好姐姐

無端柯頭鬪葉伴悄悄疎鍾到徹沉沉墨墨度  
過了無限劫禪燈滅滄園坐遣塵心絕忽見他

泣向神前先訴說

減字憶多嬌

訴我心意劣把情愛割身外功名直恁切忍使  
一線柔腸做了鋼鍊鐵

減字鬪黑麻

我聽說罷忙把旃檀碎躡聽說罷再把楞嚴扯  
裂比似他情款款意怯怯軟玉溫香也認做如  
蛇似蝎

減字歸朝歡

從今後從今後把前程聽者恩愛河安心永涉  
從今後從今後風情罪業永無年將牢籠擺脫  
尾聲  
管教我兩人緣分環無缺今生重整鴛鴦牒待  
取來生還再也

小二四調 有序

嘗云西子良美不遇鴟夷老于若耶未  
必若此彰著卽西子不然下此如容歌  
滿舞風調可觀不得樂天豈至今譽其

名張淨琬以掌中舞也孫荆玉以反腰  
也張麗英以奇光也李新聲以傑識也  
是以不得人而事名亦不朽悲哉小二  
不敢望西子亦乏諸人之妖冶殊慧然  
豈多遜容滿乎語云後世知來由小二  
其已矣紅顏以沈淪老何異以骨血腥  
健兒爲四調紀之

二犯江兒水

門前車馬鬧嚷嚷門前車馬春風拂楚娃只消



他低回几側滿坐韶華揭羅衫蜂蝶下姣冶比  
春花花容輸與他面帶微霞鬢邊驚鴉你是洞  
天人肯向東風嫁丹萸嫩芽紀芳年丹萸嫩芽  
千金爲價一笑裏千金爲價不是有緣的幾見  
他眉語度過牕紗

其二

凌波微步望縹緲凌波微步嬌春上綺羅怪的  
是愁容半揜害了多少風魔用萬千心博一顧  
新月引珠歌顏酡澹小蛾錦簇英鋪玉液瓊粵  
汗流香點薔薇露情城愛河占人間情城愛河  
悶愁無數惹人心悶愁無數爭要把箇姓名兒  
放你心窩

其三

年當桃李正妖嬈年當桃李凝妝厭整齊一任  
鬢鬆蟬翅亂著春衣似鏡湖人在圖畫裏纖玉  
掩眉低翩躚乳燕飛不近聞思如遶荼蘼原來  
是麝成肌蘭成氣柔枝半頽傍春花柔枝半頽  
危闌徙倚趁微風危闌徙倚少年家不知愁緒

笑聽黃鸝

其四

陌花如繡恣春遊陌花如繡行行體欲浮恨錦  
泥拴逗烟霧籠囚柏梁臺空回首歌舞買離憂  
蛙池養玉蚪淚灑丹榴香罷衣篝百重關在南  
湘後蜻蜓自由住狂風蜻蜓自由新鸞喜偶放  
歸巢新鸞喜偶狂支頤看盡了閔雲度去墻頭

侯小雙十調調懶畫眉

有序

時過幼于曲水草堂與小雙諸姬環膝

徵歌結纒鬪草呼博齒弄意錢破蝨畱  
長日之談催花浹清夜之飲醒則高絙  
舞輪醉則乞寒潑胡如是者經歲雙忽  
以家變放棄異鄉流離飄泊竟失所之  
予爲悲感遂不能時過幼于嗣後幼于  
及難景升遠旅胡姬黃土陸姬空門曲  
水赤波草堂白地詩酒去爲春夢歌舞  
飛作綵雲而草堂之風流盡矣然去者  
知在人間死者知在地下獨雙如墜雨

飄風蹤沈影滅訂後期而無從感泉下  
而莫必爲之灑涕而賦此

花從檻外感容輝柳向朱闌憶翠眉春風寂寞  
想羅衣夢淒蝶魄空成隊也似多情怨別離

其二

燈前月下與牀頭歷盡黃昏幾樣愁癡心望斷  
石家樓懊儂歌在人非舊

贏得

處處河橋日日

秋

其三

畫中春色影中梅景物相期未有期  
剛那燭殘明滅解衣時沉沉萬轉生縈繫  
豈但一日離腸作九迴

其四

俺這裏

時聞喚起語關關

他那裏

日聽催歸曉

夢殘醒時如醉坐如眠白雲風送應難轉帶我  
心情去不還

其五

水流千里落花隨花想家園水不歸思君沈困

暫求推意中人鎖人中意不甚相依不願離

其六

隨風繫帶不堪畱寺壁生塵怕紀遊兩行朱字  
憶筵篔天涯月底闌干後少女時花兩地愁

其七

道你玉姿飄散作塵飛便是飛塵有飛到時一

身骯髒化寒灰成灰猶是君身體今你何處成  
灰何處飛

其八

啞啞鵲噪破南柯無數衷腸說未多你名為喜  
鵲作哀鳥相逢一夢猶擔誤知道今夜朦朧甚  
睡魔

其九

紅顏自恨付君身君恨紅顏倍勝人紅顏自古  
命如君君顏不比尋常勝可知不比尋常薄命  
人

其十

我心隨你遍天涯音移你在我心中不暫離癡心

甚邪甚晴合  
似播夢也

到處惹相思怕眼前提起雙名字摘下並蓋花  
枝剩一枝

陳家映桃十三曲有序

映桃其小倩也故不能作絲蘿而陳君  
則既已心許許不得遂致有生死合離  
之故予所不忍聞者予不忍聞陳君忍  
言乎故不能自言而屬詞于予

香遍滿二

燈前今夜把十年簿兒還再揭往事如冰心倍  
熱非關緣分賒非干他意少幾番暗自嗟都是  
我輕拚舍

其二

剪蘭薰麝眉梢眼梢常帶斜滿腹溫存口禁齧  
酒杯斟滿些衣篝罩煖些一時意轉切引起我  
前冤業

梧桐樹二

一歌清唱闕兩度濃雲合分付從今再休把衾  
兒疊戲伸小指和他說映水桃枝可肯秋蘭纒

佩結他垂頭靦腆無回答欲吐還吞只把身軀  
扭捏

其二

中心難自泄暗裏深深謝未必孃行恁地能賢  
哲衷腸怎好和君說說不願了頭願做官人的  
侍妾他堅牢望我情真切豈想風波果應了他  
心料者

浣溪沙 二

我意堅他意決正花開猛雨摧折平陽水湧湘  
江闊白地雲封蜀道絕臨到別手捧著衫兒理  
衣摺恨中情畢竟難說

其二

心火燒假做鐵把恩情頓碎成屑剛刀一綫真  
難割薄片風中飄去雪他雙淚血罵道好甜言  
騙人法把袖兒揜伊嘴臉羞殺

劉潑帽 二

音絕我倩託溝中葉他低頭傳語悲咽道從今  
罷了休閑聒承賜玦已抹了鴛鴦牒

其二

沒法怎得紅線能飛脫我堂堂男子柔怯不能  
自作黃衫客那時節管甚麼閑唇舌

秋夜月二

情苦意渴反悔那嬌歌夜似垂死啼鴟餘音徹  
燈油既盡餘光燁我道似久熱卻誰知快滅

其二

不久死別你死了番安貼死去無知情都撇我  
身未死難收煞既是永訣留一邊怎活

東歐令二

孱弱態清俊頰裝不盡當初恩愛車只那風吹  
不亂垂肩髮直恁的絲絲潔至今絲絲把我心  
腸結腸斷了意難絕

其二

今生事往世業可是前世根由今暫合還是根  
由未了來生接又補却今生缺生前猶自輕離  
別還說甚後生劫

金蓮子

冤夢越十年心事歸鷓鴣空自向梳頭邊悶咽  
怎能把淚窩中一珠兒彈去滴淚穴

尾聲

他心心只望同歡悅因此聲聲唱箇拜星月誰  
想月証星媒俱浪說

裏人四曲

有序

有女以裏人致疾竟不復起垂革人問  
何遺言女曰無有微作吁嗟泣下數行  
而絕友人爲作黃鸝四曲收其淚索和

于予一送別一秋裏一閨恨一永訣

分手漾輕舟弄柔衫挽淚留叮嚀不語心相授  
江烟半收蘭橈半浮纖眉却共波紋皺望悠悠  
水連天處人在絮雲兜

其二

人去獨凭樓鎖溫香簾不鈎畫屏曲曲涼何驟  
怪梧葉解秋殘缺樹頭放月光一綫西牕漏意  
如綢燈花報喜夢裏定還舟

其三



無計遣心頭酒無靈意欲丟奈意見丟去着還  
逗春水解憂又被寒雲凍愁寸腸已斷愁難又  
歎雙眸盡收湘水付與恨俱流

其四

鬼病苦相讐骨孱孱露翠裯薄情何德堪消受  
生前且休朱顏且丟誰言駿骨千金售任漂游  
招魂誰賦莫向晚江頭

燕女有搗琵琶者喜爲是歌乞新聲數調  
余時大醉應絃疾書成十八韻

勸君莫學楊花性呀滾滾無憑滾滾無憑飛去  
天邊不轉情便轉情暫粘身也是蘋梗也是蘋  
梗

其二

開牕盼着他來到呀盼到明朝盼到明朝眼角  
磨酸心火燒要開交便開交鎖着牕了鎖着牕  
了

其三

塔前跣到同罰願呀美語甘言美語甘言今日

將奴撇一邊走堦前問神天曾記他言曾記他  
言

其四

日間不得親郎面呀夢裏商量夢裏商量身在  
空房塊那廂紙一張淚千行帶去他方帶去他  
方

其五

琵琶換却相思調呀暫遣冤家暫遣冤家鸚鵡  
無端叫起他眼都花指都麻丟去琵琶丟去琵琶

琵琶

其六

蝴蝶來到春歸去呀何事遲來何事遲來蚤是  
晴和花少灾若風災若雨災羞你空來羞你空  
來

其七

推窗卻去簷前月呀挨人疎櫺挨入疎櫺要  
無情故有情不多明線兒痕偏射孤衾偏射孤  
衾

其八

樓前遠遠飛來騎呀忙下珠簾忙下珠簾或是  
他不緊着鞭偷眼看近樓前不像容顏不像容  
顏

其九

舉頭三尺神明在呀今在何方今在何方難道  
神明無主張把仙方到他廂改副心腸改副心  
腸

其十

三年不見當初燕呀害我傷情害我傷情何處  
雕梁安你身好安身竟安身管甚傷情管甚傷  
情

其十一

不茶不飯空耽病呀何苦煎熬何苦煎熬夢裏  
還須亟走遭髮一刀命一條討个分曉討个分  
曉

其十二

畫眉伴我房兒內呀誰第他名誰第他名多事

張郎畫美人到如今淡山橫徒伴虛名徒伴虛  
名

其十三

梅枝映在窻兒上呀虛影參差虛影參差何事  
時時會改移到一時過一時又改些兒又改些  
兒

其十四

空中片片流雲度呀濃淡分開濃淡分開淡的  
忙飛不轉來若還來莫分開甘雨方諧甘雨方

諧

其十五

籠中百舌知奴恨呀不會傳情不會傳情將你  
舌尖教你聽咒幾聲罵幾聲須要清吟須要清  
吟

其十六

口時花瓣凋落盡呀今日還生今日還生難道  
他鄉沒有春若有春見花新不動些情不動些  
情

其十七

何方孤雁沙頭宿呀命與奴合命與奴合尾上  
絲繫你些那年月這時節認得真切認得真  
切

其十八

壁間掛幅無名畫呀畫箇秋聲畫箇秋聲童子  
三更開起門好丹青到三更還等誰人還等誰  
人

其十九

單衾不耐寒威壯呀加領衣衫加領衣衫想起  
他行衾也單一邊單理何安寧受衾寒寧受衾  
寒

黃鶯兒

鐵馬鬪簷低趁餘香薰舊衣一行陌艸籠烟翠  
正簾半垂鑲屏半圍金衣對語雙聲脆碧巍巍  
來去人坐畫樓西

雜著附

齋中木魚銘後爲陳古白敲碎復作碎木  
魚銘

剗爾心擊爾身何如叩之無鳴

其二

禾酒心醉未枕心寤心不可擊唯爾罪

其三

困魚困魚久困如死筆楚萬千有激而起

其四

明明是魚呼之曰木一朝敲碎碎分五六塊塊  
木頭塊塊魚肉

研銘

磨我乎我磨爾乎小小石稜中有神魚用尾  
一掉雲氣四噓黑光瀟灑雷鳴風呼呵一滴泉  
飛為斛玦忽然而解烟掃氛除